

II SHREE VITRAAGAAYA NAMAH II



UPPANEIVĀ
VIGAMEIVĀ
DHUVEIVĀ

सुयगडांग सुत्तं
SUYAGADĀNGA SŪTRA

पंचम गणधर सिरि सुहम्मसामी विरइयं

सूयगडो

सुयगडांग सुत्तं

SUYAGADĀNGA SŪTRA

मूल पाठ

Ardhamāgadhī Aphorisms

अंग आगम – २

2ND AṄGA ĀGAMA

Bhagwan Mahāvīra's Precepts

Sūtra First Composed By Fifth Gaṇadhara

ŚRĪ SUDHARMĀ SWĀMĪ

Vallabhi Council (Synod) Chair

DEVARDDHIGAṆĪ KṢAMAŚRAMANA

Published By

GLOBAL JAIN AAGAM MISSION

सूयगडो
सुयगडांग सुत्तं
SUYAGADĀNGA SŪTRA

First eBook Edition (PDF) – 2012

Source of Ardhamāgadhī Aphorisms:
GURUPRAN AAGAM BATRISI (Aagam Series)
(Gujarati 2nd Edition, 2009)
Published on the Occasion of 100th Birth Anniversary of
SAURASHTRA KESHARI GURUDEV
PUJYA SHREE PRANLALJI M. S.

Text in “Mangal (Unicode)” Font

Published By:
GLOBAL JAIN AAGAM MISSION
C/o. Pawandham, Mahavir Nagar,
Kandivali (W), Mumbai - 400 067
Tel.: +91 92233 14335, e-mail : info@jainaagam.org
www.jainaagam.org / www.parasdham.org

GLOBAL JAIN AAGAM MISSION

Promoting Compassionate and Nonviolent Living

MISSION:

Global Jain Aagam Mission promotes the eternal truths of Jain *Āgama* (precepts of Lord Mahāvīra) to build a compassionate and nonviolent lifestyle in the world.

GOALS AND OBJECTIVES:

- Translate all Jain *Āgamas* (scriptures) into English and other world languages
- Make *Āgamas* available in all electronic forms
- Promote awareness of *Āgama* throughout the world
- Educate and uphold Jain way of life using expertise of social media
- Promote a compassionate and nonviolent lifestyle throughout the world
- Encourage and promote research on *Āgamas* to develop approaches to the world challenges (ecology & environment, global warming, world peace, psychology, health, scientific principles, etc.)
- Hold periodic conventions to promote exchanges among world's scholars
- Interface with interreligious organizations and other guiding institutions
- Be a resource for information and referral
- Work co-operatively with local, regional, national, and global organizations

TRANSLATION OF JAIN AAGAMAS INTO ENGLISH:

The Global Jain Aagam Mission has embarked on a project to translate and publish all Jain *Āgamas* into English. The English translation of the *Āgama* will help youth of today in India and abroad to learn and understand Lord Mahāvīra's preachings. The goal is to reach every household and every person in the world to impart the wisdom of the *Āgamas*. In a non-sectarian way, this Mission will endeavor to deliver the Lord Mahāvīra's message to hearts of the people. The translated *Āgamas* will be distributed to various libraries, universities and Jain institutions within our country and abroad. In addition, it will be made available on the Internet and in electronic forms of eBooks, etc. Many learned intellectuals from different countries and cultures have supported this project of translating the *Āgama's* into English. The work is being performed in cities of Mumbai, Ahmedabad, Bangalore, Shravanbelgola, Delhi, Jaipur, Chennai, Kolkata, Banaras, Ladnu, Dubai, and USA. In addition, this mission is receiving guidance and blessings from spiritual leaders of various religious traditions.

INVITATION TO PARTICIPATE:

We invite scholars, spiritual aspirants and *shrāvakas* to join us in making this mission a success. Your contribution of knowledge, time, and money will be appreciated.

Please contact by email at info@jainaagam.org or by phone to:

Girish Shah at Tel. +91-92233-14335 or Gunvant Barvalia at Tel. +91-98202-15542

पढमो सुयखंधो	2
पढमं अज्झयणं	2
समय	2
पढमो उद्देसो	2
बीओ उद्देसो	4
तइओ उद्देसो	6
चउत्थो उद्देसो	7
बीअं अज्झयणं	9
वेयालीयं	9
पढमो उद्देसो	9
बीओ उद्देसो	10
तइओ उद्देसो	13
तइअं अज्झयणं	15
उवसग्ग परिण्णा	15
पढमो उद्देसो	15
चउत्थं अज्झयणं	21
इत्थि परिण्णा	21
पढमो उद्देसो	21
बीओ उद्देसो	23
पंचमं अज्झयणं	25
णरय विभत्ति	25
पढमो उद्देसो	25
बीओ उद्देसो	27
छट्ठं अज्झयणं	29
महावीरत्थुई	29
सत्तमं अज्झयणं	32
कुसील परिभासियं	32
अट्ठमं अज्झयणं	34
वीरियं	34
णवमं अज्झयणं :	36
धम्मो	36
दसमं अज्झयणं	39
समाही	39
एगारसमं अज्झयणं	41
मग्गं	41
बारसमं अज्झयणं	44
समोसरणं	44
तेरसमं अज्झयणं	45
आहत्तहीयं	46
चउद्दसमं अज्झयणं	47
गंधो	47
पण्णरसमं अज्झयणं	50
जमईए	50
सोलसमं अज्झयणं	52
गाहा	52
पथमो सुयखंधो समत्तो	52
बीओ सुयखंधो	53
पढमं अज्झयणं	53
पोंडरिए	53
बीअं अज्झयणं	64
किरियाठाण	64
तइअं अज्झयणं	77
आहार परिण्णा	77
चउत्थ अज्झयणं	83
पच्चक्खाणकिरिया	83
पंचमं अज्झयणं	86
आयारसुयं	86
छट्ठं अज्झयणं	89
अद्दइज्जं	89
सत्तमं अज्झयणं	93
णालंदइज्जं	93
॥ बीओ सुयखंधो समत्तो ॥	100
॥ सुयगडं सुत्तं समत्तं ॥	100

पढमो सुयखंधो

पढमं अज्झयणं

समय

पढमो उद्देशो

- १ बुज्झिज्ज तिउट्टेज्जा, बंधणं परिजाणिया ।
किमाह बंधणं वीरो ? किं वा जाणं तिउट्टइ ॥
- २ चित्तमंतमचित्तं वा, परिगिज्झ किसामिव ।
अण्णं वा अणुजाणाइ, एवं दुक्खा ण मुच्चइ ॥
- ३ सयं तिवायए पाणे, अदुवा अण्णेहिं घायए ।
हणंतं वाऽणुजाणाइ, वेरं वड्ढेइ अप्पणो ॥
- ४ जस्सिं कुल समुप्पण्णे, जेहिं वा संवसे णरे ।
ममाइ लुप्पइ बाले, अण्णमण्णेहिं मुच्छिइ ॥
- ५ वित्तं सोयरिया चेव, सव्वमेयं ण ताणए ।
संखाए जीवियं चेव, कम्मणा उ तिउट्टइ ॥
- ६ एए गंथे विउक्कम्म, एगे समण-माहणा ।
याणंता विउस्सित्ता, सत्ता कामेहिं माणवा ॥
- ७ संति पंच महब्भूया, इहमेगेसिमाहिया ।
पुढवी आऊ तेऊ वा, वाऊ आगास पंचमा ॥
- ८ एते पंच महब्भूया, तेब्भो एगो त्ति आहिया ।
अह तेसिं विणासेणं, विणासो होइ देहिणो ॥
- ९ जहा य पुढवीथूभे, एगे णाणाहि दीसइ ।
एवं भो ! कसिणे लोए, विण्णु णाणाहि दीसइ ॥
- १० एवमेगे त्ति जंपंति, मंदा आरंभणिस्सिया ।
एगे किच्चा सयं पावं, तिव्वं दुक्खं णियच्छइ ॥
- ११ पत्तेयं कसिणे आया, जे बाला जे य पंडिया ।
संति पेच्चा ण ते संति, णत्थि सत्तोववाइया ॥

- १२ णत्थि पुण्णे व पावे वा, णत्थि लोए इतो परे ।
सरीरस्स विणासेणं, विणासो होइ देहिणो ॥
- १३ कुव्वं च कारयं चेव, सव्वं कुव्वं ण विज्जइ ।
एवं अकारओ अप्पा, एवं ते उ पगब्भिया ॥
- १४ जे ते उ वाइणो एवं, लोए तेसिं कओ सिया ।
तमाओ ते तमं जंति, मंदा आरंभणिस्सिया ॥
- १५ संति पंच महब्भूया, इहमेगेसिं आहिया ।
आयछट्ठा पुणो आहु, आया लोगे य सासए ॥
- १६ दुहओ ते ण विणस्संति, णो य उप्पज्जए असं ।
सव्वे वि सव्वहा भावा, णियतीभावमागया ॥
- १७ पंच खंधे वयंतेगे, बाला उ खणजोइणो ।
अण्णो अणण्णो णेवास्सहु, हेउयं च अहेउयं ॥
- १८ पुढवी आऊ तेऊ य, तहा वाउ य एगओ ।
चत्तारि धाउणो रूवं, एवमाहंसु आवरे ॥
- १९ अगारमावसंता वि, आरण्णा वा वि पव्वया ।
इमं दरिसणमावण्णा, सव्वदुक्खा विमुच्चइ ॥
- २० ते णावि संधिं णच्चाणं, ण ते धम्मविऊ जणा ।
जे ते उ वाइणो एवं, ण ते ओहंतरास्सहिया ॥
- २१ ते णावि संधिं णच्चाणं, ण ते धम्मविऊ जणा ।
जे ते उ वाइणो एवं, ण ते संसारपारगा ॥
- २२ ते णावि संधिं णच्चाणं, ण ते धम्मविऊ जणा ।
जे ते उ वाइणो एवं, ण ते गब्भस्स पारगा ॥
- २३ ते णावि संधिं णच्चाणं, ण ते धम्मविऊ जणा ।
जे ते उ वाइणो एवं, ण ते जम्मस्स पारगा ॥
- २४ ते णावि संधिं णच्चाणं, ण ते धम्मविऊ जणा ।
जे ते उ वाइणो एवं, ण ते दुक्खस्स पारगा ॥
- २५ ते णावि संधिं णच्चाणं, ण ते धम्मविऊ जया ।
जे ते उ वाइणो एवं, ण ते मारस्स पारगा ॥
- २६ णाणाविहाइं दुक्खाइं, अणुभवन्ति पुणो पुणो ।

संसारचक्कवालम्मि, वाहि-मच्चु-जराकुले ॥

२७

उच्चावयाणि गच्छंता, गब्भमेस्संतऽणंतसो ।
णायपुत्ते महावीरे, एवमाह जिणोत्तमे ॥त्ति बेमि ॥

॥ पढमो उद्देशो समत्तो ॥

बीओ उद्देशो

१

आघायं पुण एगेसिं, उववण्णा पुढो जिया ।
वेदयंति सुहं दुक्खं, अदुवा लुप्पंति ठाणओ ॥

२

ण तं सयंकडं दुक्खं, कओ अण्णकडं च णं ।
सुहं वा जइ वा दुक्खं, सेहियं वा असेहियं ॥

३

ण सयं कडं ण अण्णेहिं, वेदयंति पुढो जिया ।
संगइयं तं तहा तेसिं, इहमेगेसिमाहियं ॥

४

एवमेयाइं जंपंता, बाला पंडियमाणियो ।
णिययाऽणिययं संतं, अयाणंता अबुद्धिया ॥

५

एवमेगे उ पासत्था, ते भुज्जो विप्पगब्भिया ।
एवं उवट्ठिया संता, ण ते दुक्खविमोक्खया ॥

६

जविणो मिगा जहा संता, परियाणेण वज्जिया ।
असंकियाइं संकंति, संकियाइं असंकिणो ॥

७

परियाणियाणि संकंता, पासियाणि असंकिणो ।
अण्णाणभयसंविग्गा, संपलित्ति तहिं तहिं ॥

८

अह तं पवेज्ज वज्झं, अहे वज्झस्स वा वए ।
मुच्चेज्ज पयपासाओ, तं तु मंदे ण देहइ ॥

९

अहियप्पाऽहियपण्णाणे, विसमंतेणुवागए ।
से बद्धे पयपासेहिं, तत्थ घायं णियच्छइ ॥

१०

एवं तु समणा एगे, मिछाद्धिद्वी अणारिया ।
असंकियाइं संकंति, संकियाइं असंकिणो ॥

११

धम्मपण्णवणा जा सा, तं तु संकंति मूढगा ।
आरंभाइं ण संकंति, अवियत्ता अकोविया ॥

- १२ सव्वप्पगं विउक्कस्सं, सव्वं णूमं विहूणिया ।
अप्पत्तियं अकम्मंसे, एयमद्वं मिगे चुए ॥
- १३ जे एयं णाभिजाणंति, मिच्छद्दिट्ठी अणारिया ।
मिगा वा पासबद्धा ते, घायमेसंतऽणंतसो ॥
- १४ माहणा समणा एगे, सव्वे णाणं सयं वए ।
सव्वलोगे वि जे पाणा, ण ते जाणंति किंचणं ॥
- १५ मिलक्खू अमिलक्खुस्स, जहा वुत्ताणुभासइ ।
ण हेउं से विजाणाइ, भासियं तऽणुभासइ ॥
- १६ एवमण्णाणिया णाणं, वयंता वि सयं सयं ।
णिच्छयत्थं ण जाणंति, मिलक्खु व्व अबोहिया ॥
- १७ अण्णाणियाणं वीमंसा, अण्णाणे णो णियच्छइ ।
अप्पणो य परं णालं, कुतो अण्णेऽणुसासिउं ? ॥
- १८ वणे मूढे जहा जंतु, मूढणेयाणुगामिए ।
दोवि एए अकोविया, तिव्वं सोयं णियच्छइ ॥
- १९ अंधो अंधं पहं णित्तो, दूरमद्वणुगच्छइ ।
आवज्जे उप्पहं जंतु, अदुवा पंथाणुगामिए ॥
- २० एगमेवे णियागट्ठी, धम्ममाराहगा वयं ।
अदुवा अहम्ममावज्जे, ण ते सव्वज्जुयं वए ॥
- २१ एवमेगे वियक्काहिं, णो अण्णं पज्जुवासिया ।
अप्पणो य वियक्काहिं, अयमंजू हि दुम्मइ ॥
- २२ एवं तक्काए साहेता, धम्माऽधम्मे अकोविया ।
दुक्खं ते णाइतुट्ठंति, सउणी पंजरं जहा ॥
- २३ सयं सयं पसंसंता, गरहंता परं वइं ।
जे उ तत्थ विउस्संति, संसारं ते विउस्सिया ॥
- २४ अहावरं पुरक्खायं, किरियावाइदरिसणं ।
कम्मचिंतापणट्ठाणं, संसारस्स पवइढणं ॥
- २५ जाणं काएणऽणाउट्ठी, अबुहो जं च हिंसइ ।
पुट्ठो संवदेइ परं, अवियत्तं खु सावज्जं ॥
- २६ संतिमे तओ आयाणा, जेहिं कीरइ पावगं ।

अभिकम्मा य पेसा य, मणसा अणुजाणिया ॥

- २७ एते उ तओ आयाणा, जेहिं कीरइ पावगं ।
एवं भावविसोहीए, णिव्वाणमभिगच्छइ ॥
- २८ पुत्तं पिया समारंभ, आहारेज्जा असंजए ।
भुंजमाणो य मेहावी, कम्मुणा णोवलिप्पइ ॥
- २९ मणसा जे पउस्संति, चित्तं तेसिं ण विज्जइ ।
अणवज्जं अतहं तेसिं, ण ते संवुडचारिणो ॥
- ३० इच्चेयाहिं दिट्ठीहिं, सायागारवणिस्सिया ।
सरणं ति मण्णमाणा, सेवंति पावगं जणा ॥
- ३१ जहा अस्साविणिं णावं, जाईअंधो दुरुहिया ।
इच्छइ पारमागंतुं, अंतरा य विसीयइ ॥
- ३२ एवं तु समणा एगे मिच्छादिट्ठी अणारिया ।
संसारपारकंखी ते, संसारं अणुपरियट्ठंति ॥ त्ति बेमि ॥

॥ बीओ उद्देसो समत्तो ॥

तइओ उद्देसो

- १ जं किंचि वि पूइकडं, सड्ढीमागंतुमीहियं ।
सहस्संतरियं भुंजे, दुपक्खं चेव सेवइ ॥
- २ तमेव अवियाणंता, विसमंसि अकोविया ।
मच्छा वेसालिया चेव, उदगस्ससभियागमे ॥२॥
- ३ उदगस्ससप्पभावेणं, सुक्कंमि घातमिति उ ।
ढंकेहि व कंकेहिं य, आमिसत्थेहिं ते दुही ॥३॥
- ४ एवं तु समणा एगे, वट्ठमाणसुहेसिणो ।
मच्छा वेसालिया चेव, घायमेसंतिऽणंतसो ॥४॥
- ५ इणमण्णं तु अण्णाणं, इहमेगेसिमाहियं ।
देवउत्ते अयं लोए, बंभउते त्ति आवरे ॥
- ६ ईसरेण कडे लोए, पहाणाए तहावरे ।
जीवाऽजीवसमाउत्ते, सुह-दुक्खसमण्णिणए ॥
- ७ सयंभुणा कडे लोए, इइ वुत्तं महेसिणा ।

मारेण संथुया माया, तेण जोए असासए ॥

- ८ माहणा समणा एगे, आह अंडकडे जगे ।
असो तत्तमकासी य, अयाणंता मुसं वए ॥
- ९ सएहिं परियाएहिं लोयं, बूया कडे त्ति य ।
तत्तं ते वियाणंती ण, विणासि कयाइ वि ॥
- १० अमणुण्णसमुप्पायं, दुक्खमेव वियाणिया ।
समुप्पायमयाणंता, कहं णाहिंति संवरं ॥
- ११ सुद्धे अपावए आया, इहमेगेसि आहियं ।
पुणो कीडा-पदोसेणं, से तत्थ अवरज्झइ ॥
- १२ इह संवुडे मुणी जाए, पच्छा होइ अपावए ।
वियडं व जहा भुज्जो, णीरयं सरयं तहा ॥
- १३ एयाणुवीए मेहावी, बंभचेरे ण ते वसे ।
पुढो पावाउया सव्वे, अक्खायारो सयं सयं ॥
- १४ सए सए उवट्ठाणे, सिद्धिमेव ण अण्णहा ।
अहो इहेव वसवत्ती, सव्वकामसमप्पिए ॥
- १५ सिद्धा य तो अरोगा य, इहमेगेसिं आहियं ।
सिद्धिमेव पुराकाउं, सासए गढिया णरा ॥
- १६ असंवुडा अणाईयं, भमिहिंति पुणो पुणो ।
कप्पकालमुवज्जंति, ठाणा आसुर किव्विसिय॥-त्ति बेमि

॥ तइओ उद्देसो समत्तो ॥

चउत्थो उद्देसो

- १ एते जिया भो ! ण सरणं, बाला पंडियमाणिणो ।
हिच्चा णं पुव्वसंजोगं, सिया किच्चोवएसगा ॥
- २ तं च भिक्खू परिण्णाय, विज्जं तेसु ण मुच्छए ।
अणुक्कसे अप्पलीणे, मज्झेण मुणि जावए ॥
- ३ सपरिग्गहा य सारंभा, इहमेगेसिमाहियं ।

अपरिग्गहे अणारंभे, भिक्खू ताणं परिव्वए ॥

४ कडेसु घासमेसेज्जा, विऊ दत्तेसणं चरे ।
अगिद्धो विप्पमुक्को य, ओमाणं परिवज्जए ॥

५ लोगावायं णिसामेज्जा, इहमेगेसिं आहियं ।
विवरीयपण्णसंभूयं, अण्णवुत्तं तयाणुगं ॥

६ अणंते णिइए लोए, सासए ण विणस्सइ ।
अंतवं णिइए लोए, इति धीरोऽतिपासइ ॥

७ अपरिमाणं वियाणाइ, इहमेगेसि आहियं ।
सव्वत्थ सपरिमाणं, इति धीरोऽतिपासइ ॥

८ जे केइ तसा पाणा, चिट्ठंति अदु थावरा ।
परियाए अत्थि से अंजू, तेण ते तस-थावरा ॥

९ उरालं जगओ जोगं, विवज्जासं पल्लंति य ।
सव्वे अक्कंत दुक्खा य, अओ सव्वे अहिंसिया ॥

१० एवं खु णाणिणो सारं, जं ण हिंसइ किंचणं ।
अहिंसा समयं चेव, एतावंतं वियाणिया ॥

११ वुसिए य विगयगेही य, आयाणं संरक्खए ।
चरियाऽऽसण-सेज्जासु, भत्तपाणे य अंतसो ॥

१२ एतेहिं तिहिं ठाणेहिं, संजए सययं मुणी ।
उक्कसं जलणं णूमं, मज्झत्थं च विगिंचए ॥

१३ समिए उ सया साहू, पंचसंवरसंवुडे ।
सिएहिं असिए भिक्खू, आमोक्खाए परिवएज्जासि॥त्ति बेमि ॥

॥ चउत्थो उद्देसो समत्तो ॥

॥ पढमं अज्झयणं समत्तं ॥

बीअं अज्झयणं

वेयालीयं

पढमो उद्देशो

- १ संबुज्झह किं ण बुज्झह, संबोही खलु पेच्च दुल्लहा ।
णो हूवणमंति राइओ, णो सुलभं पुणरावि जीवियं ॥
- २ डहरा वुड्ढा य पासहा, गब्भत्था वि चयंति माणवा ।
सेणे जह वट्ठयं हरे, एवं आउखयम्मि तुट्ठइ ॥
- ३ मायाहिं पियाहिं लुप्पइ, णो सुलहा सुगई मे पेच्चओ ।
एयाइं भयाइं पेहिया, आरंभा विरमेज्ज सुव्वए ॥
- ४ जमिणं जगई पुढो जगा, कम्महेहिं लुप्पंति पाणिणो ।
सयमेव कडेहिं गाहइ, णो तस्स मुच्चे अपुट्ठवं ॥
- ५ देवा गंधव्व रक्खसा, असुरा भूमिचरा सिरीसिवा ।
राया णरसेट्ठि-माहणा, ठाणा ते वि चयंति दुक्खिया ॥
- ६ कामेहि य संथवेहि य, गिद्धा कम्मसहा कालेण जंतवो ।
ताले जह बंधणच्चुए, एवं आउखयम्मि तुट्ठइ ॥
- ७ जे यावि बहुस्सुए सिया, धम्मिय माहण भिक्खुए सिया ।
अभिणूमकडेहिं मुच्छिए, तिव्वं से कम्महेहिं किच्चइ ॥
- ८ अह पास विवेगमुट्ठिए, अवितिण्णे इह भासइ धुवं ।
णाहिसि आरं कओ परं, वेहासे कम्महेहिं किच्चइ ॥
- ९ जइ वि य णिगिणे किसे चरे, जइ वि य भुंजिय मासमंतसो ।
जे इह मायाइ मिज्जइ, आगंता गब्भायऽणंतसो ॥
- १० पुरिसोरम पावकम्मणा, पलियंतं मणुयाण जीवियं ।
सण्णा इह काममुच्छिया, मोहं जंति णरा असंवुडा ॥
- ११ जययं विहराहि जोगवं, अणुपाणा पंथा दुरुत्तरा ।
अणुसासणमेव पक्कमे, वीरेहिं सम्मं पवेइयं ॥
- १२ विरया वीरा समुट्ठिया, कोहाकायरियाइपीसणा ।

पाणे ण हणंति सव्वसो, पावाओ विरयाऽभिणिव्वुडा ॥

१३ ण वि ता अहमेव लुप्पइ, लुप्पंति लोगंसि पाणिणो ।
एवं सहिएऽहिपासए, अणिहे से पुट्ठोऽहियासए ॥

१४ धुणिया कुलियं व लेववं, किसए देहमणासणाइहिं ।
अविहिंसामेव पव्वए, अणुधम्मो मुणिणा पवेइओ ॥

१५ सउणी जह पंसुगुंडिया, विहुणिय धंसयइ सियं रयं ।
एवं दविओवहाणवं, कम्मं खवइ तवस्सि माहणे ॥

१६ उट्ठियमणगारमेसणं, समणं ठाण्ठियं तवस्सिणं ।
डहरा वुड्ढा य पत्थए, अवि सुस्से ण य तं लभे जणा ॥

१७ जइ कालुणियाणि कासिया, जइ रोयंति व पुत्तकारणा ।
दवियं भिक्खुं समुट्ठियं, णो लब्भंति ण संठवित्तए ॥

१८ जइ वि य कामेहिं लाविया, जइ णेज्जाहि णं बंधिउं घरं ।
जइ जीवियं णावकंखए, णो लब्भंति ण संठवित्तए ॥

१९ सेहंति य णं ममाइणो, माया पिया य सुया य भारिया ।
पोसाहि णे पासओ तुमं, लोयं परं पि जहाहि पोस णे ॥

२० अण्णे अण्णेहिं मुच्छिया, मोहं जंति णरा असंवुडा ।
विसमं विसमेहिं गाहिया, ते पावेहिं पुणो पगब्भिया ॥

२१ तम्हा दवि इक्ख पंडिए, पावाओ विरएऽभिणिव्वुडे ।
पणया वीरा महावीहिं, सिद्धिपहं णेयाउयं धुवं ॥

२२ वेयालियमग्गमागओ, मण वयसा काएण संवुडो ।
चिच्चा वित्तं च णायओ, आरंभं च सुसंवुडे चरे ॥ त्ति बेमि ॥
॥ पढमो उद्देसो समत्तो ॥

बीओ उद्देसो

१ तयसं व जहाइ से रयं, इति संखाय मुणी ण मज्जइ ।
गोयण्णतरेण माहणे, अहऽसेयकरी अण्णेसिं इंखिणी ॥

२ जो परिभवइ परं जणं, संसारे परियत्तइ महं ।
अदु इंखिणिया उ पाविया, इति संखाय मुणी ण मज्जइ ॥

- ३ जे यावि अणायगे सिया, जे वि य पेसगपेसए सिया ।
जे मोणपयं उवट्टिए, णो लज्जे समयं सया चरे ॥
- ४ सम अण्णयरम्मि संजमे, संसुद्धे समणे परिव्वए ।
जे आवकहा समाहिए, दविए कालमकासि पंडिए ॥
- ५ दूरं अणुपस्सिया मुणी, तीयं धम्ममणागयं तहा ।
पुट्ठे फरुसेहिं माहणे, अवि हण्णू समयंसि रीयइ ॥
- ६ पण्णसमत्ते सया जए, समया धम्ममुदाहरे मुणी ।
सुहुमे उ सया अलूसए, णो कुज्झो णो माणि माहणे ॥
- ७ बहुजण णमणम्मि संवुडे, सव्वट्ठेहिं णरे अणिस्सिए ।
हरए व सया अणाविले, धम्मं पाउरकासि कासवं ॥
- ८ बहवे पाणा पुढो सिया, पत्तेयं समयं समीहिया ।
जे मोणपयं उवट्टिए, विरइं तत्थमकासि पंडिए ॥
- ९ धम्मस्स य पारए मुणी, आरंभस्स य अंतए ठिए ।
सोयंति य णं ममाइणो, णो य लभंति णियं परिग्गहं ॥
- १० इहलोग दुहावहं विऊ, परलोगे य दुहं दुहावहं ।
विद्धंसणधम्ममेव तं, इति विज्जं कोऽगारमावसे ॥
- ११ महयं परिगोव जाणिया, जा वि य वंदण-पूयणा इहं ।
सुहुमे सल्ले दुरुद्धरे, विउमंता पयहेज्ज संथवं ॥
- १२ एगे चरे ठाणमासणे, सयणे एगे समाहिए सिया ।
भिकखू उवहाणवीरिए, वइगुत्ते अज्झप्पसंवुडे ॥
- १३ णो पीहे ण यावपंगुणे, दारं सुण्णघरस्स संजए ।
पुट्ठे ण उदाहरे वयं, ण समुच्छे णो संथरे तणं ॥
- १४ जत्थऽत्थमिए अणाउले, सम-विसमाणि मुणीऽहियासए ।
चरगा अदुवा वि भेरवा, अदुवा तत्थ सिरीसिवा सिया ॥
- १५ तिरिया मणुया य दिव्वगा, उवसग्गा तिविहाऽहियासिया ।
लोमादीयं पि ण हरिसे, सुण्णागारगए महामुणी ॥
- १६ णो अभिकंखेज्ज जीवियं, णो वि य पूयणपत्थए सिया ।
अब्भत्थमुव्वेति भेरवा, सुण्णागारगयस्स भिकखुणो ॥

- १७ उवणीयतरस्स ताइणो, भयमाणस्स विवित्तमासणं ।
सामाइयमाहु तस्स जं, जो अप्पाणं भए ण दंसए ॥
- १८ उसिणोदगतत्तभोइणो, धम्मद्वियस्स मुणिस्स हीमओ ।
संसग्गि असाहु राइहिं, असमाही उ तहागयस्स वि ॥
- १९ अहिगरणकडस्स भिक्खुणो, वयमाणस्स पसज्झ दारुणं ।
अट्ठे परिहायइ बहू, अहिगरणं ण करेज्ज पंडिए ॥
- २० सीओदगपडिदुगंछिणो, अपडिण्णस्स लवावसक्किणो ।
सामाइयमाहु तस्स जं, जो गिहिमत्तेऽसणं ण भुंजइ ॥
- २१ ण य संखयमाहु जीवियं, तह वि य बालजणे पगब्भइ ।
बाले पावेहिं मिज्जइ, इति संखाय मुणी ण मज्जइ ॥
- २२ छंदेण पलेइमा पया, बहुमाया मोहेण पाउडा ।
वियडेण पलेइ माहणे, सीउण्हं वयसाऽहियासए ॥
- २३ कुजए अपराजिए जहा, अक्खेहिं कुसलेहिं दीवयं ।
कडमेव गहाय णो कलिं, णो तीयं णो चेव दावरं ॥
- २४ एवं लोगंमि ताइणा, बुइए जे धम्मे अणुत्तरे ।
तं गिण्ह हियं उत्तमं, कडमिव सेसऽवहाय पंडिए ॥
- २५ उत्तर मणुयाण आहिया, गामधम्मा इति मे अणुस्सुयं ।
जंसी विरया समुद्विया, कासवस्स अणुधम्मचारिणो ॥
- २६ जे एयं चरंति आहियं, णाएणं महया महेसिणा ।
ते उद्विय ते समुद्विया, अण्णोण्णं सारंति धम्मओ ॥
- २७ मा पेह पुरा पणामए, अभिकंखे उवहिं धुणित्तए ।
जे दूमणएहि णो णया, ते जाणंति समाहिमाहियं ॥
- २८ णो काहिए होज्ज संजए, पासणिए ण य संपसारए ।
णच्चा धम्मं अणुत्तरं, कयकिरिए य ण यावि मामए ॥
- २९ छण्णं च पसंस णो करे, ण य उक्कोस पगास माहणे ।
तेसिं सुविवेगमाहिए, पणया जेहिं सुझोसियं धुयं ॥
- ३० अणिहे सहिए सुसंवुडे, धम्मट्ठी उवहाणवीरिए ।
विहरेज्ज समाहिइंदिए, आयहियं खु दुहेण लब्भइ ॥

- ३१ ण हि णूण पुरा अणुस्सुयं, अदुवा तं तह णो समुद्धियं ।
मुणिणा सामाइयाहियं, णाएण जगसव्वदंसिणा ॥
- ३२ एवं मत्ता महंतरं, धम्ममिणं सहिया बहू जणा ।
गुरुणो छंदाणुवत्तगा, विरया तिण्ण महोघमाहियं ॥ त्ति बेमि ॥
॥ बीओ उद्देसो समत्तो ॥

तइओ उद्देसो

- १ संवुडकम्मस्स भिक्खुणो, जं दुक्खं पुट्ठं अबोहिए ।
तं संजमओऽवचिज्जइ, मरणं हेच्च वयंति पंडिया ॥
- २ जे विण्णवणाहिऽझोसिया, संतिण्णेहि समं वियाहिया ।
तम्हा उड्ढं ति पासह, अदक्खू कामाइं रोगवं ॥
- ३ अग्गं वणिएहिं आहियं, धारंति राईणिया इहं ।
एवं परमा महव्वया, अक्खाया उ सराइभोयणा ॥
- ४ जे इह सायाणुगा णरा, अज्झोववण्णा कामेसु मुच्छिया ।
किवणेण समं पगब्भिया, ण वि जाणंति समाहिमाहियं ॥
- ५ वाहेण जहा व विच्छए, अबले होइ गवं पचोइए ।
से अंतसो अप्पथामए, णाइवहइ अबले विसीयइ ॥
- ६ एवं कामेसणं विऊ, अज्ज सुए पयहेज्ज संथवं ।
कामी कामे ण कामए, लद्धे वा वि अलद्ध कणहुइ ॥
- ७ मा पच्छ असाहुया भवे, अच्चेहि अणुसास अप्पगं ।
अहियं च असाहु सोयइ, से थणइ परिदेवइ बहुं ॥
- ८ इह जीवियमेव पासह, तरुणए वाससयाउ तुट्ठइ ।
इत्तरवासे व बुज्झह, गिद्धणरा कामेसु मुच्छिया ॥
- ९ जे इह आरंभणिस्सिया, आयदंड एगंत लूसगा ।
गंता ते पावलोगयं, चिरायं आसुरियं दिसं ॥
- १० ण य संखयमाहु जीवियं, तह वि य बालजणे पगब्भइ ।
पच्चुप्पण्णेण कारियं, के दहुं परलोगमागए ॥

- ११ अदक्खुव दक्खुवाहियं, सद्धहसु अद्धक्खुदंसणा ।
हंदि हु सुणिरुद्धदंसणे, मोहणिज्जेण कडेण कम्ममुणा ॥
- १२ दुक्खी मोहे पुणो पुणो, णिव्विंदेज्ज सिलोग पूयणं ।
एवं सहिएऽहिपासए, आयतुलं पाणेहिं संजए ॥
- १३ गारं पि य आवसे णरे, अणुपुव्वं पाणेहिं संजए ।
समया सव्वत्थ सुव्वए, देवाणं गच्छे सलोगयं ॥
- १४ सोच्चा भगवाणुसासणं, सच्चे तत्थ करेज्जुवक्कमं ।
सव्वत्थ विणीयमच्छरे, उच्छं भिक्खु विसुद्धमाहरे ॥
- १५ सव्वं णच्चा अहिद्वए, धम्मद्वी उवहाणवीरिए ।
गुत्ते जुत्ते सया जए, आय-परे परमायतद्विए ॥
- १६ वित्तं पसवो य णाइओ, तं बाले सरणं ति मण्णइ ।
एते मम तेसिं वा अहं, णो ताणं सरणं च विज्जइ ॥
- १७ अब्भागमियम्मि वा दुहे, अहवोवक्कमिए भवंतिए ।
एगस्स गई य आगई, विउमंता सरणं ण मण्णइ ॥
- १८ सव्वे सयकम्मकप्पिया, अवियत्तेण दुहेण पाणिणो ।
हिंडंति भयाउला सदा, जाई-जरा-मरणेहिऽभिदुया ॥
- १९ इणमेव खणं वियाणिया, णो सुलभं बोहिं च आहियं ।
एवं सहिएऽहिपासए, आह जिणो इणमेव सेसगा ॥
- २० अभविंसु पुरा वि भिक्खुवो, आएसा वि भवंति सुव्वया ।
एयाइं गुणाइं आहु ते, कासवस्स अणुधम्मचारिणो ॥
- २१ तिविहेण वि पाण मा हणे, आयहिए अणियाण संवुडे ।
एवं सिद्धा अणंतगा, संपइ जे य अणागयाऽवरे ॥
- २२ एवं से उदाहु अणुत्तरणाणी अणुत्तरदंसी अणुत्तरणाणदंसणधरे ।
अरहा णायपुत्ते भगवं वेसालिए वियाहिए ॥ त्ति बेमि ॥

॥ तइओ उद्देसो समत्तो ॥

॥ बीअं उज्झयणं समत्तं ॥

तइअं अज्झयणं

उवसग्ग परिण्णा

पढमो उद्देशो

- १ सूरं मण्णइ अप्पाणं, जाव जेयं ण पस्सइ ।
जुज्झंतं दढधम्मणं, सिसुपालो व महारहं ॥
- २ पयाया सूरा रणसीसे, संगामम्मि उवट्टिए ।
माया पुत्तं ण याणाइ, जेएण परिविच्छए ॥
- ३ एवं सेहे वि अप्पुट्ठे, भिक्खायरिया अकोविए ।
सूरं मण्णति अप्पाणं, जाव लूहं ण सेवइ ॥
- ४ जया हेमंतमासम्मि, सीयं फुसइ सवायगं ।
तत्थ मंदा विसीयंति, रज्जहीणा व खत्तिया ॥
- ५ पुट्ठे गिम्हाभितावेणं, विमणे सुप्पिवासिए ।
तत्थ मंदा विसीयंति, मच्छा अप्पोदए जहा ॥
- ६ सया दत्तेसणा दुक्खं, जायणा दुप्पणोल्लिया ।
कम्मत्ता दुब्भगा चेव, इच्चाहंसु पुट्ठो जणा ॥
- ७ एते सद्दे अचायंता, गामेसु णगरेसु वा ।
तत्थ मंदा विसीयंति, संगामंसि व भीरुणो ॥
- ८ अप्पेगे खुधियं भिक्खुं, सुणी दंसइ लूसए ।
तत्थ मंदा विसीयंति, तेजपुट्ठा व पाणिणो ॥
- ९ अप्पेगे पडिभासंति, पडिपंथियमागया ।
पडियारगया एते, जे एते एवं जीविणो ॥
- १० अप्पगे वइं जुजंति, णगिणा पिंडोलगाऽहमा ।
मुंडा कंडूविणट्ठंगा, उज्जल्ला असमाहिया ॥
- ११ एवं विप्पडिवण्णेगे, अप्पणा उ अजाणया ।
तमाओ ते तमं जंति, मंदा मोहेण पाउडा ॥
- १२ पुट्ठो य दंस-मसएहिं, तणफासमचाइया ।

ण मे दिट्ठे परे लोए, जइ परं मरणं सिया ॥

१३ संतत्ता केसलोएणं, बंभचेरपराजिया ।
तत्थ मंदा विसीयंति, मच्छा विट्ठा व केयणे ॥

१४ आयदंडसमायारा, मिच्छासंठियभावणा ।
हरिसप्पओसमावण्णा, केई लूसंतिऽणारिया ॥

१५ अप्पेगे पलियंतंसि, चारो चोरो त्ति सुव्वयं ।
बंधंति भिक्खुयं बाला, कसायवयणेहि य ॥

१६ तत्थ दंडेण संवीते, मुट्ठिणा अदु फलेण वा ।
णार्इणं सरइ बाले, इत्थी वा कुद्धगामिणी ॥

१७ एते भो कसिणा फासा, फरुसा दुरहियासया ।
हत्थी वा सरसंवीता, कीवाऽवसा गया गिहं ॥ त्ति बेमि ॥

॥ पढमं उद्देसो समत्तो ॥

बीओ उद्देसो

१ अहिमे सुहुमा संग्गा, भिक्खूणं जे दुरुत्तरा ।
जत्थ एगे विसीयंति, ण चयंति जवित्तए ॥

२ अप्पेगे णायओ दिस्स, रोयंति परिवारिया ।
पोस णे तात पुट्ठोऽसि, कस्स तात जहासि णे ॥

३ पिया ते थेरओ तात ! ससा ते खुइडिया इमा ।
भायरो ते सगा तात ! सोयरा किं जहासि णे ॥

४ मायरं पियरं पोस, एवं लोगो भविस्सइ ।
एयं खु लोइयं तात ! जे पोसे पिउ-मायरं ॥

५ उत्तरा महरुल्लावा, पुत्ता ते तात ! खुइडगा ।
भारिया ते णवा तात ! मा सा अण्णं जणं गमे ॥

६ एहि तात घरं जामो, मा तं कम्ममे सहा वयं ।
बीयं पि तात पासामो, जामु ताव सयं गिहं ॥

७ गंतुं तात ! पुणाऽऽगच्छे ण तेणऽसमणो सिया ।
अकामगं परक्कमंतं, को ते वारेउमरिहइ ॥

- ८ जं किंचि अणगं तात ! तं पि सव्वं समीकयं ।
हिरण्णं ववहाराई, तं पि दाहामु ते वयं ॥
- ९ इच्चेव णं सुसेहंति, कालुणिय समुद्धिया
विबद्धो णाइसंगेहिं, ततोऽगारं पहावइ ॥
- १० जहा रुक्खं वणे जायं, मालुया पडिबंधइ ।
एवं णं पडिबंधंति, णायओ असमाहिणा ॥
- ११ विबद्धो णाइसंगेहिं, हत्थी वा वि णवग्गहे ।
पिड्डओ परिसप्पंति, सूईगो व्व अदूरगा ॥
- १२ एते संग्गा मणुस्साणं, पायाला व अतारिमा ।
कीवा जत्थ य कीसंति, णाइसंगेहिं मुच्छिया ॥
- १३ तं च भिक्खु परिण्णाय, सव्वे संग्गा महासवा ।
जीवियं णाभिकंखेज्जा, सोच्चा धम्ममणुत्तरं ॥
- १४ अहिमे संति आवट्ठा, कासवेण पवेइया ।
बुद्धा जत्थावसप्पंति, सीयंति अबुहा जहिं ॥
- १५ रायाणो रायमच्चा य, माहणा अदुव खत्तिया ।
णिमंतयंति भोगेहिं, भिक्खुयं साहुजीविणं ॥
- १६ हत्थऽस्स-रह-जाणेहिं, विहारगमणेहि य ।
भुंज भोगे इमे सग्घे, महरिसी पूजयामु तं ॥
- १७ वत्थगंधमलंकारं, इत्थीओ सयणाणि य ।
भुंजाहिमाइं भोगाइं, आउसो पूजयामु तं ॥
- १८ जो तुमे णियमो चिण्णो, भिक्खुभावम्मि सुव्वया ।
अगारमावसंतस्स, सव्वो संविज्जए तहा ॥
- १९ चिरं दूइज्जमाणस्स, दोसो दाणिं कुओ तव ?
इच्चेव णं णिमंतंति, णीवारेण व सूयरं ॥
- २० चोइया भिक्खायरियाए, अचयंता जवित्तए ।
तत्थ मंदा विसीयंति, उज्जाणंसि व दुब्बला ॥
- २१ अचयंता व लूहेण, उवहाणेण तज्जिया ।
तत्थ मंदा विसीयंति, पंकंसि व जरग्गवा ॥

- २२ एवं णिमंतणं लद्धं, मुच्छिया गिद्ध इत्थीसु ।
अज्झोववण्णा कामेहिं, चोइज्जंता गया गिहं ॥ त्ति बेमि ॥
॥ बीओ उद्देसो समत्तो ॥

तइओ उद्देसो

- १ जहा संगामकालम्मि, पिट्ठओ भीरु पेहइ ।
वलयं गहणं णूमं, को जाणेइ पराजयं ? ॥
- २ मुहुत्ताणं मुहुत्तस्स, मुहुत्तो होइ तारिसो ।
पराजियाऽवसप्पामो, इति भीरु उवेहइ ॥
- ३ ३रु एवं तु समणा एगे, अबलं णच्चाण अप्पगं ।
अणागयं भयं दिस्स, अवकप्पंतिमं सुयं ॥
- ४ को जाणइ विओवायं, इत्थीओ उदगाओ वा ।
चोइज्जंता पवक्खामो, ण णे अत्थि पक्कपियं ॥
- ५ इच्चेवं पडिलेहंति, वलयाइ पडिलेहिणो ।
वित्तिगिच्छ समावण्णा, पंथाणं व अकोविया ॥
- ६ जे उ संगामकालम्मि, णाया सूरपुरंगमा ।
ण ते पिट्ठमुवेहिंति, किं परं मरणं सिया ॥
- ७ एवं समुट्ठिए भिक्खू, वोसिज्जाऽगारबंधणं ।
आरंभं तिरियं कट्ठु, अत्तत्ताए परिव्वए ॥
- ८ तमेगे परिभासंति, भिक्खुयं साहुजीविणं ।
जे एवं परिभासंति, अंतए ते समाहिए ॥
- ९ संबद्धसमकप्पा हु, अण्णमण्णेसु मुच्छिया ।
पिंडवायं गिलाणस्स, जं सारेह दलाह य ॥
- १० एवं तुब्भे सरागत्था, अण्णमण्णमणुव्वसा ।
णट्ठसप्पहसब्भावा, संसारस्स अपारगा ॥
- ११ अह ते परिभासेज्जा, भिक्खू मोक्खविसारए ।
एवं तुब्भे पभासेंता, दुपक्खं चेव सेवहा ॥
- १२ तुब्भे भुंजह पाएसु, गिलाणाऽभिहडं ति य ।
तं च बीओदगं भोच्चा, तमुद्देसादि जं कडं ॥

- १३ लिक्ता तिक्वाभितावेण, उज्झिया असमाहिया ।
णाइकंडूइयं सेयं, अरुयस्सावरज्झइ ॥
- १४ तत्तेण अणुसिद्धा ते, अपडिण्णेण जाणया ।
ण एस णियए मग्गे, असमिक्खा वई किई ॥
- १५ एरिसा जा वई एसा, अग्गवेणुव्व करिसिया ।
गिहिणो अभिहडं सेयं, भुंजितं ण उ भिक्खुणो ॥
- १६ धम्मपण्णवणा जा सा, सारंभाण विसोहिया ।
ण उ एयाहिं दिट्ठीहिं, पुव्वमासि पग्गप्पियं ॥
- १७ सव्वाहिं अणुजुत्तीहिं, अचयंता जवित्तए ।
तओ वायं णिराकिच्चा, ते भुज्जो वि पगब्भिया ॥
- १८ रागदोसाभिभूयप्पा, मिच्छत्तेण अभिदुया ।
अक्कोसे सरणं जंति, टंकणा इव पव्वयं ॥
- १९ बहुगुणप्पगप्पाइं, कुज्जा अत्तसमाहिए ।
जेणऽण्णे ण विरुज्झेज्जा, तेण तं तं समायरे ॥
- २० इमं च धम्ममादाय, कासवेण पवेइयं ।
कुज्जा भिक्खू गिलाणस्स, अगिलाए समाहिए ॥
- २१ संखाय पेसलं धम्मं, दिट्ठिमं परिणिव्वुडे ।
उवसग्गे णियामित्ता, आमोक्खाए परिव्वएज्जासि ॥ त्ति बेमि ॥

॥ तइओ उद्देसो समत्तो ॥

चउत्थो उद्देसो

- १ आहंसु महापुरिसा, पुव्विं तत्त तवोधणा ।
उदएण सिद्धिमावण्णा, तत्थ मंदे विसीयइ ॥
- २ अभुंजिया णमी वेदेही, रामगुत्ते य भुंजिया ।
बाहुए उदगं भोच्चा, तहा णारायणे रिसी ॥
- ३ आसिले देविले चेव, दीवायण महारिसी ।
पारासरे दगं भोच्चा, बीयाणि हरियाणि य ॥
- ४ एते पुव्विं महापुरिसा, आहिया इह सम्मया ।
भोच्चा बीओदगं सिद्धा, इति मेयमणुस्सुयं ॥

- ५ तत्थ मंदा विसीयंति, वाहछिण्णा व गद्धभा ।
पिड्डओ परिसप्पंति, पीढसप्पी व संभमे ॥
- ६ इहमेगे उ भासंति, सायं सायेण विज्जइ ।
जे तत्थ आरियं मग्गं, परमं च समाहियं ॥
- ७ मा एयं अवमण्णंता, अप्पेणं लुम्पहा बहुं ।
एयस्स अमोक्खाए, अयोहारिव्व जूरह ॥
- ८ पाणाइवाए वट्ठंता, मुसावाए असंजया ।
अदिण्णादाणे वट्ठंता, मेहुणे य परिग्गहे ॥
- ९ एवमेगे उ पासत्था, पण्णवेति अणारिया ।
इत्थीवसं गया बाला, जिणसासणपरम्मुहा ॥
- १० जहा गंडं पिलागं वा, परिपीलेज्ज मुहुत्तगं ।
एवं विण्णवणित्थीसु, दोसो तत्थ कुओ सिया ॥
- ११ जहा मंधादए णाम, थिमियं भुंजइ दगं ।
एवं विण्णवणित्थीसु, दोसो तत्थ कुओ सिया ॥
- १२ जहा विहंगमा पिंगा, थिमियं भुंजइ दगं ।
एवं विण्णवणित्थीसु, दोसो तत्थ कुओ सिया ? ॥
- १३ एवमेगे उ पासत्था, मिच्छादिट्ठी अणारिया ।
अज्झोववण्णा कामेहिं, पूयणा इव तरुणए ॥
- १४ अणागयमपस्संता, पच्चुप्पण्णगवेसगा ।
ते पच्छा परितप्पंति, खीणे आउम्मि जोव्वणे ॥
- १५ जेहिं काले परक्कंतं, ण पच्छा परितप्पए ।
ते धीरा बंधणुमुक्का, णावकंखंति जीवियं ॥
- १६ जहा णई वेयरणी, दुत्तरा इह सम्मया ।
एवं लोगंसि णारिओ, दुत्तरा अमईमया ॥
- १७ जेहिं णारीण संजोगा, पूयणा पिड्डओ कया ।
सव्वमेयं णिराकिच्चा, ते ठिया सुसमाहिए ॥
- १८ एते ओघं तरिस्संति, समुद्धं व ववहारिणो ।
जत्थ पाणा विसण्णासी, किच्चंति सयकम्मुणा ॥

- १९ तं च भिक्खू परिण्णाय, सुव्वए समिए चरे ।
मुसावायं विवज्जेज्जा अदिण्णादाणं च वोसिरे ॥
- २० उड्ढमहे तिरियं वा, जे केई तस थावरा ।
सव्वत्थ विरइं कुज्जा, संति णिव्वाणमाहियं ॥
- २१ इमं च धम्ममादाय, कासवेण पवेइयं ।
कुज्जा भिक्खू गिलाणस्स, अगिलाए समाहिए ॥
- २२ संखाय पेसलं धम्मं, दिट्ठिमं परिणिव्वुडे ।
उवसग्गे णियामित्ता, आमोक्खाए परिव्वएज्जासि ॥ त्ति बेमि ॥

॥ चउत्थो उद्देसो समत्तो ॥

॥ तइयं उज्झयणं समत्तं ॥

चउत्थं अज्झयणं

इत्थि परिण्णा

पढमो उद्देसो

- १ जे मायरं च पियरं च, विप्पजहाय पुव्वसंजोगं ।
एगे सहिए चरिस्सामि, आरयमेहुणे विवित्तेसु ॥
- २ सुहुमेण तं परक्कम्म, छण्णपएण इत्थिओ मंदा ।
उवायं पि ताओ जाणंति, जह लिस्संति भिक्खुणो एगे ॥
- ३ पासे भिसं णिसीयंति, अभिक्खणं पोसवत्थं परिहंति ।
कायं अहे वि दंसंति, बाहुमुद्धट्टु कक्खमणुवज्जे ॥
- ४ सयणासणेहिं जोगेहिं, इत्थीओ एगया णिमंतंति ।
एयाणि चेव से जाणे, पासाणि विरूवरूवाणि ॥
- ५ णो तासु चक्खु संधेज्जा, णो वि य साहसं समभिजाणे ।
णो सहियं पि विहरेज्जा, एवमप्पा सुरक्खिओ होइ ॥
- ६ आमंतिय ओसवियं वा, भिक्खुं आयसा णिमंतंति ।
एयाणि चेव से जाणे, सद्दाणि विरूवरूवाणि ॥

- ७ मणबंधणेहिं णेगेहिं, कलुणविणीयमुवगसित्ताणं ।
अदु मंजुलाइं भासंति, आणवयंति भिण्णकहाहिं ॥
- ८ सीहं जहा व कुणिमेणं, णिब्भयमेगचरं ति पासेणं ।
एवित्थिया उ बंधंति, संवुडं एगइयमणगारं ॥
- ९ अह तत्थ पुणो णमयंति, रहकारो व णेमिं आणुपुव्वीए ।
बद्धे मिए व पासेणं, फंदंते वि ण मुच्चइ ताहे ॥
- १० अह सेऽणुतप्पइ पच्छा, भोच्चा पायसं व विसमिस्सं ।
एवं विवेगमायाए, संवासो ण विकप्पइ दविए ॥
- ११ तम्हा उ वज्जए इत्थी, विसलित्तं व कंटगं णच्चा ।
ओए कुलाणि वसवत्ती, आघाए ण से वि णिग्गंथे ॥
- १२ जे एयं उंछं अणुगिद्धा, अण्णयरा हु ते कुसीलाणं ।
सुतवस्सिए वि से भिक्खू, णो विहरे सह णमित्थीसु ॥
- १३ अवि धूयराहिं सुण्हाहिं, धाईहिं अदुव दासीहिं ।
महतीहिं वा कुमारीहिं, संथवं से ण कुज्जा अणगारे ॥
- १४ अदु णाइणं व सुहिणं वा, अप्पियं दट्ठुं एगया होइ ।
गिद्धा सत्ता कामेहिं, रक्खण पोसणे मणुस्सोऽसि ॥
- १५ समणं पि दट्ठुदासीणं, तत्थ वि ताव एगे कुप्पंति ।
अदुवा भोयणेहिं णत्थेहिं, इत्थीदोसं संकिणो होंति ॥
- १६ कुक्कंति संथवं ताहिं, पब्भट्ठा समाहिजोगेहिं ।
तम्हा समणा ण समेंति, आयहियाए सण्णिसेज्जाओ ॥
- १७ बहवे गिहाइं अवहट्ठु, मिस्सीभावं पत्थुया एगे ।
धुवमग्गमेव पवयंति, वायावीरियं कुसीलाणं ॥
- १८ सुद्धं रवइ परिसाए, अह रहस्सम्मि दुक्कडं करेइ ।
जाणंति य णं तहाविउ, माइल्ले महासट्ठेऽयं ति ॥
- १९ सयं दुक्कडं च ण वयइ, आइट्ठो वि पक्कथइ बाले ।
वेयाणुवीइ मा कासी, चोइज्जंतो गिलाइ से भुज्जो ॥
- २० उसिया वि इत्थिपोसेसु, पुरिसा इत्थिवेयखेयण्णा ।
पण्णासमणिया वेगे, णारीणं वसं उवकसंति ॥
- २१ अवि हत्थपायछेदाए, अदुवा वद्धमंस उक्कंते ।

अवि तेयसाऽभितावणाइं, तच्छिय खारसिंचणाइं च ॥

- २२ अदु कण्ण-णासियाछेज्जं, कंठच्छेयणं तितिकखंति ।
इति एत्थ पावसंतत्ता, ण य बैति पुणो ण काहिति ॥
- २३ सुयमेयमेवमेगेसिं, इत्थीवेदे वि हु सुअक्खायं ।
एवं पि ता वदित्ताणं, अदुवा कम्ममुणा अवकरैति ॥
- २४ अण्णं मणेण चिंतैति, अण्णं वायाइ कम्ममुणा अण्णं ।
तम्हा ण सद्दहे भिक्खू, बहुमायाओ इत्थिओ णच्चा ॥
- २५ जुवती समणं बूया, विचित्तलंकारवत्थगाणि परिहेत्ता ।
विरया चरिस्स हं लूहं, धम्ममाइक्ख णे भयंतारो ॥
- २६ अदु साविया पवाएणं, अहमंसि साहम्मिणी समणाणं ।
जउकुम्भे जहा उवज्जोई, संवासे विऊ विसीएज्जा ॥
- २७ जउकुम्भे जोइमुवगूढे, आसुभितत्ते णासमुवयाइ ।
एवित्थियाहिं अणगारा, संवासेण णासमुवयंति ॥
- २८ कुव्वंति पावगं कम्मं, पुट्ठा वेगे एवमाहंसु ।
णोहं करेमि पावं ति, अंकेसाइणी ममेस त्ति ॥
- २९ बालस्स मंदयं बीयं, जं च कडं अवजाणइ भुज्जो ।
दुगुणं करेइ से पावं, पूयणकामो विसण्णेसी ॥
- ३० संलोकणिज्जमणगारं, आयगयं णिमंतणेणाऽऽहंसु ।
वत्थं व ताइ ! पायं वा, अण्णं पाणगं पडिग्गाहे ॥
- ३१ णीवारमेयं बुज्झेज्जा, णो इच्छे अगारमागतुं ।
बद्धे विसयपासेहिं, मोहमावज्जइ पुणो मंदे ॥ त्ति बेमि ॥

॥ पढमो उद्देशो समत्तो ॥

बीओ उद्देशो

- १ ओए सया ण रज्जेज्जा, भोगकामी पुणो विरज्जेज्जा ।
भोगे समणाणं सुणेह, जह भुंजंति भिक्खुणो एगे ॥
- २ अह तं तु भेदमावण्णं, मुच्छियं भिक्खुं काममइवट्ठं ।
पलिभिंदियाण तो पच्छा, पादुद्धट्ठ मुद्धिं पहणंति ॥

- ३ जइ केसियाए मए भिक्खू, णो विहरे सह णमित्थीए ।
केसाणि वि हं लुंचिस्सं, णण्णत्थ मए चरिज्जासि ॥
- ४ अह णं से होइ उवलद्धो, तो पेसंति तहाभूएहिं ।
अलाउच्छेदं पेहेहि, वग्गुफलाइं आहराहि त्ति ॥
- ५ दारुणि सागपागाए, पज्जोओ वा भविस्सइ राओ ।
पायाणि य मे रयावेहि, एहि य ता मे पडिं उम्मद्दे ॥
- ६ वत्थाणि य मे पडिलेहेहि, अण्णपाणं च आहराहि त्ति ।
गंधं च रओहरणं च, कासवगं च समणुजाणाहि ॥
- ७ अदु अंजणिं अलंकारं, कुक्कययं च मे पयच्छाहि ।
लोद्धं च लोद्धकुसुमं च, वेणुपलासियं च गुलियं च ॥
- ८ कुट्ठं अगरुं तगरुं च, संपिडुं समं उसीरेण ।
तेल्लं मुहं भिलिंजाए, वेणुफलाइं सण्णिहाणाए ॥
- ९ णंदिचुण्णगाइं पाहराहि, छत्तोवाहणं च जाणाहि ।
सत्थं च सूवच्छेयाए, आणीलं च वत्थयं रयावेहि ॥
- १० सुफणिं च सागपागाए, आमलगाइं दगाहरणं च ।
तिलगकरणिमंजणसलागं, घिसु मे विहूणयं विजाणाहि ॥
- ११ संडासगं च फणिहं च, सीहलिपासगं च आणाहि ।
आयंसगं पयच्छाहि, दंतपक्खालणं पवेसाहि ॥
- १२ पूयफलं तंबोलं च, सूईसुत्तगं च जाणाहि ।
कोसं च मोयमेहाए, सुप्पुक्खलगं च खारगालणं च ॥
- १३ चंदालगं च करगं च, वच्चघरगं च आउसो ! खणाहि ।
सरपायगं च जायाए, गोरहगं च सामणेराए ॥
- १४ घडिगं च सडिंडिमयं च, चेलगोलं कुमारभूयाए ।
वासं समभियावण्णं, आवसहं च जाण भत्तं च ॥
- १५ आसंदियं च णवसुत्तं, पाउल्लाइं संकमद्वाए ।
अदु पुत्तदोहलद्वाए, आणप्पा हवंति दासा वा ॥
- १६ जाए फले समुप्पण्णे, गेण्हसु वा णं अहवा जहाहि ।
अह पुत्तपोसिणो एगे, भारवहा हवंति उट्ठा वा ॥

- १७ राओ वि उठिया संता, दारगं संठवेंति धाई वा ।
सुहिरीमणा वि ते संता, वत्थधुवा हवंति हंसा वा ॥
- १८ एवं बहुहिं कयपुव्वं, भोगत्थाए जेऽभियावण्णा ।
दासे मिए व पेस्से वा, पसुभूए वा से ण वा केइ ॥
- १९ एयं खु तासु विण्णप्पं, संथवं संवासं च वज्जेज्जा ।
तज्जाइया इमे कामा, वज्जकरा य एवमक्खाया ॥
- २० एवं भयं ण सेयाए, इति से अप्पगं णिरुंभित्ता ।
णो इत्थिं णो पसुं भिक्खू, णो सयंपाणिणा णिलिज्जेज्जा ॥
- २१ सुविसुद्धलेस्से मेहावी, परकिरियं च वज्जए णाणी ।
मणसा वयसा कायेणं, सव्वफाससहे अणगारे ॥
- २२ इच्चेवमाहु से वीरे, धुयरए धुयमोहे से भिक्खू ।
तम्हा अज्झत्थविसुद्धे, सुविमुक्के आमोक्खाए परिव्वएज्जासि ॥
-त्ति बेमि ॥

॥ बीओ उद्देसो समत्तो ॥

॥ चउत्थं अज्झयणं समत्तं ॥

पंचमं अज्झयणं

णरय विभति

पढमो उद्देसो

- १ पुच्छिंसु हं केवलियं महेसिं, कहंऽभितावा णरगा पुरत्था ।
अजाणओ मे मुणि बूहि जाणं, कहं णु बाला णरगं उवेंति ॥
- २ एवं मए पुट्ठे महाणुभागे, इणमब्बवी कासवे आसुपण्णे ।
पवेदइस्सं दुहमड्डुग्गं, आदीणियं दुक्कडियं पुरत्था ॥
- ३ जे केइ बाला इह जीवियद्दी, पावाइं कम्माइं करेंति रुद्धा ।
ते घोररुवे तिमिसंधयारे, तिच्चाभितावे णरए पडंति ॥
- ४ तिच्चं तसे पाणिणो थावरे य, जे हिंसइ आयसुहं पडुच्च ।

जे लूसए होइ अदत्तहारी, ण सिक्खइ सेयवियस्स किंचि ॥

५ पागब्भि पाणे बहुणं तिवाई, अणिव्वुडे घायमुवेइ बाले ।
णिहो णिसं गच्छइ अंतकाले, अहो सिरं कट्ठु उवेइ दुग्गं ॥

६ हण छिंदह भिंदह णं दहेह, सद्धे सुणेत्ता परहम्मियाणं ।
ते णारगा ऊ भयभिण्णसण्णा, कंखंति कं णाम दिसं वयामो ॥

७ इंगालरासिं जलियं सजोइं, तत्तोवमं भूमिं अणुक्कमंता ।
ते डज्झमाणा कलुणं थणंति, अरहस्सरा तत्थ चिरद्विइया ॥

८ जइ ते सुया वेयरणीऽभिदुग्गा, णिसिओ जहा खुर इव तिक्खसोया
तरंति ते वेयरणिं भिदुग्गं, उसुचोइया सत्तिस्सु हम्ममाणा ॥

९ कीलेहिं विज्झंति असाहुकम्मा, णावं उवेंते सइविप्पहूणा ।
अण्णे तु सूलाहिं, तिसूलियाहिं, दीहाहिं विद्धूण अहे करेंति ॥

१० केसिं च बंधित्तु गले सिलाओ, उदगंसि बोलेति महालयंसि ।
कलंबुयावालय मुम्मुरे य, लोलेति पच्चंति य तत्थ अण्णे ॥

११ असूरियं णाम महाभितावं, अंधंतमं दुप्पतरं महंतं ।
उड्ढं अहे य तिरियं दिसासु, समाहिओ जत्थऽगणी झियाइ ॥

१२ जंसि गुहाए जलणेऽतियट्ठे, अजाणओ डज्झइ लुत्तपण्णे ।
सया य कलुणं पुण घम्मठाणं, गाढोवणीयं अइदुक्खधम्मं ॥

१३ चत्तारि अगणीओ सभारभित्ता, जहिं कूरकम्माऽभितवेंति बालं ।
ते तत्थ चिट्ठंतऽभितप्पमाणा, मच्छा व जीवंतुवजोइपत्ता ॥

१४ संतच्छणं णाम महाभितावं, ते णारगा जत्थ असाहुकम्मा ।
हत्थेहि पाएहि य बंधिऊणं, फलगं व तच्छंति कुहाडहत्था ॥

१५ रुहिरे पुणो वच्चसमुस्सियंगे, भिण्णुत्तमंगे परियत्तयंता ।
पयंति णं णेरइए फुरंते, सजीवमच्छे व अयोक्कवल्ले ॥

१६ णो चेव ते तत्थ मसीभवंति, ण मिज्जइ तिव्वभिवेयणाए ।
तमाणुभागं अणुवेदयंता, दुक्खंति दुक्खी इह दुक्कडेणं ॥

१७ तहिं च ते लोलणसंपगाढे, गाढं सुतत्तं अगणिं वयंति ।
ण तत्थ सायं लहइऽभिदुग्गे, अरहियाभितावा तहवि तवेंति ॥

- १८ से सुच्चइ णगरवहे व सद्धे, दुहोवणीयाणि पयाणि तत्थ ।
उदिण्णकम्माण उदिण्णकम्मा, पुणो पुणो ते सरहं दुहेंति ॥
- १९ पाणेहि णं पाव विओजयंति, तं भे पवक्खामि जहातहेणं ।
दंडेहिं तत्था सरयंति बाला, सव्वेहिं दंडेहिं पुराकएहिं ॥
- २० ते हम्ममाणा णरण पडंति, पुण्णे दुरूवस्स महब्भितावे ।
ते तत्थ चिट्ठंति दुरूवभक्खी, तुट्ठंति कम्मोवगया किमीहिं ॥
- २१ सया कसिणं पुण घम्मठाणं, गाढोवणीयं अइदुक्खधम्मं ।
अंदूसु पक्खिप्प विहत्तु देहं, वेहेण सीसं सेऽभितावयंति ॥
- २२ छिंदंति बालस्स खुरेण णक्कं, उट्ठे वि छिंदंति दुवे वि कण्णे ।
जिब्भं विणिक्कस्स विहत्थिमेत्तं, तिकखाहिं सूलाहिं भितावयंति ॥
- २३ ते तिप्पमाणा तलसंपुडं व, राइंदियं जत्थ थणंति बाला ।
गलंति ते सोणियपूयमंसं, पज्जोइया खारपइद्धियंगा ॥
- २४ जइ ते सुया लोहियपूयपाई, बालागणीतेयगुणा परेणं ।
कुम्भी महंताहियपोरुसीया, समूसिया लोहियपूयपुण्णा ॥
- २५ पक्खिप्प तासुं पययंति बाले, अट्टस्सरं ते कलुणं रसंते ।
तण्हाइया ते तउ तंबतत्तं, पज्जिज्जमाणाऽट्टतरं रसंति ॥
- २६ अप्पेण अप्पं इह वंचइत्ता, भवाहमे पुव्वसते सहस्से ।
चिट्ठंति तत्था बहुकूरकम्मा, जहा कडे कम्म तहा सि भारे ॥
- २७ समज्जिणित्ता कलुसं अणज्जा, इट्ठेहिं कंतेहि य विप्पहूणा ।
ते दुब्भिगंधे कसिणे य फासे, कम्मोवगा कुणिमे आवसंति ॥

॥ पढमो उद्देसो समत्तो ॥

बीओ उद्देसो

- १ अहावरं सासयदुक्खधम्मं, तं भे पवक्खामि जहातहेणं ।
बाला जहा दुक्कडकम्मकारी, वेदेंति कम्माइं पुरेकडाइं ॥
- २ हत्थेहिं पाएहि य बंधिऊणं, उदरं विकत्तंति खुरासिएहिं ।
गिण्हित्तु बालस्स विहण्ण देहं, वद्धं थिरं पिट्ठओ उद्धरंति ॥

- ३ बाहू पकत्तंति य मूलओ से, थूलं वियासं मुहे आडहंति ।
रहंसि जुत्तं सरयंति बालं, आरुस्स विज्झंति तुदेण पिठे ॥
- ४ अयं व तत्तं जलियं सजोइं, तओवमं भूमिमणुक्कमंता ।
ते डज्झमाणा कलुणं थणंति, उसुचोइया तत्तजुगेसु जुत्ता ॥
- ५ बाला बला भूमिमणुक्कमंता, पविज्जलं लोहपहं व तत्तं ।
जंसीऽभिदुग्गंसि पवज्जमाणा, पेसे व दंडेहिं पुरा करेंति ॥
- ६ ते संपगाढंसि पवज्जमाणा, सिलाहिं हम्मंतिऽभिपातिणीहिं ।
संतावणी णाम चिरट्ठिईया, संतप्पइ जत्थ असाहुकम्मा ॥
- ७ कंदूसु पक्खिप्प पयंति बालं, ततो विडड्ढा पुण उप्पयंति ।
ते उड्ढकाएहिं पखज्जमाणा, अवरेहिं खज्जंति सणप्फएहिं ॥
- ८ समूसियं णाम विधूमठाणं, जं सोयतत्ता कलुणं थणंति ।
अहो सिरं कट्ठु विगत्तिऊणं, अयं व सत्थेहिं समोसवेंति ॥
- ९ समूसिया तत्थ विसूणियंगा, पक्खीहिं खज्जंति अयोमुहेहिं ।
संजीवणी णाम चिरट्ठिईया, जंसी पया हम्मइ पावचेया ॥
- १० तिक्खाहिं सूलाहिं भितावयंति, वसोगयं सावययं व लद्धं ।
ते सूलविद्धा कलुणं थणंति, एगंतदुक्खं दुहओ गिलाणा ॥
- ११ सया जलं ठाण णाम महंतं, जंसी जलंतो अगणी अकट्ठो ।
चिट्ठंति बद्धा बहुकूरकम्मा, अरहस्सरा केइ चिरट्ठिईया ॥
- १२ चिया महंतीउ समारभित्ता, छुब्भंति ते तं कलुणं रसंतं ।
आवट्ठइ तत्थ असाहुकम्मा, सप्पी जहा पडियं जोइमज्झे ॥
- १३ सया कसिणं पुण घम्मठाणं, गाढोवणीयं अइदुक्खधम्मं ।
हत्थेहिं पाएहि य बंधिऊणं, सत्तुं व दंडेहिं समारभंति ॥
- १४ भंजंति बालस्स वहेण पुट्ठी, सीसं पि भिंदंति अयोघणेहिं ।
ते भिण्णदेहा फलगं व तच्छा, तत्ताहिं आराहिं णियोजयंति ॥
- १५ अभिजुंजिया रुद्ध असाहुकम्मा उसुचोइया हत्थिवहं वहंति ।
एगं दुरुहित्तु दुए तओ वा, आरुस्स विज्झंति ककाणओ से ॥
- १६ बाला बला भूमि मणुक्कमंता, पविज्जलं कंटइलं महंतं ।

विबद्ध तप्पेहिं विवण्णचित्ते, समीरिया कोट्टवलिं करेति ॥

- १७ वेयालिए णाम महाभितावे, एगायते पव्वयमंतलिक्खे ।
हम्मंति तत्था बहुकूरकम्मा, परं सहस्साण मुहुत्तगाणं ॥
- १८ संबाहिया दुक्कडिणो थणंति, अहो य राओ परितप्पमाणा ।
एगंतकूडे णरए महंते, कूडेण तत्था विसमे हता उ ॥
- १९ भंजंति णं पुव्वमरी सरोसं, समुग्गरे ते मुसले गहेउं ।
ते भिण्णदेहा रुहिरं वमंता, ओमुद्धगा धरणितले पडंति ॥
- २० अणासिया णाम महासियाला, पागब्भिणो तत्थ सयासकोवा ।
खज्जंति तत्था बहुकूरकम्मा, अदूरया संकलियाहिं बद्धा ॥
- २१ सयाजला णाम णई भिदुग्गा, पविज्जला लोहविलीणतत्ता ।
जंसी भिदुग्गंसि पवज्जमाणा, एगायताऽणुक्कमणं करेति ॥
- २२ एयाइं फासाइं फुसंति बालं, णिरंतरं तत्थ चिरद्विईयं ।
ण हम्ममाणस्स उ होइ ताणं, एगो सयं पच्चणुहोइ दुक्खं ॥
- २३ जं जारिसं पुव्वमकासि कम्मं, तमेव आगच्छइ संपराए ।
एगंतदुक्खं भवमज्जिणित्ता, वेदंति दुक्खी तमणंतदुक्खं ॥
- २४ एयाणि सोच्चा णरगाणि धीरे, ण हिंसइ कं च णं सव्वलोए ।
एगंतदिट्ठी अपरिग्गहे उ, बुज्झिज्ज लोगस्स वसं ण गच्छे ॥
- २५ एवं तिरिक्खे मणुयासुरेसुं, चतुरंतऽणंतं तयणुव्विवागं ।
स सव्वमेयं इति वेदयित्ता कंखेज्ज कालं धुवमायरेज्जा ॥त्ति बेमि॥

॥ बीओ उद्देसो समत्तो ॥

॥ पंचमं अज्झयणं समत्तं ॥

छट्ठं अज्झयणं

महावीरत्थुई

- १ पुच्छंसु णं समणा माहणा य, अगारिणो य परित्थिया य ।

से केइ णेगंतहियं धम्ममाहु, अणेलिसं साहुसमिक्खयाए ॥

२ कहां च णाणं कहां दंसणं से, सीलं कहां णायसुयस्स आसी ।
जाणासि णं भिक्खु जहातहेणं, अहासुयं बूहि जहा णिसंतं ॥

३ खेयण्णए से कुसले महेसी, अणंतणाणी य अणंतदंसी ।
जसंसिणो चक्खुपहे ठियस्स, जाणाहि धम्मं च धिइं च पेहि ॥

४ उड्ढं अहे य तिरियं दिसासु, तसा य जे थावर जे य पाणा ।
से णिच्चणिच्चेहि समिक्ख पण्णे, दीवे व धम्मं समियं उदाहु ॥

५ से सव्वदंसी अभिभूय णाणी, णिरामगंधे धिइमं ठियप्पा ।
अणुत्तरे सव्वजगंसि विज्जं, गंधा अतीते अभए अणाऊ ॥

६ से भूइपण्णे अणिएयचारी, ओहंतरे धीरे अणंतचक्खू ।
अणुत्तरं तप्पइ सूरिए वा, वइरोयणिंदे व तमं पगासे ॥

७ अणुत्तरं धम्ममिणं जिणाणं, णेया मुणी कासवे आसुपण्णे ।
इंदे व देवाण महानुभावे, सहस्सणेया दिवि णं विसिद्धे ॥

८ से पण्णया अक्खय सागरे वा, महोदही वा वि अणंतपारे ।
अणाइले वा अकसायि मुक्के, सक्के व देवाहिवई जुइमं ॥

९ से वीरिएणं पडिपुण्णवीरिए, सुदंसणे वा णगसव्वसेद्धे ।
सुरालए वा वि मुदागरे से, विरायएऽणेगगुणोववेए ॥

१० सयं सहस्साण उ जोयणाणं, तिकंडगे पंडगवेजयंते ।
से जोयणे णवणवइ सहस्से, उड्ढुस्सिए हेद्ध सहस्समेगं ॥

११ पुट्ठे णभे चिद्धइ भूमिए ठिए, जं सूरिया अणुपरियट्ठयंति ।
से हेमवण्णे बहुणंदणे य, जंसि रइं वेदयंति महिंदा ॥

१२ से पव्वए सद्धमहप्पगासे, विरायइ कंचणमट्ठवण्णे ।
अणुत्तरे गिरिसु य पव्वदुग्गे, गिरिवरे से जलिए व भोमे ॥

१३ महीइ मज्झम्मि ठिए णगिंदे, पण्णायते सूरिय सुद्धलेस्से ।
एवं सिरीए उ स भूरिवण्णे, मणोरमे जोयइ अच्चिमाली ॥

१४ सुदंसणस्सेस जसो गिरिस्स, पवुच्चइ महतो पव्वयस्स ।
एतोवमे समणे णायपुत्ते, जाइ-जसो-दंसण-णाणसीले ॥

- १५ गिरीवरे वा णिसहायताणं, रुयगे व सेढे वलयायताणं ।
तओवमे से जगभूइपण्णे, मुणीण मज्झे तमुदाहु पण्णे ॥
- १६ अणुत्तरं धम्ममुईरइत्ता, अणुत्तरं ज्ञाणवरं झियाइ ।
सुसुक्कसुक्कं अपगंडसुक्कं, संखिंदु एगंतवदातसुक्कं ॥
- १७ अणुत्तरग्गं परमं महेसी, असेसकम्मं स विसोहइत्ता ।
सिद्धिं गइं साइमणंत पत्ते, णाणेण सीलेण य दंसणेण ॥
- १८ रुक्खेसु णाए जह सामली वा, जंसी रइं वेदयंती सुवण्णा ।
वणेसु य णंदणमाहु सेढे, णाणेण सीलेण य भूइपण्णे ॥
- १९ थणियं व सद्धान अणुत्तरे उ, चंदो व ताराण महाणुभावे ।
गंधेसु य चंदणमाहु सेढे, एवं मुणीणं अपडिण्णमाहु ॥
- २० जहा सयंभू उदहीण सेढे, णागेसु वा धरणिंदमाहु सेढे ।
खोओदए वा रसवेजयंते, तवोवहाणे मुणिवेजयंते ॥
- २१ हत्थीसु एरावणमाहु णाए, सीहो मियाणं सलिलाण गंगा ।
पक्खीसु वा गरुले वेणुदेवो, णिव्वाणवादीणिह णायपुत्ते ॥
- २२ जोहेसु णाए जह वीससेणे, पुप्फेसु वा जह अरविंदमाहु ।
खत्तीण सेढे जह दंतवक्के, इसीण सेढे तह वद्धमाणे ॥
- २३ दाणाण सेढं अभयप्पयाणं, सच्चेसु या अणवज्जं वयंति ।
तवेसु या उत्तमबंभचेरं, लोगुत्तमे समणे णायपुत्ते ॥
- २४ ठिईण सेढा लवसत्तमा वा, सभा सुहम्मा व सभाण सेढा ।
णिव्वाणसेढा जह सव्वधम्मा, ण णायपुत्ता परमत्थि णाणी ॥
- २५ पुढोवमे धुणइ विगयगेही, ण सण्णिहिं कुव्वइ आसुपण्णे ।
तरिउं समुद्धं व महाभवोघं, अभयंकरे वीरे अणंतचक्खू ॥
- २६ कोहं च माणं च तहेव मायं, लोभं चउत्थं अज्झत्थदोसा ।
एयाणि वंता अरहा महेसी, ण कुव्वइ पावं ण कारवेइ ॥
- २७ किरियाकिरियं वेणइयाणुवायं अण्णाणियाणं पडियच्च ठाणं
से सव्ववायं इति वेयइत्ता, उवट्टिए संजम दीहरायं ॥
- २८ से वारिया इत्थि सराइभत्तं, उवहाणवं दुक्खखयइयाए ।
लोगं विदित्ता आरं परं च, सव्वं पभू वारिय सव्ववारं ॥

- १ सोच्चा य धम्मं अरहंतभासियं, समाहियं अट्ठपओवसुद्धं ।
तं सद्वहंता य जणा अणाऊ, इंदा व देवाहिव आगमिस्संति ॥ त्ति बेमि ॥

सत्तमं अज्झयणं

कुसील परिभासियं

- १ पुढवी य आऊ अगणी य वाऊ, तणरुक्खबीया य तसा य पाणा ।
जे अंडया जे य जराउ पाणा, संसेयया जे रसयाभिहाणा ॥
- २ एयाइं कायाइं पवेइयाइं, एएसु जाण पडिलेह सायं ।
एएहिं कायेहि य आयदंडे, एएसु या विप्परियासुविति ॥
- ३ जाईपहं अणुपरियट्ठमाणे, तसथावरेहिं विणिघायमेइ ।
से जाइ-जाइं बहूकूरकम्मे, जं कुव्वइ मिज्जइ तेण बाले ॥
- ४ अस्सिं च लोए अदुवा परत्था, सयग्गसो वा तह अण्णहा वा ।
संसारमावण्ण परं परं ते, बंधंति वेयंति य दुण्णिगाइं ॥
- ५ जे मायरं च पियरं च हिच्चा, समणव्वए अगणिं समारभेज्जा ।
अहाहु से लोए कुसीलधम्ममे, भूयाइं जे हिंसइ आयसाते ॥
- ६ उज्जालओ पाण तिवायएज्जा, णिव्वावओ अगणिं तिवायइज्जा ।
तम्हा उ मेहावी समिक्ख धम्मं, ण पंडिए अगणिं समारभेज्जा ॥
- ७ पुढवी वि जीवा आउ वि जीवा, पाणा य संपाइम संपयंति ।
संसेइया कट्ठसमस्सिया य, एते दहे अगणिं समारभंते ॥
- ८ हरियाणि भूयाणि विलंबगाणि, आहारदेहाइं पुढो सियाइं ।
जे छिंदइ आयसुहं पडुच्च, पागब्भि पाणे बहुणं तिवाई ॥
- ९ जाइं च वुड्ढिं च विणासयंते, बीयाइ अस्संजय आयदंडे ।
अहाहु से लोए अणज्जधम्ममे, बीयाइ जे हिंसइ आयसाते ॥
- १० गब्भाइ मिज्जंति बुयाऽबुयाणा, णरा परे पंचसिहा कुमारा ।
जुवाणगा मज्झिम थेरगा य, चयंति ते आउक्खए पलीणा ॥
- ११ संबुज्झहा जंतवो माणुसत्तं, दट्ठुं भयं बालिसेणं अलंभो ।
एगंतदुक्खे जरिए व लोए, सकम्मुणा विप्परियासुवेइ ॥

- १२ इहेगे मूढा पवयंति मोक्खं, आहारसंपज्जणवज्जणेणं ।
एगे य सीओदगसेवणेणं, हुएण एगे पवयंति मोक्खं ॥
- १३ पाओसिणाणादिसु णत्थि मोक्खो, खारस्स लोणस्स अणासएणं ।
ते मज्ज मंसं लसुणं च भोच्चा, अण्णत्थ वासं परिकप्पयंति ॥
- १४ उदगेण जे सिद्धिमुदाहरंति, सायं च पायं उदगं फुसंता ।
उदगस्स फासेण सिया य सिद्धि, सिज्झिंसु पाणा बहवे दगंसि ॥
- १५ मच्छा य कुम्मा य सिरीसिवा य, मग्गू य उद्धा दगरक्खसा य ।
अट्ठाणमेयं कुसला वयंति, उदगेण जे सिद्धिमुदाहरंति ॥
- १६ उदगं जई कम्ममलं हरेज्जा, एवं सुहं इच्छामेत्तमेव ।
अंधं व णेयारमणुस्सरित्ता, पाणाणि चेवं विणिहंति मंदा ॥
- १७ पावाइं कम्माइं पकुव्वओ हि, सीओदगं तु जइ तं हरेज्जा ।
सिज्झिंसु एगे दगसत्तघाती, मुसं वयंते जलसिद्धिमाहु ॥
- १८ हुतेण जे सिद्धिमुदाहरंति, सायं च पायं अगणिं फुसंता ।
एवं सिया सिद्धि हवेज्ज तम्हा, अगणिं फुसंताण कुकम्मिणं पि ॥
- १९ अपरिक्ख दिट्ठं ण हु एव सिद्धी, एहिंति ते घायमबुज्झमाणा ।
भूएहिं जाण पडिलेह सायं, विज्जं गहाय तस थावरेहिं ॥
- २० थणंति लुप्पंति तसंति कम्मी, पुढो जगा परिसंखाय भिक्खू ।
तम्हा विऊ विरए आयगुत्ते, दट्ठुं तसे य पडिसाहरेज्जा ॥
- २१ जे धम्मलद्धं विणिहाय भुंजे, वियडेण साहट्ठु य जे सिणाइ ।
जे धोवइ लूसयइ व वत्थं, अहाहु से णागणियस्स दूरे ॥
- २२ कम्मं परिण्णाय दगंसि धीरे, वियडेण जीवेज्ज य आदिमोक्खं
से बीय-कंदाई अभुंजमाणे, विरए सिणाणादिसु इत्थियासु ॥
- २३ जे मायरं पियरं च हिच्चा, गारं तहा पुत्त पसुं धणं च ।
कुलाइं जे धावइ साउगाइं, अहाहु से सामणियस्स दूरे ॥
- २४ कुलाइं जे धावइ साउगाइं, आघाइ धम्मं उदराणुगिद्धे ।
अहाहु से आयरियाण सयंसे, जे लावएज्जा असणस्स हेउं ॥
- २५ णिक्खम्म दीणे परभोयणम्मि, मुहमंगलीए उदराणुगिद्धे ।
णीवारगिद्धे व महावराहे, अदूरए एहिइ घायमेव ॥

- २६ अण्णस्स पाणस्सिहलोइयस्स, अणुप्पियं भासइ सेवमाणे ।
पासत्थयं चेव कुसीलयं च, णिस्सारिए होइ जहा पुलाए ॥
- २७ अण्णायपिंडेणऽहियासएज्जा, णो पूयणं तवसा आवहेज्जा ।
सद्धेहिं रूवेहिं असज्जमाणे, सव्वेहिं कामेहिं विणीय गेहिं ॥
- २८ सव्वाइं संगाइं अइच्च धीरे, सव्वाइं दुक्खाइं तितिक्खमाणे ।
अखिले अगिद्धे अणिएयचारी, अभयंकरे भिक्खू अणाविलप्पा ॥
- २९ भारस्स जाता मुणि भुंजएज्जा, कंखेज्ज पावस्स विवेग भिक्खू
दुक्खेण पुढे धुयमाइएज्जा, संगामसीसे व परं दमेज्जा ॥
- ३० अवि हम्ममाणे फलगावतट्ठी, समागमं कंखइ अंतगस्स ।
णिद्धूय कम्मं ण पवंचुवेइ, अक्खक्खए वा सगडं ॥ ति बेमि ॥
- ॥ सत्तमं उज्झयणं समत्तं ॥

अट्ठमं अज्झयणं

वीरियं

- १ दुहा चेयं सुयक्खायं, वीरियं ति पवुच्चइ ।
किं णु वीरस्स वीरत्तं, केण वीरो त्ति वुच्चइ ॥
- २ कम्ममेगे पवेदेंति, अकम्मं वा वि सुव्वया ।
एएहिं दोहिं ठाणेहिं, जेहिं दिस्संति मच्चिया ॥
- ३ पमायं कम्ममाहंसु, अप्पमायं तहाऽवरं ।
तब्भावादेसओ वा वि, बालं पंडियमेव वा ॥
- ४ सत्थमेगे सुसिक्खंति, अइवायाय पाणिणं ।
एगे मंते अहिज्जंति, पाणभूयविहेडिणो ॥
- ५ माइणो कट्ठु मायाओ, कामभोगे समारभे ।
हंता छेत्ता पकत्तित्ता, आयसायाणुगामिणो ॥
- ६ मणसा वयसा चेव, कायसा चेव अंतसो ।
आरओ परओ यावि, दुहा वि य असंजया ॥
- ७ वेराइं कुव्वइ वेरी, तओ वेरेहिं रज्जइ ।

पावोवगा य आरंभा, दुक्खफासा य अंतसो ॥

- ८ संपरायं णियच्छंति, अत्तदुक्कडकारिणो ।
राग दोसस्सिया बाला, पावं कुव्वंति ते बहुं ॥
- ९ एयं सकम्मवीरियं, बालाणं तु पवेइयं ।
एत्तो अकम्मवीरियं पंडियाणं सुणेह मे ॥
- १० दविए बंधणुम्मक्के, सव्वओ छिण्णबंधणे ।
पणोल्ल पावगं कम्मं, सल्लं कंतइ अंतसो ॥
- ११ णेयाउयं सुयक्खायं, उवादाय समीहए ।
भुज्जो भुज्जो दुहावासं, असुहत्तं तहा तहा ॥
- १२ ठाणी विविहठाणाणि, चइस्संति ण संसओ ।
अणियते अयं वासे, णायएहिं सुहीहि य ॥
- १३ एवमादाय मेहावी, अप्पणो गिद्धिमुद्धरे ।
आरियं उवसंपज्जे सव्वधम्ममकोवियं ॥
- १४ सहसम्मइए णच्चा, धम्मसारं सुणेत्तु वा ।
समुवट्ठिए अणगारे, पच्चक्खायपावए ॥
- १५ जं किंचुवक्कमं जाणे, आउक्खेमस्स अप्पणो ।
तस्सेव अंतरा खिप्पं, सिक्खं सिक्खेज्ज पंडिए ॥
- १६ जहा कुम्मे सअंगाइं, सए देहे समाहरे ।
एवं पावाइं मेहावी, अज्झप्पेण समाहरे ॥
- १७ साहरे हत्थ-पाए य, मणं सव्वेदियाणि य ।
पावगं च परिणामं भासादोसं च तारिसं ॥
- १८ अणु माणं च मायं च, तं परिण्णाय पंडिए ।
सायागारवणिहुए, उवसंतेऽणिहे चरे ॥
- १९ पाणे य णाइवाएज्जा, अदिण्णं पि य णाइए ।
साइयं ण मुसं बूया, एस धम्मे वुसीमओ ॥
- २० अइक्कमं ति वायाए, मणसा वि ण पत्थए ।
सव्वओ संवुडे दंते, आयाणं सुसमाहरे ॥
- २१ कडं च कज्जमाणं च, आगमेस्सं च पावगं ।

सव्वं तं णाणुजाणंति, आयगुत्ता जिइंदिया ॥

२२ जे याऽबुद्धा महाभागा, वीरा असम्मत्तदंसिणो ।
असुद्धं तेसिं परक्कंतं, सफलं होइ सव्वसो ॥

२३ जे य बुद्धा महाभागा, वीरा सम्मत्तदंसिणो ।
सुद्धं तेसिं परक्कंतं, अफलं होइ सव्वसो ॥

२४ तेसिं पि तवो सुद्धो, णिक्खंता जे महाकुला ।
जं णेवण्णे वियाणंति, ण सिलोगं पवेयए ॥

२५ अप्पपिंडासि पाणासि, अप्पं भासेज्ज सुव्वए ।
खंतेऽभिणिव्वुडे दंते, वीतगेही सया जए ॥

२६ झाणजोगं समाहट्ठु, कायं विउसेज्ज सव्वसो ।
तितिक्खं परमं णच्चा, आमोक्खाए परिव्वएज्जासि ॥ त्ति बेमि ॥

॥ अट्ठम अज्झयणं समत्तं ॥

णवमं अज्झयणं

धम्मो

१ कयरे धम्मे अक्खाए, माहणेण मईमया ।
अंजुं धम्मं अहातच्चं, जिणाणं तं सुणेह मे ॥

२ माहणा खत्तिया वेस्सा, चंडाला अदु बोक्कसा ।
एसिया वेसिया सुद्धा, जे य आरंभणिस्सिया ॥

३ परिग्गहे णिविद्वाणं, वेरं तेसिं पवड्ढइ ।
आरंभसंभिया कामा, ण ते दुक्खविमोयगा ॥

४ आघायकिच्चमाहेउं, णायओ विसएसिणो ।
अण्णे हरंति तं वित्तं, कम्मी कम्मेहिं किच्चइ ॥

५ माया पिया ण्हुसा भाया, भज्जा पुत्ता य ओरसा ।
णालं ते तव ताणाए, लुप्पंतस्स सकम्मुणा ॥

६ एयमट्ठं सपेहाए, परमट्ठाणुगामियं ।

णिम्ममो णिरहंकारो, चरे भिक्खू जिणाहियं ॥

७ चिच्चा वित्तं च पुत्ते य, णायओ य परिग्गहं ।
चिच्चाण अंतगं सोयं, णिरवेक्खो परिव्वए ॥

८ पुढवी आऊ अगणि वाऊ, तण रुक्ख सबीयगा ।
अंडया पोय-जराऊ-रस-संसेय-उब्भिया ॥

९ एतेहिं छहिं काएहिं, तं विज्जं परिजाणिया ।
मणसा कायवक्केणं, णारंभी ण परिग्गही ॥

१० मुसावायं बहिद्धं च, उग्गहं च अजाइयं ।
सत्थादाणाइं लोगंसि, तं विज्जं परिजाणिया ॥

११ पलिउंचणं भयणं च, थंडिल्लुस्सयणाणि य ।
धूणास्सदाणाइं लोगंसि, तं विज्जं परिजाणिया ॥

१२ धोयणं रयणं चेव, वत्थीकम्म विरेयणं ।
वमणंजण पलिमंथं, तं विज्जं परिजाणिया ॥

१३ गंध मल्ल सिणाणं च, दंतपक्खालणं तहा ।
परिग्गहित्थि कम्मं च, तं विज्जं परिजाणिया ॥

१४ उद्देसियं कीयगडं, पामिच्चं चेव आहडं ।
पूइं अणेसणिज्जं च, तं विज्जं परिजाणिया ॥

१५ आसूणिमक्खिरागं च, गिद्धुवघायकम्मगं ।
उच्छोलणं च कक्कं च, तं विज्जं परिजाणिया ॥

१६ संपसारी कयकिरिए, पसिणायतणाणि य ।
सागारियपिंडं च, तं विज्जं परिजाणिया ॥

१७ अद्वावयं ण सिक्खेज्जा, वेहाइयं च णो वए ।
हत्थकम्मं विवायं च, तं विज्जं परिजाणिया ॥

१८ पाणहाओ य छत्तं च, णालियं वालवीयणं ।
परकिरियं अण्णमण्णं च, तं विज्जं परिजाणिया ॥

१९ उच्चारं पासवणं हरिएसु ण करे मुणी ।
वियडेण वा वि साहट्टु, णायमेज्ज कयाइ वि ॥

- २० परमत्ते अण्णपाणं च, ण भुंजेज्जा कयाइ वि ।
परवत्थमचेलो वि, तं विज्जं परिजाणिया ॥
- २१ आसंदी पलियंके य, णिसिज्जं च गिहंतरे ।
संपुच्छणं च सरणं च, तं विज्जं परिजाणिया ॥
- २२ जसं कित्तिं सिलोगं च, जा य वंदणपूयणा ।
सव्वलोयंसि जे कामा, तं विज्जं परिजाणिया ॥
- २३ जेणेहं णिव्वहे भिक्खू, अण्ण-पाणं तहाविहं ।
अणुप्पदाणमण्णेसिं, तं विज्जं परिजाणिया ॥
- २४ एवं उदाहु णिग्गंथे, महावीरे महामुणी ।
अणंतणाणदंसी से, धम्मं देसितवं सुयं ॥
- २५ भासमाणो ण भासेज्जा, णेव वंफेज्ज मम्मयं ।
माइद्वाणं विवज्जेज्जा, अणुवीई वियागरे ॥
- २६ तत्थिमा तइया भासा, जं वइत्ताऽणुत्तप्पइ ।
जं छण्णं तं ण वत्तव्वं, एसा आणा णियंठिया ॥
- २७ होलावायं सहीवायं, गोयावायं च णो वए ।
तुमं तुमं ति अमणुण्णं, सव्वसो तं ण वत्तए ॥
- २८ अकुसीले सया भिक्खू, णेव संसग्गियं भए ।
सुहरूवा तत्थुवस्सगा, पडिबुज्झेज्ज ते विऊ ॥
- २९ णण्णत्थ अंतराणं, परगेहे ण णिसीयए ।
गामकुमारियं किड्डं, णाइवेलं हसे मुणी ॥
- ३० अणुस्सुओ उरालेसु, जयमाणो परिव्वए ।
चरियाए अप्पमत्तो, पुट्ठो तत्थऽहियासए ॥
- ३१ हम्ममाणो ण कुप्पेज्जा, वुच्चमाणो ण संजले ।
सुमणो अहियासेज्जा, ण य कोलाहलं करे ॥
- ३२ लद्धे कामे ण पत्थेज्जा, विवेगे एव माहिए ।
आरियाइं सुसिक्खेज्जा, बुद्धाणं अंतिए सया ॥
- ३३ सुस्सूसमाणो उवासेज्जा, सुप्पण्णं सुतवस्सियं ।
वीरा जे अत्तपण्णेसी, धिइमंता जिइंदिया ॥

- ३४ गिहे दीवमपासंता, पुरिसादाणिया णरा ।
ते वीरा बंधणुम्मुक्का, णावकंखंति जीवियं ॥
- ३५ अगिद्धे सद्ध-फासेसु, आरंभेसु अणिस्सिए ।
सव्वेयं समयातीतं, जमेयं लवियं बहुं ॥
- ३६ अइमाणं च मायं च, तं परिण्णाय पंडिए ।
गारवाणि य सव्वाणि, णिव्वाणं संधए मुणि ॥ त्ति बेमि ॥
॥ णवमं उज्झयणं समत्तं ॥

दसमं अज्झयणं

समाही

- १ आघं मईमं अणुवीइ धम्मं, अंजू समाहिं तमिणं सुणेह ।
अपडिण्ण भिक्खू उ समाहिपत्ते, अणियाणभूए सुपरिव्वएज्जा ॥
- २ उइढं अहे य तिरियं दिसासु, तसा य जे थावर जे य पाणा ।
हत्थेहिं पाएहि य संजमित्ता, अदिण्णमण्णेसु य णो गहेज्जा ॥
- ३ सुअक्खायधम्मं वित्तिगिच्छतिण्णे, लाढे चरे आयतुले पयासु ।
आयं ण कुज्जा इह जीवियट्ठी, चयं ण कुज्जा सुतवस्सि भिक्खू ॥
- ४ सत्विंदियाभिणिव्वुडे पयासु, चरे मुणी सव्वओ विप्पमुक्के ।
पासाहि पाणे य पुढो वि सत्ते, दुक्खेण अट्ठे परितप्पमाणे ॥
- ५ एतेसु बाले य पकुव्वमाणे, आवट्ठइ कम्मसु पावएसु ।
अइवायओ कीरइ पावकम्मं, णिउंजमाणे उ करेइ कम्मं ॥
- ६ आदीणवित्ती वि करेइ पावं, मंता तु एगंतसमाहिमाहु ।
बुद्धे समाही य एए विवेगे, पाणाइवाया विरए ठियप्पा ॥
- ७ सव्वं जगं तू समयाणुपेही, पियमप्पियं कस्सइ णो करेज्जा ।
उट्ठाय दीणे उ पुणो विसण्णे, संपूयणं चेव सिलोयकामी ॥
- ८ आहाकडं चेव णिकाममीणे, णिकामचारी य विसण्णमेसी ।
इत्थीसु सत्ते य पुढो य बाले, परिग्गहं चेव पकुव्वमाणे ॥
- ९ वेराणुगिद्धे णिचयं करेइ, इतो चुए से दुहमड्डुगं ।

तम्हा उ मेहावि समिक्ख धम्मं, चरे मुणी सव्वओ विप्पमुक्के ॥

१० आयं ण कुज्जा इह जीवियद्दी, असज्जमाणो य परिव्वएज्जा ।
णिसम्मभासी य विणीय गिद्धिं, हिंसणियं वा ण कहं करेज्जा ॥

११ आहाकडं वा ण णिकामएज्जा, णिकामयंते य ण संधवेज्जा ।
धुणे उरालं अणुवेहमाणे, चिच्चाण सोयं अणवेक्खमाणे ॥

१२ एगत्तमेयं अभिपत्थएज्जा, एवं पमोक्खो ण मुसं ति पास ।
एसप्पमोक्खो अमुसे वरे वि, अकोहणे सच्चरणे तवस्सी ॥

१३ इत्थीसु या आरय मेहुणाओ, परिग्गहं चेव अकुव्वमाणे ।
उच्चावएसु विसएसु ताई, णिस्संसयं भिक्खू समाहिपत्ते ॥

१४ अरइं रइं च अभिभूय भिक्खू, तणाइफासं तह सीयफासं ।
उण्हं च दंसं चऽहियासएज्जा, सुब्भिं च दुब्भिं च तित्तिक्खएज्जा ॥

१५ गुत्तो वईए य समाहिपत्ते, लेसं समाहट्ठु परिव्वएज्जा ।
गिहं ण छाए ण वि छावएज्जा, सम्मिस्सिभावं पजहे पयासु ॥

१६ जे केइ लोगंसि अकिरिय आया, अण्णेण पुट्ठा धुयमादिसंति ।
आरंभसत्ता गढिया य लोए, धम्मं ण याणंति विमोक्खहेउं ॥

१७ पुढो य छंदा इह माणवा उ, किरियाकिरियं च पुढो य वायं ।
जायस्स बालस्स पकुव्व देहं, पवड्ढइ वेरमसंजयस्स ॥

१८ आउक्खयं चेव अबुज्झमाणे, ममाइ से साहसकारि मंदे ।
अहो य राओ परितप्पमाणे, अट्ठेसु मूढे अजरामरे व्व ॥

१९ जहाय वित्तं पसवो य सव्वे, जे बांधवा जे य पिया य मित्ता ।
लालप्पइ से वि य एइ मोहं, अण्णे जणा तं सि हरंति वित्तं ॥

२० सीहं जहा खुड्डमिगा चरंता, दूरे चरंति परिसंकमाणा ।
एवं तु मेहावी समिक्ख धम्मं, दूरेण पावं परिवज्जएज्जा ॥

२१ संबुज्झमाणे उ णरे मईमं, पावाओ अप्पाण णिवट्ठएज्जा ।
हिंसप्पसूयाइं दुहाइं मंता, वेराणुबंधीणि महब्भयाणि ॥

२२ मुसं ण बूया मुणि अत्तगामी, णिव्वाणमेयं कसिणं समाहिं ।
सयं ण कुज्जा ण वि कारवेज्जा, करंतमण्णं पि य णाणुजाणे ॥

२३ सुद्धे सिया जाए ण दूसएज्जा, अमुच्छिणं ण य अज्झोववण्णे ।

धिइमं विमुक्के ण य पूयणद्धी, ण सिलोयकामी य परिव्वएज्जा ॥

- २४ णिक्खम्म गेहाउ णिरावकंखी, कायं विओसेज्ज णियाणछिण्णे ।
णो जीवियं णो मरणाभिकंखी, चरेज्ज भिक्खू वलया विमुक्के ॥ त्ति बेमि ॥
॥ दसमं उज्झयणं समत्तं ॥

एगारसमं अज्झयणं

मग्गं

- १ कयरे मग्गे अक्खाए, माहणेण मईमया ।
जं मग्गं उज्जु पावित्ता, ओहं तरइ दुत्तरं ॥
- २ तं मग्गं अणुत्तरं सुद्धं, सव्वदुक्खविमोक्खणं ।
जाणासि णं जहा भिक्खू, तं णे बूहि महामुणी ॥
- ३ जइ णे केइ पुच्छिज्जा, देवा अदुव माणुसा ।
तेसिं तु कयरं मग्गं, आइक्खेज्ज कहाहि णे ॥
- ४ जइ वो केइ पुच्छिज्जा, देवा अदुव माणुसा ।
तेसिमं पडिसाहेज्जा, मग्गसारं सुणेह मे ॥
- ५ अणुपुव्वेण महाघोरं, कासवेण पवेइयं ।
जमादाय इओ पुव्वं, समुद्धं व ववहारिणो ॥
- ६ अतरिंसु तरंतेगे, तरिस्संति अणागया ।
तं सोच्चा पडिवक्खामि, जंतवो तं सुणेह मे ॥
- ७ पुढवी जीवा पुढो सत्ता, आउजीवा तहाऽगणी ।
वाउजीवा पुढो सत्ता, तण रुक्ख सबीयगा ॥
- ८ अहावरा तसा पाणा, एवं छक्काय आहिया ।
एतावए जीवकाए, णावरे कोइ विज्जइ ॥
- ९ सव्वाहिं अणुजुत्तीहिं, मइमं पडिलेहिया ।
सव्वे अकंतदुक्खा य, अओ सव्वे ण हिंसया ॥

- १० एयं खु णाणिणो सारं, जं ण हिंसइ कंचणं ।
अहिंसा समयं चेव, एयावंतं विजाणिया ॥
- ११ उड्ढं अहे तिरियं च, जे केइ तस-थावरा ।
सव्वत्थ विरइं कुज्जा, संति णिव्वाणमाहियं ॥
- १२ पभू दोसे णिराकिच्चा, ण विरुज्झेज्ज केणइ ।
मणसा वयसा चेव, कायसा चेव अंतसो ॥
- १३ संवुडे से महापण्णे, धीरे दत्तेसणं चरे ।
एसणासमिणं णिच्चं, वज्जयंते अणेसणं ॥
- १४ भूयाइं च समारंभ, समुद्धिस्स य जं कडं ।
तारिसं तु ण गेण्हेज्जा, अण्णपाणं सुसंजए ॥
- १५ पूइकम्मं ण सेवेज्जा, एस धम्मो वुसीमओ ।
जं किंचि अभिसंकेज्जा, सव्वसो तं ण कप्पए ॥
- १६ हणंतं णाणुजाणेज्जा, आयगुत्ते जिइंदिए ।
ठाणाइं संति सइढ्ढीणं, गामेसु णगरेसु वा ।
- १७ तहा गिरं समारब्भ, अत्थि पुण्णं ति णो वए ।
अहवा णत्थि पुण्णं ति, एवमेयं महब्भयं ॥
- १८ दाणद्वयाए जे पाणा, हम्मंति तस-थावरा ।
तेसिं सारक्खणद्वाए, तम्हा अत्थि त्ति णो वए ॥
- १९ जेसिं तं उवकप्पेति, अण्ण-पाणं तहाविहं ।
तेसिं लाभंतरायं ति, तम्हा णत्थि त्ति णो वए ॥
- २० जे य दाणं पसंसंति, वहमिच्छंति पाणिणं ।
जे य णं पडिसेहंति, वित्तिच्छेयं करेति ते ॥
- २१ दुहओ वि जे ण भासंति, अत्थि वा णत्थि वा पुणो ।
आयं रयस्स हिच्चाणं, णिव्वाणं पाउणंति ते ॥
- २२ णिव्वाणपरमं बुद्धा, णक्खत्ताणं व चंदिमा ।
तम्हा सया जए दंते, णिव्वाणं संधए मुणी ॥
- २३ वुज्झमाणाण पाणाणं, किच्चंताण सकम्मणा ।
आघाइ साहु तं दीवं, पइढ्ढेसा पवुच्चइ ॥

- २४ आयगुत्ते सया दंते, छिण्णसोए अणासवे ।
जे धम्मं सुद्धमक्खाइ, पडिपुण्णमणेलिसं ॥
- २५ तमेव अवियाणंता, अबुद्धा बुद्धमाणिणो ।
बुद्धा मो त्ति य मण्णंता, अंतए ते समाहिए ॥
- २६ ते य बीओदगं चेव, तमुद्धिस्सा य जं कडं ।
भोच्चा झाणं झियायंति, अखेयण्णा असमाहिया ॥
- २७ जहा ढंका य कंका य, कुलला मग्गुका सिही ।
मच्छेसणं झियायंति, झाणं ते कलुसाधमं ॥
- २८ एवं तु समणा एगे, मिच्छद्धिद्वि अणारिया ।
विसएसणं झियायंति, कंका वा कलुसाहमा ॥
- २९ सुद्धं मग्गं विराहित्ता, इहमेगे उ दुम्मई ।
उम्मग्गगया दुक्खं, घायमेसंति ते तहा ॥
- ३० जहा आसाविणिं णावं, जाइअंधे दुरुहिया ।
इच्छइ पारमागंतु, अंतरा य विसीयइ ॥
- ३१ एवं तु समणा एगे, मिच्छद्धिद्वि अणारिया ।
सोयं कसिणमावण्णा, आगंतारो महब्भयं ॥
- ३२ इमं च धम्ममादाय, कासवेण पवेइयं ।
तरे सोयं महाघोरं, अत्तत्ताए परिव्वए ॥
- ३३ विरए गामधम्महिं, जे केइ जगई जगा ।
तेसिं अत्तुवमायाए, थामं कुव्वं परिव्वए ॥
- ३४ अइमाणं च मायं च, तं परिण्णाय पंडिए ।
सव्वमेयं णिराकिच्चा, णिव्वाणं संधए मुणी ॥
- ३५ संधए साहुधम्मं च, पावं धम्मं णिराकरे ।
उवहाणवीरिए भिक्खू, कोहं माणं ण पत्थए ॥
- ३६ जे य बुद्धा अइक्कंता, जे य बुद्धा अणागया ।
संति तेसिं पइट्ठाणं, भूयाणं जगई जहा ॥
- ३७ अह णं वयमावण्णं, फासा उच्चावया फुसे ।
ण तेसु विणिहण्णेज्जा, वाणेव महागिरी ॥
- ३८ संवुडे से महापण्णे, धीरे दत्तेसणं चरे ।

णिव्वुडे कालमाकंखी, एवं केवलिणो मयं ॥ त्ति बेमि ॥

॥ एगारसमं उज्झयणं समत्तं ॥

बारसमं अज्झयणं

समोसरणं

- १ चत्तारि समोसरणाणिमाणि, पावाउया जाइं पुढो वयंति ।
किरियं अकिरियं विणयं ति तइयं, अण्णाणमाहंसु चउत्थमेव ॥
- २ अण्णाणिया ता कुसला वि संता, असंथुया णो वितिगिच्छतिण्णा
अकोविया आहु अकोविएहिं, अण्णाणुवीईति मुसं वयंति ॥
- ३ सच्चं असच्चं इति चिंतयंता, असाहु साहु त्ति उदाहरंता ।
जेमे जणा वेणइया अणेगे, पुढा वि भावं विणइंसु णाम ॥
- ४ अणोवसंखा इति ते उदाहु, अट्ठे स ओभासइ अम्ह एवं ।
लवावसकी य अणागएहिं, णो किरियमाहंसु अकिरियवाई ॥
- ५ सम्मिस्सभावं च गिरा गहीए, से मुम्मई होइ अण्णाणुवाई ।
इमं दुपक्खं इममेगपक्खं, आहंसु छलायतणं च कम्मं ॥
- ६ ते एवमक्खंति अबुज्झमाणा, विरूवरूवाणि अकिरियवाई ।
जमायइत्ता बहवे मणूसा, भमंति संसारमणोवदग्गं ॥
- ७ णाइच्चो उदेइ ण अत्थमेइ, ण चंदिमा वड्ढइ हायइ वा ।
सलिला ण संदंति ण वंति वाया, वंझे णियत्ते कसिणे हु लोए ॥
- ८ जहाहि अंधे सह जोइणा वि, रूवाइं णो पस्सइ हीणणेत्ते ।
संतं पि ते एवमकिरियवाई, किरियं ण पस्संति णिरुद्धपण्णा ॥
- ९ संवच्छरं सुविणं लक्खणं च, णिमित्त देहं उप्पाइयं च ।
अट्ठंगमेयं बहवे अहित्ता, लोगंसि जाणंति अणागयाइं ॥
- १० केइ णिमित्ता तहिया भवंति, केसिंचि तं विप्पडिण्णं णाणं ।
ते विज्जभावं अणहिज्जमाणा, आहंसु विज्जापलिमोक्खमेव ॥
- ११ ते एवमक्खंति समिच्च लोगं, तहा तहा समणा माहणा य ।

सयंकडं णण्णकडं च दुक्खं, आहंसु विज्जाचरणं पमोक्खं ॥

१२ ते चक्खु लोगंसीह णायगा उ, मग्गाणुसासंति हियं पयाणं ।
तहा तहा सासयमाहु लोए, जंसी पया माणव ! संपगाढा ॥

१३ जे रक्खसा वा जमलोइया वा, जे वा सुरा गंधव्वा य काया ।
आगासगामी य पुढोसिया ते, पुणो पुणो विप्परियासुवेंति ॥

१४ जमाहु ओहं सलिलं अपारगं, जाणाहि णं भवगहणं दुमोक्खं ।
जंसी विसण्णा विसयंगणाहिं, दुहओ वि लोगं अणुसंचरंति ॥

१५ ण कम्मणा कम्म खवेंति बाला, अकम्मणा उ कम्म खवेंति धीरा
मेहाविणो लोभमयावतीता, संतोसिणो णो पकरेंति पावं ॥

१६ ते तीय-उप्पण्ण-मणागयाइं, लोगस्स जाणंति तहागयाइं ।
णेयारो अण्णेसिं अणण्णणेया, बुद्धा हु ते अंतकडा भवंति ॥

१७ ते णेव कुव्वंति ण कारवेंति, भूताभिसंकाए दुगुंछमाणा ।
सया जया विप्पणमंति धीरा, विण्णत्तिवीरा य भवंति एगे ॥

१८ डहरे य पाणे वुड्ढे य पाणे, ते आयओ पासइ सव्वलोए ।
उवेहइ लोगमिणं महंतं, बुद्धेऽप्पमत्तेसु परिव्वएज्जा ॥

१९ जे आयओ परओ वावि णच्चा, अलमप्पणो होइ अलं परेसिं ।
तं जोइभूयं च सयाआवसेज्जा, जे पाउकुज्जा अणुवीइ धम्मं ॥

२० अत्ताण जो जाणइ जो य लोगं, गइं च जो जाणइ णागइं च ।
जो सासयं जाणइ असासयं च, जाइं च मरणं चयणोववायं ॥

२१ अहो वि सत्ताण विउट्ठणं च, जो आसवं जाणइ संवरं च ।
दुक्खं च जो जाणइ णिज्जरं च, सो भासिउमरिहइ किरियवायं ॥

२२ सद्धेसु रूवेसु असज्जमाणे, गंधेसु रसेसु अदुस्समाणे ।
णो जीवियं णो मरणाभिकंखी, आयाणगुत्ते वलयाविमुक्के ॥ -त्ति बेमि ।

॥ बारसमं उज्झयणं समत्तं ॥

तेरसमं अज्झयणं

આહત્તહીયં

- ૧ આહત્તહીયં તુ પવેદઙ્ગસં, ણાણપ્પગારં પુરિસસ્સ જાતં ।
સતો ય ધમ્મં અસતો અસીલં, સંતિં અસંતિં કરિસ્સામિ પાઠં ॥
- ૨ અહો ય રાઓ ય સમુદ્ધિએહિં, તહાગએહિં પડિલલ્લ ધમ્મં ।
સમાહિમાધાયમઙ્ગોસયંતા, સત્થારમેવ ફરુસં વયંતિ ॥
- ૩ વિસોહિયં તે અણુકાહયંતે, જે આત્તભાવેણ વિયાગરેજ્જા ।
અદ્વાણિએ હોઙ્ગ બહુગુણાણં, જે ણાણસંકાએ મુસં વએજ્જા ॥
- ૪ જે યાવિ પુદ્ધા પલિઠંચયંતિ, આયાણમદ્વં લલુ વંચયંતિ ।
અસાહુણો તે ઇહ સાહુમાણી, માયણિ એસિંતિ અણંતઘાયં ॥
- ૫ જે કોહણે હોઙ્ગ જગદ્ધાસી, વિઓસિયં જે ડ ડદીરએજ્જા ।
અંધે વ સે દંડપહં ગહાય, અવિઓસિએ ઘાસઙ્ગ પાવકમ્મી ॥
- ૬ જે વિગ્ગહીએ અણ્ણાયભાસી, ણ સે સમે હોઙ્ગ અઙ્ગંઙ્ગપત્તે ।
ઓવાયકારી ય હિરીમણે ય, એગતંદિદ્ધી ય અમાઙ્ગરૂવે ॥
- ૭ સે પેસલે સુહુમે પુરિસજાએ, જલ્લલ્લણિએ લેવ સુડજ્જુયારે ।
બહું પિ અણુસાસિએ જે તહલ્લા, સમે હુ સે હોઙ્ગ અઙ્ગંઙ્ગપત્તે ॥
- ૮ જે યાવિ અપ્પં વસુમં તિ મંતા, સંલ્લાય વાયં અપરિલ્લ કુજ્જા ।
તવેણ વા હં સહિએ ત્તિ મંતા, અણ્ણં જણં પસ્સઙ્ગ લિંલ્લભૂયં ॥
- ૯ એગંતકૂડેણ ડ સે પલેઙ્ગ, ણ વિજ્જઙ્ગ મોણપયંસિ ગોત્તે ।
જે માણણદ્વેણં વિઠલ્લસેજ્જા, વસુમણ્ણતરેણ અલુજ્જમાણે ॥
- ૧૦ જે માહણે લલ્લિય જાઙ્ગ વા, તહુગ્ગપુત્તે તહ લેલ્લઙ્ગ વા ।
જે પલ્લલ્લ પરદત્તભોઙ્ગ, ગોત્તે ણ જે થલ્લલ્લ માણલલ્લ ॥
- ૧૧ ણ તસ્સ જાઙ્ગ વ કુલં વ તાણં, ણણત્થ વિજ્જા-લ્લરણં સુલ્લિણ્ણં
ણિલ્લલ્લમ્મ જે સેવઙ્ગગારિલ્લમ્મં, ણ સે પારએ હોઙ્ગ વિમોયણાએ ॥
- ૧૨ ણિલ્લિંલ્લણે ભિલ્લલ્લ સુલ્લહજીવી, જે ગારવં હોઙ્ગ સિલોગગામી ।
આજીવમેયં તુ અલુજ્જમાણે, પુણો પુણો વિલ્લપરિયાસુવેઙ્ગ ॥
- ૧૩ જે ભાસવં ભિલ્લલ્લ સુસાહુવાદી, પડિહાણવં હોઙ્ગ વિસારએ ય ।
આગાલ્લપણ્ણે સુવિભાવિઅપ્પા, અણ્ણં જણં પણ્ણયા પરિભલ્લેજ્જા ॥

- १४ एवं ण से होइ समाहिपत्ते, जे पण्णवं भिक्खु विउक्कसेज्जा ।
अहवा वि जे लाभमयावलित्ते, अण्णं जणं खिंसइ बालपण्णे ॥
- १५ पण्णामयं चेव तवोमयं च, णिण्णामए गोयमयं च भिक्खू ।
आजीवगं चेव चउत्थमाहु, से पंडिए उत्तमपोग्गले से ॥
- १६ एयाइं मयाइं विगिंच धीरा, ण ताणि सेवन्ति सुधीरधम्मा ।
ते सव्वगोत्तावगया महेसी, उच्चं अगोत्तं च गइं वयन्ति ॥
- १७ भिक्खू मुयच्चे तह दिट्ठधम्मे, गामं च णगरं च अणुप्पविस्सा ।
से एसणं जाणमणेसणं च, अण्णस्स पाणस्स अणाणुगिद्धे ॥
- १८ अरइं रइं च अभिभूय भिक्खू, बहूजणे वा तह एगचारी ।
एगंतमोणेण वियागरेज्जा, एगस्स जंतो गइरागई य ॥
- १९ सयं समेच्चा अदुवा वि सोच्चा, भासेज्ज धम्मं हिययं पयाणं ।
जे गरहिया सणियाणप्पओगा, ण ताणि सेवन्ति सुधीरधम्मा ॥
- २० केसिंचि तक्काइ अबुज्झभावं खुद्धं पि गच्छेज्ज असद्धाणे ।
आउस्स कालाइयारं वघाए, लद्धाणुमाणे य परेसु अट्ठे ॥
- २१ कम्मं च छंदं च विगिंच धीरे, विणएज्ज उ सव्वओ आयभावं ।
रूवेहिं लुप्पन्ति भयावहेहिं, विज्जं गहाय तसथावरेहिं ॥
- २२ ण पूयणं चेव सिलोगकामी, पियमप्पियं कस्सवि णो करेज्जा ।
सव्वे अणट्ठे परिवज्जयन्ते, अणाउले या अकसाइ भिक्खू ॥
- २३ आहत्तहियं समुपेहमाणे, सव्वेहिं पाणेहिं णिहाय दंडं ।
णो जीवियं णो मरणाभिकंखी, परिव्वएज्जा वलयाविमुक्के ॥ त्ति बेमि ॥

॥ तेरसमं उज्झयणं समत्तं ॥

चउद्धसमं अज्झयणं

गंथो

- १ गंथं विहाय इह सिक्खमाणो, उट्ठाया सुबंभचेरं वसेज्जा ।
ओवायकारी विणयं सुसिक्खे, जे छेय विप्पमायं ण कुज्जा ॥

- २ जहा दियापोतमपत्तजायं, सावासगा पविउं मण्णमाणं ।
तमचाइयं तरुणमपत्तजायं, ढंकाइ अव्वत्तगमं हरेज्जा ॥
- ३ एवं तु सेहं पि अपुड्ढधम्मं, णिस्सारियं वुसिमं मण्णमाणा ।
दियस्स छावं व अपत्तजायं, हरिंसु णं पावधम्मा अणेगे ॥
- ४ ओसाणमिच्छे मणुए समाहिं, अणोसिए णंतकरेति णच्चा ।
ओभासमाणे दवियस्स वित्तं, ण णिक्कसे बहिया आसुपण्णे ॥
- ५ जे ठाणओ य सयणासणे य, परक्कमे यावि सुसाहुजुत्ते ।
समिईसु गुत्तीसु य आयपण्णे, वियागरंते य पुढो वएज्जा ॥
- ६ सद्दाणि सोच्चा अदु भेरवाणि, अणासवे तेसु परिव्वएज्जा ।
णिदं च भिक्खू ण पमाय कुज्जा, कहंकहं वा वित्तिगिच्छतिण्णे ॥
- ७ डहरेण वुड्ढेणऽणुसासिए उ, राइणिण्णावि समव्वएणं ।
सम्मं तयं थिरओ णाभिगच्छे, णिज्जंतए वा वि अपारए से ॥
- ८ विउट्ठिएणं समयाणुसिद्धे डहरेण वुड्ढेण उ चोइए य ।
अच्चुट्ठियाए घडदासिए वा, अगारिणं वा समयाणुसिद्धे ॥
- ९ ण तेसु कुज्जे ण य पव्वहेज्जा, ण यावि किंचि फरुसं वएज्जा ।
तहा करिस्संति पडिस्सुणेज्जा, सेयं खु मेयं ण पमाय कुज्जा ॥
- १० वणंसि मूढस्स जहा अमूढा, मग्गाणुसासंति हियं पयाणं ।
तेणेव मज्झं इणमेव सेयं, जं मे बुहा समणुसासयंति ॥
- ११ अह तेण मूढेण अमूढगस्स, कायव्व पूया सविसेसजुत्ता ।
एओवमं तत्थ उदाहु वीरे, अणुगम्म अत्थं उवणेइ सम्मं ॥
- १२ णेया जहा अंधकारंसि राओ, मग्गं ण जाणाइ अपस्समाणे ।
से सूरियस्स अब्भुग्गमेणं, मग्गं विजाणाइ पगासियंसि ॥
- १३ एवं तु सेहे वि अपुड्ढधम्मे, धम्मं ण जाणाइ अबुज्झमाणे ।
से कोविए जिणवयणेण पच्छा, सूरुदए पासइ चक्खुणेव ॥
- १४ उड्ढं अहे य तिरियं दिसासु, तसा य जे थावर जे य पाणा ।
सया जए तेसु परिव्वएज्जा, मणप्पओसं अविकंपमाणे ॥
- १५ कालेण पुच्छे समियं पयासु, आइक्खमाणो दवियस्स वित्तं ।

तं सोयकारी य पुढो पवेसे, संखा इमं केवलियं समाहिं ॥

१६ अस्सिं सुठिच्चा तिविहेण तायी, एएसु या संति णिरोहमाहु ।
ते एवमक्खंति तिलोगदंसी, ण भुज्जमेयंतु पमायसंगं ॥

१७ णिसम्म से भिक्खु समीहियद्वं, पडिभाणवं होइ विसारए य ।
आयाणमढ्ढी वोदाण मोणं, उवेच्च सुद्धेण उवेइ मोक्खं ॥

१८ संखाय धम्मं च वियागरेंति, बुद्धा हु ते अंतकरा भवंति ।
ते पारगा दोण्ह वि मोयणाए, संसोधितं पण्हमुदाहरंति ॥

१९ णो छायेण णो वि य लूसएज्जा, माणं ण सेवेज्ज पगासणं च ।
ण यावि पण्णे परिहास कुज्जा, ण याऽऽसियावाय वियागरेज्जा ॥

२० भूयाभिसंकाए दुगुंछमाणो, ण णिव्वहे मंतपण्ण गोयं ।
ण किंचि मिच्छे मणुए पयासु, असाहुधम्माणि ण संवएज्जा ॥

२१ हासं पि णो संधइ पावधम्मे, ओए तहियं फरुसं वियाणे ।
णो तुच्छए णो विक्त्थएज्जा, अणाइले या अकसाई भिक्खू ॥

२२ संकेज्ज याऽसंकितभाव भिक्खू, विभज्जवायं च वियागरेज्जा ।
भासादुगं धम्म-समुद्धितेहिं, वियागरेज्जा समयाऽऽसुपण्णे ॥

२३ अणुगच्छमाणे वितहं विजाणे, तहा तहा साहु अकक्कसेणं ।
ण कत्थई भास विहिसएज्जा, णिरुद्धगं वा वि ण दीहएज्जा ॥

२४ समालवेज्जा पडिपुण्णभासी, णिसामिया समिया अद्वदंसी ।
आणाए सुद्धं वयणं भिउंजे, अभिसंधए पावविवेग भिक्खू ॥

२५ अहाबुइयाइं सुसिक्खएज्जा, जएज्ज या णाइवेलं वएज्जा ।
से दिट्ठिमं दिट्ठि ण लूसएज्जा, से जाणइ भासिउं तं समाहिं ॥

२६ अलूसए णो पच्छण्णभासी, णो सुत्तमत्थं च करेज्ज ताई ।
सत्थारभत्ती अणुवीइ वायं, सुयं च सम्मं पडिवायएज्जा ॥

२७ से सुद्धसुत्ते उवहाणवं च, धम्मं च जे विंदइ तत्थ तत्थ ।
आदेज्जवक्के कुसले वियत्ते, से अरिहइ भासिउं तं समाहिं ॥ ॥ त्ति बेमि ॥
॥ चउद्धसमं उज्झयणं समत्तं ॥

पण्णरसमं अज्झयणं

जमईए

- १ जमतीयं पडुप्पण्णं, आगमिस्सं च णायओ ।
सव्वं मण्णइ तं ताई, दंसणावरणंतए ॥
- २ अंतए वित्तिगिच्छाए, से जाणइ अणेलिसं ।
अणेलिसस्स अक्खाया, ण से होइ तहिं तहिं ॥
- ३ तहिं तहिं सुयक्खायं, से य सच्चे सुआहिए ।
सया सच्चेण संपण्णे, मेत्तिं भूएहिं कप्पए ॥
- ४ भूएहिं ण विरुज्झेज्जा, एस धम्मो वुसीमओ ।
वुसीमं जगं परिण्णाय, अस्सिं जीवियभावणा ॥
- ५ भावणाजोगसुद्धप्पा, जले णावा व आहिया ।
णावा व तीरसंपण्णा, सव्वदुक्खा तिउट्टइ ॥
- ६ तिउट्टइ उ मेहावी, जाणं लोगंसि पावगं ।
तुट्ठंति पावकम्माणि, णवं कम्ममकुव्वओ ॥
- ७ अकुव्वओ णवं णत्थि, कम्मं णाम विजाणइ ।
विण्णाय से महावीरे, जेण जाई ण मिज्जइ ॥
- ८ ण मिज्जइ महावीरे, जस्स णत्थि पुरेकडं ।
वाउव्व जालमच्चेइ, पिया लोगंसि इत्थिओ ॥
- ९ इत्थिओ जे ण सेवन्ति, आदिमोक्खा हु ते जणा ।
ते जणा बंधणुम्मुक्का, णावकंखंति जीवियं ॥
- १० जीवियं पिट्ठओ किच्चा, अंतं पावंति कम्ममुणा ।
कम्ममुणा सम्मुहीभूया, जे मग्गमणुसासइ ॥
- ११ अणुसासणं पुढो पाणी, वसुमं पूयणासए ।
अणासए जए दंते, दढे आरयमेहुणे ॥
- १२ णीवारे व ण लीएज्जा, छिण्णसोए अणाविले ।
अणाइले सया दंते, संधिं पत्ते अणेलिसं ॥

- १३ अणेलिसस्स खेयण्णे, ण विरुज्जेज्ज केणइ ।
मणसा वयसा चेव, कायसा चेव चक्खुमं ॥
- १४ से हु चक्खू मणुस्साणं, जे कंखाए य अंतए ।
अंतेण खुरो वहइ, चक्कं अंतेण लोदइ ॥
- १५ अंताणि धीरा सेवंति, तेण अंतकरा इहं ।
इह माणुस्सए ठाणे, धम्माराहिउं णरा ॥
- १६ णिद्वियद्वा व देवा वा, उत्तरीए इमं सुयं ।
सुयं च मेयमेगेसिं, अमणुस्सेसु णो तहा ॥
- १७ अंतं करेति दुक्खाणं, इहमेगेसिं आहियं ।
आघायं पुण एगेसिं, दुल्लहेऽयं समुस्सए ॥
- १८ इओ विद्धंसमाणस्स, पुणो संबोहि दुल्लहा ।
दुल्लहाओ तहच्चाओ जे धम्मद्वं वियागरे ॥
- १९ जे धम्मं सुद्धमक्खंति, पडिपुण्णमणेलिसं ।
अणेलिसस्स जं ठाणं, तस्स जम्मकहा कओ ॥
- २० कओ कयाइ मेहावी, उप्पज्जंति तहागया ।
तहागया य अपडिण्णा, चक्खु लोगस्सऽणुत्तरा ॥
- २१ अणुत्तरे य ठाणे से, कासवेण पवेइए ।
जं किच्चा णिव्वुडा एगे, णिद्वं पावंति पंडिया ॥
- २२ पंडिए वीरियं लद्धं, णिग्घायाय पवत्तगं ।
धुणे पुव्वकडं कम्मं, णवं चावि ण कुव्वइ ॥
- २३ ण कुव्वइ महावीरे, अणुपुव्वकडं रयं ।
रयसा सम्मुहीभूता, कम्मं हेच्चाण जं मयं ॥
- २४ जं मयं सव्वसाहूणं, तं मयं सल्लगत्तणं ।
साहइत्ताण तं तिण्णा, देवा वा अभविंसु ते ॥
- २५ अभविंसु पुरा वीरा, आगमिस्सा वि सुव्वया ।
दुण्णिबोहस्स मग्गस्स, अंतं पाउकरा तिण्णे ॥ त्ति बेमि ॥

॥ पण्णरसमं उज्झयणं समत्तं ॥

सोलसमं अज्झयणं

गाहा

- १ अहाह भगवं- एवं से दंते दविए वोसड्डकाए त्ति वच्चे- माहणे त्ति वा, समणे त्ति वा, भिक्खू त्ति वा, णिग्गंथे त्ति वा ।
- पडिआह- भंते ! कहं णु दंते दविए वोसड्डकाए त्ति वच्चे- माहणे त्ति वा समणे त्ति वा भिक्खू त्ति वा णिग्गंथे त्ति वा ? तं णो बूहि महामुणी !
- २ इति विरएसव्वपावकम्महिं पेज्ज-दोस-कलह-अब्भक्खाण-पेसुण्ण- परपरिवाय अरइरइमायामोस मिच्छादंसणसल्ल विरए समिए सहिए सया जए णो कुज्झे णो माणी माहणे त्ति वच्चे ।
- ३ एत्थ वि समणे अणिस्सिए अणियाणे आयाणं च अइवायं च मुसावायं च बहिद्धं च कोहं च माणं च मायं च लोभं च पेज्जं च दोसं च इच्चेवं जओ जओ आयाणातो अप्पणो पदोसहेउं तओ तओ आयाणाओ पुव्वं पडिविरए सिया दंते दविए वोसड्डकाए 'समणे' त्ति वच्चे ।
- ४ एत्थ वि भिक्खू अणुण्णए विणीए णामए दंते दविए वोसड्डकाए संविधुणीय विरूवरूवे परीसहोवसग्गे अज्झप्पजोगसुद्धादाणे उवट्ठिए ठियप्पा संखाए परदत्तभोई भिक्खु त्ति वच्चे ।
- ५ एत्थ वि णिग्गंथे एगे एगविऊ बुद्धे संछिण्णसोए सुसंजए सुसमिए सुसामाइए आयवायपत्ते य विऊ दुहओ वि सोयपलिच्छिण्णे णो पूया- सक्कार-लाभट्ठी, धम्मट्ठी धम्मविऊ णियागपडिवण्णे समियं चरे दंते दविए वोसड्डकाए णिग्गंथे त्ति वच्चे । से एवमेव जाणह जमहं भयंतारो । त्ति बेमि ।

॥ सोलसमं उज्झयणं समत्तं ॥

पथमो सुयखंधो समत्तो

बीओ सुयखंधो

पढमं अज्झयणं

पोंडरिए

१ सुयं मे आउसं तेणं भगवया ए वमक्खायं- इह खलु पोंडरीए णामं अज्झयणे, तस्स णं अयमद्वे पण्णत्ते- से जहाणामए पुक्खरणी सिया बहुउदगा बहुसेया बहु-पुक्खला लद्धद्धा पुंडरीगिणी पासाईया दरिसणीया अभिरूवा पडिरूवा ।

तीसे णं पुक्खरणीए तत्थ-तत्थ देसे तहिं-तहिं बहवे पउमवरपोंडरीया बुइया अणुपुव्वुट्ठिया उसिया रुइला वण्णमंता गंधमंता रसमंता फासमंता पासाईया दरिसणीया अभिरूवा पडिरूवा ।

तीसे णं पुक्खरणीए बहुमज्झदेसभाए एगे महं पउमवरपोंडरीए बुइए अणुपुव्वुट्ठिए ऊसिए रुइले वण्णमंते गंधमंते रसमंते फासमंते पासाईए दरिसणि ए अभिरूवे पडिरूवे ।

सव्वावंतिं च णं तीसे पुक्खरणीए तत्थ-तत्थ, देसे-देसे, तहिं-तहिं बहवे पउमवर-पोंडरीया बुइया अणुपुव्वुट्ठिया जाव पडिरूवा । सव्वावंतिं च णं तीसे पुक्खरणीए बहुमज्झदेसभाए एगे महं पउमवरपोंडरीए बुइए अणुपुव्वुट्ठिए जाव पडिरूवे ।

२ अह पुरिसे पुरत्थिमाओ दिसाओ आगम्म तं पुक्खरणिं, तीसे पुक्खरणीए तीरे ठिच्चा पासइ तं महं एगं पउमवरपोंडरीयं अणुपुव्वुट्ठियं ऊसियं रुइलं वण्णमंतं जाव पडिरूवं ।

तए णं से पुरिसे एवं वयासी- अहमंसि पुरिसे देस कालण्णे खेयण्णे कुसले पंडिए वियत्ते मेहावी अबाले मग्गण्णे मग्गविऊ मग्गस्स गइ परक्कमण्णू, अहमेयं पउमवरपोंडरीय उण्णिक्खिस्सामि त्ति वच्चा से पुरिसे अभिक्कमे तं पुक्खरणिं, जावं जावं च णं अभिक्कमेइ तावं तावं च णं महंते उदए, महंते सेए, पहीणे तीरं, अप्पत्ते पउमवरपोंडरीयं, णो हव्वाए णो पाराए, अंतरा पुक्खरणीए सेयंसि विसण्णे । पढमे पुरिसज्जाए ।

३ अहावरे दोच्चे पुरिसज्जाए- अह पुरिसे दक्खिणाओ दिसाओ आगम्म तं पुक्खरणिं, तीसे पुक्खरणीए तीरे ठिच्चा पासइ तं महं एगं पउमवरपोंडरीयं अणुपुव्वुट्ठियं जाव पडिरूवं, तं च एत्थ एगं पुरिसजायं पासइ पहीणे तीरं, अपत्ते पउमवरपोंडरीयं, णो हव्वाए णो पाराए, अंतरा पुक्खरणीए सेयंसि विसण्णं ।

तए णं से पुरिसे तं पुरिसं एवं वयासी-अहो णं इमे पुरिसे अदेसकालण्णे अखेयण्णे अकुसले अपंडिए अवियत्ते अमेहावी बाले णो मग्गण्णे णो मग्गविऊ णो मग्गस्स गइ परक्कमण्णू । जं णं एस पुरिसे अहं देसकालण्णे अहं खेयण्णे कुसले जाव पउमवरपोंडरीयं उण्णिक्खिस्सामि, णो य खलु एयं पउमवरपोंडरीयं एवं उण्णिक्खेयव्वं जहा णं एस पुरिसे मण्णे ।

अहमंसि पुरिसे देसकालण्णे खेयण्णे कुसले पंडिए वियत्ते मेहावी अबाले मग्गण्णे मग्गविऊ मग्गस्स गइ परक्कमण्णू, अहमेयं पउमवरपोंडरीयं उण्णिक्खिस्सामि त्ति वच्चा से पुरिसे अभिक्कमे तं पुक्खरणिं । जावं जावं च णं अभिक्कमेइ तावं तावं च णं महंते उदए महंते सेए, पहीणे तीरं, अप्पत्ते पउमवरपोंडरीयं, णो हव्वाए णो पाराए, अंतरा पुक्खरणीए सेयंसि विसण्णे। दोच्चे पुरिसजाए ।

४

अहावरे तच्चे पुरिसजाए-अह पुरिसे पच्चत्थिमाओ दिसाओ आगम्म तं पुक्खरणिं, तीसे पुक्खरणीए तीरे ठिच्चा पासइ तं महं एगं पउमवरपोंडरीयं अणुपुव्वुद्धियं जाव पडिरूवं, ते तत्थ दोण्णि पुरिसजाए पासइ, पहीणे तीरं, अप्पत्ते पउमवरपोंडरीयं, णो हव्वाए णो पाराए जाव सेयंसि विसण्णे ।

तए णं से पुरिसे एवं वयासी- अहो णं इमे पुरिसा अदेसकालण्णा अखेयण्णा अकुसला अपंडिया अवियत्ता अमेहावी बाला णो मग्गण्णा णो मग्गविऊ णो मग्गस्स गइ परक्कमण्णू, जं णं एते पुरिसा एवं मण्णे अम्हे तं पउमवरपोंडरीयं उण्णिक्खिस्सामो, णो य खलु एयं पउमवरपोंडरीयं एवं उण्णिक्खेयव्वं जहा णं एए पुरिसा मण्णे ।

अहमंसि पुरिसे देसकालण्णे खेयण्णे कुसले पंडिए वियत्ते मेहावी अबाले मग्गण्णे मग्गविऊ मग्गस्स गइ परक्कमण्णू, अहमेयं पउमवरपोंडरीय उण्णिक्खिस्सामि त्ति वच्चा से पुरिसे अभिक्कमेइ तं पुक्खरणिं, जावं जावं च णं अभिक्कमेइ तावं तावं च णं महंते उदए, महंते सेए जाव सेयंसि विसण्णे । तच्चे पुरिसजाए ।

५

अहावरे चउत्थे पुरिसजाए- अह पुरिसे उत्तराओ दिसाओ आगम्म तं पुक्खरणिं, तीसे पुक्खरणीए तीरे ठिच्चा पासइ तं महं एगं पउमवरपोंडरीयं अणुपुव्वुद्धियं जाव पडिरूवं । ते तत्थ तिण्णि पुरिसजाए पासइ पहीणे तीरं अप्पत्ते जाव सेयंसि विसण्णे।

तए णं से पुरिसे एवं वयासी- अहो णं इमे पुरिसा अदेसकालण्णा अखेयण्णा जाव णो मग्गस्स गइ परक्कमण्णू, जणं एते पुरिसा एवं मण्णे- अम्हे एयं पउमवर- पोंडरीयं उण्णिक्खिस्सामो, णो खलु एयं पउमवरपोंडरीयं एवं उण्णिक्खेयव्वं जहा णं एते पुरिसा मण्णे। अहमंसि पुरिसे देसकालण्णे खेयण्णे जाव मग्गस्स गइ परक्कमण्णू, अहमेयं पउमवरपोंडरीयं उण्णिक्खिस्सामि त्ति वच्चा से पुरिसे अभिक्कमे तं पुक्खरणिं, जावं जावं च णं अभिक्कमेइ तावं-तावं च णं महंते उदए, महंते सेए जाव विसण्णे। चउत्थे पुरिसजाए ।

६

अह भिक्खू लूहे तीरट्ठी देसकालण्णे खेयण्णे कुसले पंडिए वियत्ते मेहावी अबाले मग्गण्णे मग्गविऊ मग्गस्स गइ परक्कमण्णू अण्णयरीओ दिसाओ अणुदिसाओ वा आगम्म तं पुक्खरणिं; तीसे पोक्खरणीए तीरे ठिच्चा पासइ तं महं पउमवरपोंडरीयं जाव पडिरूवं, ते तत्थ चत्तारि पुरिसजाए पासइ पहीणे तीरं, अप्पत्ते जाव सेयंसि विसण्णे ।

तए णं से भिक्खू एवं वयासी- अहो णं इमे पुरिसा अदेसकालण्णा अखेयण्णा जाव णो मग्गस्स गइ परक्कमण्णू । जं णं एते पुरिसा एवं मण्णे- अम्हे एयं पउमवर पोंडरीयं उण्णिक्खिस्सामो, णो य खलु एयं पउमवरपोंडरीयं एवं उण्णिक्खेयव्वं जहा णं एते पुरिसा

मण्णे, अहमंसि भिक्खू लूहे तीरट्ठी देसकालण्णे खेयण्णे जाव मग्गस्स गइ परक्कमण्णू, अहमेयं पउमवर-पोंडरीयं उण्णिक्खिस्सामि त्ति वच्चा से भिक्खू णो अभिक्कमे तं पुक्खरणिं, तीसे पुक्खरणीए तीरं ठिच्चा सद्धं कुज्जा- उप्पयाहि खलु भो पउमवरपोंडरीया ! उप्पयाहि । अह से उप्पइए पउमवरपोंडरीए ।

७ किट्ठिए णाए समणाउसो ! अट्ठे पुण से जाणियव्वे भवइ ।

भंते ! त्ति णिग्गंथा य णिग्गंथीओ य समणं भगवं महावीरं वंदंति णमंसंति, वंदित्ता नमंसित्ता एवं वयासी- किट्ठिए णाए समणाउसो ! अट्ठं पुण से ण जाणामो ।

समणाउसो ! त्ति समणे भगवं महावीरे ते य बहवे णिग्गंथा य णिग्गंथीओ य आमंतेत्ता एवं वयासी-हंता समणाउसो ! आइक्खामि विभावेमि किट्ठेमि पवेदेमि सअट्ठं सहेउं सणिमित्तं भुज्जो-भुज्जो उवदंसेमि ।

८ से बेमि- लोयं च खलु मए अप्पाहट्ठु समणाउसो ! सा पुक्खरणी बुइया, कम्मं च खलु मए अप्पाहट्ठु समणाउसो ! से उदए बुइए । कामभोगे य खलु मए अप्पाहट्ठु समणाउसो ! से सेए बुइए । जण-जाणवयं च खलु मए अप्पाहट्ठु समणाउसो ! ते बहवे पउमवरपोंडरीया बुइया । रायाणं च खलु मए अप्पाहट्ठु समणाउसो ! से एगे महं पउमवरपोंडरीयं बुइए । अण्णउत्थिया य खलु मए अप्पाहट्ठु समणाउसो ! ते चत्तारि पुरिसजाया बुइया । धम्मं च खलु मए अप्पाहट्ठु समणाउसो ! से भिक्खू बुइए । धम्मतिथं च खलु मए अप्पाहट्ठु समणाउसो ! से तीरे बुइए । धम्मकहं च खलु मए अप्पाहट्ठु समणाउसो ! से सद्धे बुइए । णिव्वाणं च खलु मए अप्पाहट्ठु समणाउसो ! से उप्पाए बुइए, एवमेयं च खलु मए अप्पाहट्ठु समणाउसो ! से एवमेयं बुइयं ।

९ इह खलु पाईणं वा पडीणं वा उदीणं वा दाहिणं वा संति एगइया मणुस्सा भवंति अणुपुव्वेण लोगं उववण्णा, तं जहा- आरिया वेगे, अणारिया वेगे उच्चागोया वेगे णीयागोया वेगे, कायमंता वेगे, हस्समंता वेगे, सुवण्णा वेगे, दुवण्णा वेगे, सुरूवा वेगे दुरूवा वेगे ।

तेसिं च णं महं एगे राया भवइ- महाहिमवंतमलयमंदरमहिंदसारे जाव अच्चंत- विसुद्ध- रायकुलवंसप्पसूए णिरंतरायलक्खणविराइयंगमंगे बहुजण बहुमाणपूइए सव्वगुणसमिद्धे खत्तिए मुदिए मुद्धाभिसित्ते माउपिउसुजाए दयपत्ते सीमंकरे सीमंधरे खेमंकरे खेमंधरे मणुस्सिंदे जणवयपिया जणवयपुरोहिए सेउकरे केउकरे णरपवरे पुरिसवरे पुरिससीहे पुरिसआसीविसे पुरिसवरपोंडरीए पुरिसवरगंधहत्थी अट्ठे दित्ते वित्ते वित्थण्णविउल-भवण- सयणासण- जाण- वाहणाइण्णे बहुधण-बहुजायरूव-रयए आओग-पओगसंपउत्ते विच्छइडिय- पउरभत्त-पाणे बहुदासी-दास-गो-महिस-गवेलगप्पभूए पडिपुण्णकोस-कोट्ठागाराउधागारे बलवं दुब्बलपच्चामित्ते ओहयकंटयं णिहयकंटयं मलियकंटयं उद्धियकंटयं अकंटयं ओहयसत्तू णिहयसत्तू मलियसत्तू उद्धियसत्तू णिज्जिय- सत्तू पराइयसत्तू ववगयदुब्बिक्खमारिभयविप्पमुक्कं रायवण्णओ जहा उववाइए जाव पसंतडिंबडमरं रज्जं पसासेमाणे विहरइ ।

- १० तस्स णं रण्णो परिसा भवइ-उग्गा उग्गपुत्ता, भोगा भोगपुत्ता, इक्खागा इक्खागपुत्ता, णाया णायपुत्ता, कोरव्वा कोरव्वपुत्ता, भट्ठा भट्ठपुत्ता, माहणा माहणपुत्ता, लेच्छई लेच्छई पुत्ता, पसत्थारो पसत्थपुत्ता, सेणावई सेणावईपुत्ता ।
- तेसिं च णं एगइए सइढी भवइ, कामं तं समणा य माहणा य संपहारिंसु गमणाए । तत्थ अण्णयरेणं धम्मणेणं पण्णत्तारो वयं इमेणं धम्मणेणं पण्णवइस्सामो, से एवमायाणह भयंतारो ! जहा मे एस धम्मो सुयक्खाए सुपण्णत्ते भवइ ।
- ११ तं जहा- उड्ढं पायतला, अहे केसग्गमत्थगा तिरियं तयपरियंते जीवे । एस आयापज्जवे कसिणे। एस जीवे जीवइ, एस मए णो जीवइ । सरीरे धरमाणे धरइ, विणट्ठम्मि य णो धरइ, एए तं जीवियं भवइ, आदहणाए परेहिं णिज्जइ, अगणिझामिए सरीरे कवोयवण्णाणि अट्ठीणि भवन्ति, आसदीपंचमा पुरिसा गामं पच्चागच्छन्ति । एवं असंते असंविज्जमाणे ।
- १२ जेसिं तं सुयक्खायं भवइ- अण्णो भवइ जीवो, अण्णं सरीरं । तम्हा ते एवं णो विप्पडिवेदंति- अयमाउसो ! आया दीहे इ वा हस्से इ वा परिमंडले इ वा वट्ठे इ वा तंसे इ वा चउरंसे इ वा छलंसे इ वा अट्ठंसे इ वा आयते इ वा किण्हे इ वा णीले इ वा लोहिए इ वा हालिद्धे इ वा सुक्किले इ वा सुब्भिगंधे इ वा दुब्भिगंधे इ वा तित्ते इ वा कडुए इ वा कसाए इ वा अंबिले इ वा महुरे इ वा । कक्खडे इ वा मउए इ वा गरुए इ वा लहुए इ वा सिए इ वा उसिणे इ वा णिद्धे इ वा लुक्खे इ वा । एवं असंते असंविज्जमाणे ।
- १३ जेसिं तं सुयक्खायं भवइ- अण्णो जीवो अण्णं सरीरं, तम्हा ते णो एवं उवलभंति- से जहाणामए केइ पुरिसे कोसीओ असिं अभिणिव्वट्ठित्ताणं उवदंसेज्जा- अयमाउसो ! असी, अयं कोसी । एवामेव णत्थि केइ पुरिसे अभिणिव्वट्ठित्ताणं उवदंसेइ- अयमाउसो ! आया, अयं सरीरे ।
- १४ से जहाणामए केइ पुरिसे मुंजाओ इसीयं अभिणिव्वट्ठित्ताणं उवदंसेज्जा- अयमाउसो ! मुंजो, अयं इसीया। एवामेव णत्थि केइ पुरिसे अभिणिव्वट्ठित्ताणं उवदंसेत्तारो-अयमाउसो! आया अयं सरीरे।
- १५ से जहाणामए केइ पुरिसे मंसाओ अट्ठिं अभिणिव्वट्ठित्ताणं उवदंसेज्जा- अयमाउसो ! मंसे, अयं अट्ठी । एवामेव णत्थि केइ पुरिसे अभिणिव्वट्ठित्ताणं उवदंसेत्तारो- अयमाउसो ! आया, अयं सरीरे ।
- १६ से जहाणामए केइ पुरिसे करतलाओ आमलकं अभिणिव्वट्ठित्ताणं उवदंसेज्जा-अयमाउसो ! करतले, अयं आमलए । एवामेव णत्थि केइ पुरिसे अभिणिव्वट्ठित्ताणं उवदंसेत्तारो- अयमाउसो ! आया, अयं सरीरे ।
- १७ से जहाणामए केइ पुरिसे दहीओ णवणीयं अभिणिव्वट्ठित्ताणं उवदंसेज्जा- अयमाउसो ! णवणीयं, अयं दही । एवामेव णत्थि केइ पुरिसे अभिणिव्वट्ठित्ताणं उवदंसेत्तारो- अयमाउसो ! आया, अयं सरीरे ।

- १८ से जहाणामए केइ पुरिसे तिलेहिंतो तेल्लं अभिणिव्वट्टित्ताणं उवदंसेज्जा- अयमाउसो ! तेल्ले, अयं पिण्णाए । एवामेव णत्थि केइ पुरिसे अभिणिव्वट्टित्ताणं उवदंसेत्तारो- अयमाउसो ! आया, अयं सरीरे ।
- १९ से जहाणामए केइ पुरिसे इक्खूओ खोयरसं अभिणिव्वट्टित्ताणं उवदंसेज्जा-अयमाउसो ! खोयरसे, अयं छोए । एवामेव णत्थि केइ पुरिसे अभिणिव्वट्टित्ताणं उवदंसेत्तारो-अयमाउसो ! आया, अयं सरीरे ।
- २० से जहाणामए केइ पुरिसे अरणीओ अग्गिं अभिणिव्वट्टित्ताणं उवदंसेज्जा- अयमाउसो ! अरणी, अयं अग्गी । एवामेव णत्थि केइ पुरिसे अभिणिव्वट्टित्ताणं उवदंसेत्तारो- अयमाउसो ! आया, अयं सरीरे । एवं असतो असंविज्जमाणे । जेसिं तं सुयक्खायं भवइ तं जहा- अण्णो जीवो अण्णं सरीरं, तम्हा तं मिच्छा ।
- २१ से हंता हणह खणह छणह [छिंदह] दहह पयह आलुंपह विलुंपह सहसक्कारेह विपरामुसह, एत्तावताव जीवे, णत्थि परलोए । ते णो एवं विप्पडिवेदंति, तं जहा- किरिया इ वा अकिरिया इ वा सुक्कडे इ वा दुक्कडे इ वा कल्लाणे इ वा पावए इ वा साहू इ वा असाहू इ वा सिद्धि इ वा असिद्धि इ वा णिरए इ वा अणिरए इ वा । एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भोयणाए ।
- २२ एवं एगे पागब्भिया णिक्खम्मं मामगं धम्मं पण्णवेंति । तं सद्दहमाणा तं पत्तियमाणा तं रोएमाणा साहु सुयक्खाए समणे ति वा माहणे ति वा । कामं खलु आउसो ! तुमं पूययामो, तं जहा- असणेण वा पाणेण वा खाइमेण साइमेण वा वत्थेण वा पडिग्गहेण वा कंबलेण वा पायपुंछणेण वा । तत्थेगे पूयणाए समाउट्ठिंसु, तत्थेगे पूयणाए णिगायइंसु ।
- २३ पुव्वामेव तेसिं णायं भवइ- समणा भविस्सामो अणगारा अकिंचणा अपुत्ता अपसू परदत्तभोई भिक्खूणो, पावं कम्मं णो करिस्सामो समुट्ठाए । ते अप्पणा अप्पडिविरया भवंति । सयमाइयंति, अण्णे वि आइयावेंति, अण्णं पि आइयंतं समणुजाणंति । एवामेव ते इत्थिकामभोगेहिं मुच्छिया गिद्धा गढिया अज्झोववण्णा लुद्धा रागदोसवसट्ठा । ते णो अप्पाणं समुच्छेदंति, णो परं समुच्छेदंति, णो अण्णाइं पाणाइं भूयाइं जीवाइं सत्ताइं समुच्छेदंति । पहीणा पुव्वसंजोगं, आरियं मग्गं असंपत्ता, इति ते णो हव्वाए णो पाराए, अंतरा कामभोगेसु विसण्णा । इति पढमे पुरिसज्जाए तज्जीवतस्सरीरिए आहिए ।
- २४ अहावरे दोच्चे पुरिसजाए पंचमहब्भूइए त्ति आहिज्जइ- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति अणुपुव्वेणं लोयं उववण्णा, तं जहा- आरिया वेगे एवं जाव दुरूवा वेगे । तेसिं च णं महं एगे राया भवइ महया; एवं चेव णिरवसेसं जाव सेणावइपुत्ता । तेसिं च णं एगइए सइढी भवइ, कामं तं समणा य माहणा पहारिंसु गमणाए । तत्थ अण्णयरेणं धम्मणेणं पण्णत्तारो वयमिमेणं पण्णवइस्सामो, से एवमायाणह भयंतारो ! जहा मे एस धम्मो सुअक्खाए सुपण्णत्ते भवइ ।

- २५] इह खलु पंच महब्भूया जेहिं णो विज्जइ किरिया इ वा अकिरिया इ वा सुकडे इ वा दुक्कडे इ वा कल्लाणे इ वा पावए इ वा साहू इ वा असाहू इ वा सिद्धि इ वा असिद्धि इ वा णिरए इ वा अणिरए इ वा अवि यंतसो तणमायमवि ।
- २६] तं च पदुद्देसेणं [पिहुद्देसेणं] पुढोभूयसमवायं जाणेज्जा, तं जहा- पुढवी एगे महब्भूए, आऊ दोच्चे महब्भूए, तेऊ तच्चे महब्भूए, वाऊ चउत्थे महब्भूए, आगासे पंचमे महब्भूए । इच्चेए पंच महब्भूया अणिम्मिया अणिम्माविया अकडा णो कित्तिमा णो कडगा अणाइया अणिहणा अवंझा अपुरोहिया सतंता सासया।
- २७] आयछट्ठा पुण एगे एवमाहु- सतो णत्थि विणासो, असतो णत्थि संभवो । एतावताव जीवकाए, एतावताव अत्थिकाए, एतावताव सच्चलोए, एयं मुहं लोगस्स करणयाए, अवियंतसो तणमायमवि ।
- से किणं किणावेमाणे, हणं घायमाणे, पयं पयावेमाणे, अवि अंतसो पुरिसमवि विक्किणित्ता घायइत्ता, एत्थ वि जाणाहि णत्थि एत्थ दोसो ।
- २८] ते णो एयं विप्पडिवेदेति, तं जहा- किरिया इ वा जाव अणिरए इ वा । एवामेव ते विरूवरूवेहिं कम्मसमारंभेहिं विरूवरूवाइं कामभोगाइं समारंभइ भोयणाए । एवामेव ते अणारिया विप्पडिवण्णा तं सद्धमाणा तं पत्तियमाणा जाव इति ते णो हव्वाए णो पाराए, अंतरा कामभोगेसु विसण्णा ।
- दोच्चे पुरिसज्जाए पंचमहब्भूइए त्ति आहिए ।
- २९] अहावरे तच्चे पुरिसजाए ईसरकारणिए त्ति आहिज्जइ । इह खलु पाइणं वा जाव संतेगइया मणुस्सा भवंति अणुपुव्वेणं लोयं उववण्णा, तं जहा- आरिया वेगे जाव तेसिं च णं महंते एगे राया भवइ जाव सेणावइपुत्ता । तेसिं च णं एगइए सड्ढी भवइ, कामं तं समणा य माहणा य पहारिंसु गमणाए जाव जहा मे एस धम्मे सुअक्खाए सुपण्णत्ते भवइ ।
- ३०] इह खलु धम्मा पुरिसादीया पुरिसोत्तरिया पुरिसप्पणीया पुरिससंभूया पुरिस-पज्जोइया पुरिसमभिसमण्णागया पुरिसमेव अभिभूय चिद्धंति ।
- से जहाणामए गंडे सिया सरीरे जाए सरीरे संवुड्ढे सरीरे अभिसमण्णागए सरीरमेव अभिभूय चिद्धइ । एवामेव धम्मा वि पुरिसादिया जाव पुरिसमेव अभिभूय चिद्धंति ।
- ३१] से जहाणामए अरइयं [अरइ] सिया सरीरे जाया, सरीरे संवुड्ढा, सरीरे अभिसमण्णागए सरीरमेव अभिभूय चिद्धइ । एवामेव धम्मा पुरिसादिया जाव पुरिस- मेव अभिभूय चिद्धंति ।
- ३२] से जहाणामए वम्मिए सिया पुढविजाए पुढविसंवुड्ढे पुढविअभिसमण्णागए पुढविमेव अभिभूय चिद्धइ । एवामेव धम्मा वि पुरिसादिया जाव अभिभूय चिद्धंति ।
- ३३] से जहाणामए रुक्खे सिया पुढविजाए पुढविसंवुड्ढे पुढविअभिसमण्णागए पुढविमेव अभिभूय चिद्धइ । एवामेव धम्मा वि पुरिसादिया जाव अभिभूय चिद्धंति ।

- ३४ से जहाणामए पुक्खरणी सिया पुढविजाया जाव पुढविमेव अभिभूय चिट्ठंति । एवामेव धम्मा वि पुरिसादिया जाव पुरिसमेव अभिभूय चिट्ठंति ।
- ३५ से जहाणामए उदगपुक्खले सिया उदगजाए जाव उदगमेव अभिभूय चिट्ठंति। एवामेव धम्मा वि जाव पुरिसमेव अभिभूय चिट्ठंति ।
- ३६ से जहाणामए उदगबुब्बुए सिया उदगजाए जाव उदगमेव अभिभूय चिट्ठंति। एवामेव धम्मा वि पुरिसादिया जाव पुरिसमेव अभिभूय चिट्ठंति ।
- ३७ जं पि य इमं समणाणं णिग्गंथाणं उद्धिदं पणीयं विअंजियं दुवालसंगं गणिपिडगं, तं जहा-आयारो जाव दिट्ठिवाओ, सव्वमेयं मिच्छा, ण एयं तहियं, ण एयं आहत्तहियं । इमं सच्चं, इमं तहियं, इमं आहतहियं, ते एवं सण्णं कुव्वंति, ते एवं सण्णं संठवेंति, ते एवं सण्णं सोवट्ठवयंति, तमेवं ते तज्जाइयं दुक्खं णाइउट्ठंति सउणी पंजरं जहा ।
- ३८ ते णो एयं विप्पडिवेदेंति तं जहा- किरिया इ वा जाव अणिरए त्ति वा । एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभइ भोयणाए । एवामेव ते अणारिया विप्पडिवण्णा, तं सद्धहमाणा जाव इति ते णो हव्वाए णो पाराए, अंतरा कामभोगेसु विसण्णा। तच्चे पुरिसज्जाए इस्सरकारणिए त्ति आहिए ।
- ३९ अहावरे चउत्थे पुरिसजाए णियतिवाइए त्ति आहिज्जइ । इह खलु पाईणं वा तहेव जाव सेणावइपुत्ता वा; तेसिं च णं एगइए सड्ढी भवइ, कामं तं समणा य माहणा संपहारिंसु गमणाए जाव जहा मे एस धम्मे सुअक्खाए सुपण्णत्ते भवइ ।
- ४० इह खलु दुवे पुरिसा भवंति- एगे पुरिसे किरियमाइक्खइ, एगे पुरिसे णोकिरियमाइक्खइ । जे य पुरिसे किरियमाइक्खइ, जे य पुरिसे णोकिरिय- माइक्खइ, दो वि ते पुरिसा तुल्ला एगट्ठा कारणमावण्णा ।
- बाले पुण एवं विप्पडिवेदेइ कारणमावण्णे, तं जहा- जो अहमंसि दुक्खामि वा सोयामि वा जूरामि वा तिप्पामि वा पिड्डामि वा परितप्पामि वा अहं तमकासी, परो वा जं दुक्खइ वा सोयइ वा जूरइ वा तिप्पइ वा पिड्डइ वा परितप्पइ वा परो एयमकासि, एवं से बाले सकारणं वा परकारणं वा एवं विप्पडिवेदेइ कारणमावण्णे ।
- मेहावी पुण एवं विप्पडिवेदेइ कारणमावण्णे- अहमंसि दुक्खामि वा सोयामि वा जूरामि वा तिप्पामि वा पिड्डामि वा परितप्पामि वा णो अहमेतमकासि परो वा जं दुक्खइ वा जाव परितप्पइ वा णो परो एयमकासि । एवं से मेहावी सकारणं वा परकारणं वा एवं विप्पडिवेदेइ कारणमावण्णे ।
- ४१ से बेमि- पाईणं वा जाव जे तसथावरा पाणा ते एवं संघायमावज्जंति, ते एवं विपरियायमावज्जंति, ते एवं विवेगमावज्जंति, ते एवं विहाणमागच्छंति, ते एवं संगइयंति । उवेहाए णो एयं विप्पडिवेदेंति, तं जहा- किरिया इ वा जाव णिरए इ वा अणिरए इ वा । एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भोयणाए । एवामेव ते

अणारिया विप्पडिवण्णा तं सद्वहमाणा जाव इति ते णो हव्वाए णो पाराए, अंतरा कामभोगेसु विसण्णा ।

चउत्थे पुरिसजाए णियतिवाइए त्ति आहिए ।

४२ इच्चेए चत्तारि पुरिसजाया णाणापण्णा णाणाछंदा णाणासीला णाणादिट्ठी णाणारुई णाणारंभा णाणाअज्झवसाणसंजुत्ता पहीणपुव्वसंजोगा आरियं मग्गं असंपत्ता, इति ते णो हव्वाए णो पाराए, अंतरा कामभोगेसु विसण्णा ।

४३ से बेमि पाईण वा जाव संतेगइया मणुस्सा भवंति, तं जहा- आरिया वेगे अणारिया वेगे, उच्चागोया वेगे णीयागोया वेगे, कायमंता वेगे हस्समंता वेगे, सुवण्णा वेगे दुवण्णा वेगे, सुरूवा वेगे दुरूवा वेगे । तेसिं च णं खेत्तवत्थूणि परिग्गहियाणि भवंति, तं जहा-अप्पतरा वा भुज्जतरा वा । तेसिं च णं जण- जाणवयाइं परिग्गहियाइं भवंति, तं जहा-अप्पतरा वा भुज्जतरा वा; तहप्पगारेहिं कुलेहिं आगम्म अभिभूय एगे भिक्खायरियाए समुट्ठिया । सतो वा वि एगे णायओ य उवगरणं च विप्पजहाय भिक्खायरियाए समुट्ठिया; असतो वा वि एगे णायओ वा अणायओ य उवगरणं च विप्पजहाय भिक्खायरियाए समुट्ठिया भवंति ।

४४ जे ते सतो वा असतो वा णायओ अणायओ य उवगरणं च विप्पजहाय भिक्खायरियाए समुट्ठिया । पुव्वामेव तेहिं णायं भवइ, तं जहा- इह खलु पुरिसे अण्णमण्णं ममद्वाए एवं विप्पडिवेदेइ, तं जहा- खेत्तं मे, वत्थु मे, हिरण्णं मे, सुवण्णं मे, धणं मे, धण्णं मे, कंसं मे, दूसं मे, विउल-धण-कणग-रयण-मणि-मोत्तिय-संख-सिल-प्पवाल-रत्त-रयण-संतसार-सावएज्जं मे, सद्दा मे, रूवा मे, गंधा मे, रसा मे, फासा मे । एते खलु मे कामभोगा, अहमवि एतेसिं ।

४५ से मेहावी पुव्वामेव अप्पणा एवं समभिजाणेज्जा, तं जहा- इह खलु मम अण्णयरे दुक्खे रोगायंके समुप्पज्जेज्जा- अणिट्ठे अकंते अप्पिए असुभे, अमणुण्णे अमणामे, दुक्खे णो सुहे, से हंता भयंतारो कामभोगा ! इमं मम अण्णयरं दुक्खं रोगायंके परियाइयह- अणिट्ठं अकंतं अप्पियं असुभं अमणुण्णं अमणामं, दुक्खं णो सुहं, जेणाहं दुक्खामि वा सोयामि वा झूरामि वा तिप्पामि वा पिड्डामि वा परितप्पामि वा; इमाओ ते अण्णयराओ दुक्खाओ रोगायंकाओ पडिमोयह अणिट्ठाओ जाव अमणामाओ, दुक्खाओ णो सुहाओ । एवामेव णो लद्धपुव्वं भवइ ।

इह खलु कामभोगा णो ताणाए वा सरणाए वा; पुरिसे वा एगया पुव्विं कामभोगे विप्पजहइ, कामभोगा वा एगया पुव्विं पुरिसं विप्पजहंति, अण्णे खलु कामभोगा, अण्णो अहमंसि; से किमंग पुण वयं अण्णमण्णेहिं कामभोगेहिं मुच्छामो ? इति संखाए णं वयं कामभोगे विप्पजहिस्सामो ।

४६ से मेहावी जाणेज्जा बाहिरंगमेतं, इणमेव उवणीयतरांगं, तं जहा- माया मे, पिया मे, भाया मे, भज्जा मे, भगिणि मे, पुत्ता मे, धूया मे, णत्ता मे, सुण्हा मे, पेसा मे, सहा मे, सयण-संगंथ- संथुया मे, एए खलु आयओ, अहमवि एतेसिं ।

४७ से मेहावी पुव्वामेव अप्पणा एवं समभिजाणेज्जा- इह खलु मम अण्णयरे दुक्खे रोगायंके समुप्पज्जेज्जा-अणिट्ठे जाव दुक्खे णो सुहे, से हंता भयंतारो णायओ ! इमं मम अण्णयरं दुक्खं रोगायंके परियाइयह- अणिट्ठं जाव णो सुहं, माहं दुक्खामि वा जाव परितप्पामि वा, इमाओ मे अण्णयराओ दुक्खाओ रोगायंकाओ पडिमोयह अणिट्ठाओ जाव णो सुहाओ । एवमेव णो लद्धपुव्वं भवइ ।

तेसिं वा वि भयंताराणं मम णाययाणं अण्णयरे दुक्खे रोगायंके समुप्पज्जेज्जा अणिट्ठे जाव णो सुहे, से हंता अहमेतेसिं भयंताराणं णागयाणं इमं अण्णतरं दुक्खं रोगायंके परियाइयामि- अणिट्ठं जाव णो सुहं, मा मे दुक्खंतु वा जाव परितप्पंतु वा, इमाओ णं अण्णयराओ दुक्खाओ रोगायंकाओ परिमोएमि अणिट्ठाओ जाव णो सुहाओ । एवामेव णो लद्धपुव्वं भवइ ।

४८ अण्णस्स दुक्खं अण्णो णो परियाइयइ, अण्णेण कडं कम्मं अण्णो णो पडिसंवेदेइ, पत्तेयं जायइ, पत्तेयं मरइ, पत्तेयं चयइ, पत्तेयं उववज्जइ, पत्तेयं झंझा, पत्तेयं सण्णा, पत्तेयं मण्णा, एवं विण्णू वेयणा इति खलु णाइसंजोगा णो ताणाए वा णो सरणाए वा, पुरिसो वा एगया पुव्विं णाइसंयोगे विप्पजहइ, णाइसंयोगा वा एगया पुव्विं पुरिसं विप्पजहंति, अण्णे खलु णाइसंयोगा अण्णो अहमंसि, से किमंग पुण वयं अण्णमण्णेहिं णाइसंयोगेहिं मुच्छामो ? इति संखाए णं वयं णाइसंजोगे विप्पजहिस्सामो ।

४९ से मेहावी जाणेज्जा बाहिरगमेतं; इणमेव उवणीयतरागं, तं जहा- हत्था मे, पाया मे, बाहा मे, उरू मे, उदरं मे, सीसं मे, सीलं मे, आउ मे, बलं मे, वण्णो मे, तया मे, छाया मे, सोयं मे, चक्खुं मे, घाणं मे, जिब्भा मे, फासा मे, ममाति । जंसि वयाओ परिजूरइ तं जहा- आऊओ बलाओ वण्णाओ तयाओ छायाओ सोयाओ जाव फासाओ, सुसंधिता संधी विसंधी भवइ, वलितरंगे गाए भवइ, किण्हा केसा पलिया भवंति, जं पि य इमं सरीरगं उरालं आहारोवचियं एयं पि य मे अणुपुव्वेणं विप्पजहियव्वं भविस्सइ ।

५० एयं संखाए से भिक्खू भिक्खायरियाए समुट्ठिए दुहओ लोगं जाणेज्जा, तं जहा- जीवा चेव अजीवा चेव, तसा चेव थावरा चेव ।

५१ इह खलु गारत्था सारंभा सपरिग्गहा । संतेगइया समण-माहणा सारंभा सपरिग्गहा- जे इमे तस-थावरा पाणा ते सयं समारंभंति, अण्णेण वि समारंभावेंति, अण्णं पि समारंभंतं समणुजाणंति ।

इह खलु गारत्था सारंभा सपरिग्गहा, संतेगइया समण-माहणा वि सारंभा सपरिग्गहा, जे इमे कामभोगा सचित्ता वा अचित्ता वा ते सयं चेव परिगिण्हंति, अण्णेण वि परिगिण्हावेंति, अण्णं पि परिगिण्हंतं समणुजाणंति ।

इह खलु गारत्था सारंभा सपरिग्गहा, संतेगइया समण-माहणा वि सारंभा सपरिग्गहा, अहं खलु अणारंभे अपरिग्गहे । जे खलु गारत्था सारंभा सपरिग्गहा, संतेगइया समण-माहणा वि सारंभा सपरिग्गहा, एएसिं चेव णिस्साए बंभचेरं चरिस्सामो, कस्स णं तं हेउं ? जहा पुव्वं तहा अवरं, जहा अवरं तहा पुव्वं । अंजू चेते अणुवरया अणुवट्ठिया पुणरवि तारिसगा चेव ।

- ५२ जे खलु गारत्था सारंभा सपरिग्गहा, संतेगइया समण-माहणा सारंभा सपरिग्गहा, दुहओ पावाइं इति संखाए दोहिं वि अंतेहिं अदिस्समाणे इति भिक्खू रीएज्जा । से बेमि- पाईणं वा पडीणं वा उदीणं वा दाहिणं वा एवं से परिण्णायकम्म, एवं से विवेगकम्म, एवं से वियंतकारए भवतीति मक्खायं ।
- ५३ तत्थ खलु भगवया छज्जीवणिकाय हेऊ पण्णत्ता, तं जहा- पुढविकाइया जाव तसकाइया । से जहाणामए मम अस्सायं दंडेण वा अट्ठीण वा मुट्ठीण वा लेलुणा वा कवालेणं वा आउट्टिज्जमाणस्स वा हम्ममाणस्स वा तज्जिज्जमाणस्स वा ताडिज्जमाणस्स वा परिताविज्जमाणस्स वा किलामिज्जमाणस्स वा उद्विज्ज-माणस्स वा जाव लोमुक्खणणमायमवि हिंसाकरं दुक्खं भयं पडिसंवेदेमि, इच्चेवं जाण सव्वे पाणा जाव सत्ता दंडेण वा जाव कवालेण वा आउट्टिज्जमाणा वा हम्ममाणा वा तज्जिज्जमाणा वा ताडिज्जमाणा वा परियाविज्जमाणा वा किलामिज्जमाणा वा उद्विज्जमाणा वा जाव लोमुक्खणणमायमवि हिंसाकरं दुक्खं भयं पडिसंवेदेंति। एवं णच्चा सव्वे पाणा जाव सव्वे सत्ता ण हंतव्वा, ण अज्जावेयव्वा, ण परिघेत्तव्वा, ण परियावेयव्वा, ण उद्वेयव्वा ।
- ५४ से बेमि- जे य अईया जे य पडुपण्णा जे य आगमेस्सा अरहंता भगवंतो सव्वे ते एवमाइक्खंति, एवं भासैंति, एवं पण्णवेंति, एवं परूवेंति-सव्वे पाणा जाव सव्वे सत्ता ण हंतव्वा, ण अज्झावेयव्वा, ण परिघेतव्वा, ण परियावेयव्वा, ण उद्वेयव्वा, एस धम्मो धुवे णिइए सासए, समेच्च लोगं खेयण्णेहिं पवेइए ।
- ५५ एवं से भिक्खू विरए पाणाइवायाओ जाव विरए परिग्गहाओ । णो दंतपक्खालणेणं दंते पक्खालेज्जा, णो अंजणं, णो वमणं, णो धूमं णो धूमणेत्तं पि आविए ।
- ५६ से भिक्खू अकिरिए अलूसए अकोहे अमाणे अमाए अलोभे उवसंते परिणिव्वुडे। णो आसंसं पुरओ करेज्जा- इमेण मे दिट्ठेण वा सुएण वा मुएण वा विण्णाएण वा इमेण वा सुचरिय तव- णियम-बंधेचरेवासेणं इमेण वा जायामायावुत्तिएणं धम्मणेणं इओ चुए पेच्चा देवे सिया कामभोगाण वसवत्ती, सिद्धे वा अदुक्खमसुभे, एत्थ वि सिया, एत्थ वि णो सिया ।
- ५७ से भिक्खू सद्धेहिं अमुच्छिए, रूवेहिं अमुच्छिए, गंधेहिं अमुच्छिए, रसेहिं अमुच्छिए, फासेहिं अमुच्छिए, विरए कोहाओ माणाओ मायाओ लोभाओ पेज्जाओ दोसाओ कलहाओ अब्भक्खाणाओ पेसुण्णाओ परपरिवायाओ अरइरईओ मायामोसाओ मिच्छादंसणसल्लाओ, इति से महया आयाणाओ उवसंते उवट्ठिए पडिविरए ।
- ५८ से भिक्खू जे इमे तस-थावरा पाणा भवंति ते णो सयं समारंभइ, णेव अण्णेहिं समारंभावेइ, अण्णे समारंभंते वि ण समणुजाणइ, इति से महया आयाणाओ उवसंते उवट्ठिए पडिविरए ।
- ५९ से भिक्खू जे इमे कामभोगा सचित्ता वा अचित्ता वा ते णो सयं परिणिहइ, णेव अण्णेण परिणिहावेइ, अण्णं परिणिहंतं पि ण समणुजाणइ, इति से महया आयाणाओ उवसंते उवट्ठिए पडिविरए ।

- ६० से भिक्खू जं पि य इमं संपराइयं कम्मं कज्जइ णो तं सयं करेइ, णेव अण्णेणं कारवेइ, अण्णं पि करेतं णाणुजाणइ, इति से महया आयाणाओ उवसंते उवट्ठिए पडिविरए ।
- ६१ से भिक्खू जं पुण जाणेज्जा असणं वा पाणं वा खाइमं वा साइमं वा अस्सिं पडियाए एगं साहम्मियं समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेजं अणिसिद्धं अभिहडं आहट्टु उद्देसिय चेइयं तं णो सयं भुंजइ, णो अण्णेणं भुंजावेइ, अण्णं पि भुंजंतं ण समणुजाणइ, इति से महया आदाणाओ उवसंते उवट्ठिए पडिविरए ।
- ६२ से भिक्खु अह पुण एवं जाणेज्जा, तं जहा- विज्जइ तेसिं परक्कमे जस्सट्ठाए चेइयं सिया, तं जहा- अप्पणो से पुत्ताणं, धूयाणं, सुण्हाणं, धाईणं, णाईणं, राईणं, दासाणं, दासीणं कम्मकराणं, कम्मकरीणं, आएसाए, पुढो पहेणाए, सामासाए, पायरासाए, सण्णिहिसंण्णिचओ कज्जइ, इहमेगेसिं माणवाणं भोयणाए । तत्थ भिक्खू परकड- परणिट्ठियं उग्गमुप्पायणेसणासुद्धं सत्थाईयं सत्थपरिणामियं अविहिंसियं एसियं वेसियं सामुदाणियं [पण्णमसणं] छण्णमण्णं कारणट्ठा पमाणजुत्तं अक्खोवंजण वणलेवणभूयं संजमजायामायावत्तियं बिलमिव पण्णगभूएणं अप्पाणेणं आहारं आहारेज्जा, तं जहा- अण्णं अण्णकाले, पाणं पाणकाले, वत्थं वत्थकाले, लेणं लेणकाले, सयणं सयणकाले ।
- ६३ से भिक्खू मायण्णे अण्णयरिं दिसं वा अणुदिसं वा पडिवण्णे धम्मं आइक्खे, विभए, किट्ठे; उवट्ठिएसु वा अणुवट्ठिएसु वा सुस्सूसमाणेसु पवेयए । संतिं विरतिं उवसमं णिव्वाणं सोयवियं अज्जवियं मद्धवियं लाघवियं अणइवाइयं सव्वेसिं पाणाणं सव्वसिं भूयाणं सव्वेसिं जीवाणं सव्वेसिं सत्ताणं अणुवीइ किट्ठए धम्मं ।
- ६४ से भिक्खू धम्मं किट्ठमाणे णो अण्णस्स हेउं धम्मं आइक्खेज्जा, णो पाणस्स हेउ धम्मं आइक्खेज्जा, णो वत्थस्स हेउं धम्मं आइक्खेज्जा, णो लेणस्स हेउं धम्मं आइक्खेज्जा, णो सयणस्स हेउं धम्मं आइक्खेज्जा, णो अण्णेसिं विरूवरूवाणं कामभोगाणं हेउं धम्ममाइक्खेज्जा, अगिलाए धम्ममाइक्खेज्जा, णण्णत्थ कम्म-णिज्जरट्ठयाए धम्मं आइक्खेज्जा ।
- ६५ इह खलु तस्स भिक्खुस्स अंतियं धम्मं सोच्चा णिसम्म उट्ठाय वीरा अस्सिं धम्मं समुट्ठिया, जे तस्स भिक्खुस्स अंतियं धम्मं सोच्चा णिसम्म सम्मं उट्ठाणेणं उट्ठाय वीरा अस्सिं धम्मं समुट्ठिया, ते एवं सव्वोवगया, ते एवं सव्वोवरया, त एवं सव्वोवसंता, ते एवं सव्वत्ताए परिणिव्वुडे त्ति बेमि ।
- ६६ एवं से भिक्खू धम्मट्ठी धम्मविउ णियागपडिवण्णे, से जहेयं बुइयं, अदुवा पत्ते पउमवरपोंडरीयं अदुवा अपत्ते पउमवरपोंडरीयं ।
- ६७ एवं से भिक्खू परिण्णायकम्मं परिण्णायसंगे परिण्णायगिहवासे उवसंते समिए सहिए सया जए । से एयं वयणिज्जे तं जहा- समणे ति वा माहणे ति वा खंते ति वा दंते ति वा गुत्ते ति वा मुत्ते ति वा इसी ति वा मुणी ति वा कई ति वा विदू ति वा भिक्खू ति वा लूहे ति वा तीरट्ठी ति वा चरणकरणपारविउ त्ति बेमि ।

बीअं अज्झयणं

किरियाठाण

१ सुयं मे आउसं तेणं भगवया एवमक्खायं-इह खलु किरियाठाणे णाम अज्झयणे, तस्स णं अयमद्वे- इह खलु संजूहेणं दुवे ठाणा एवमाहिज्जंति, तं जहा- धम्मं चेव, अधम्मं चेव, उवसंते चेव अणुवसंते चेव ।

तत्थ णं जे से पढमस्स ठाणस्स अधम्मपक्खस्स विभंगे तस्स णं अयमद्वे- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति, तं जहा- आरिया वेगे, अणारिया वेगे, उच्चागोया वेगे, णीयागोया वेगे, कायमंता वेगे, हस्समंता वेगे, सुवण्णा वेगे, दुवण्णा वेगे, सुरूवा वेगे, दुरूवा वेगे ।

तेसिं च णं इमं एयारूवं दंडसमादाणं संपेहाए, तं जहा- णेरइएसु तिरिक्ख- जोणिएसु माणुसेसु देवेसु जे यावण्णे तहप्पगारा पाणा विण्णू वेयणं वेयंति । तेसिं पि य णं इमाइं तेरस किरियाठाणाइं भवंतीति मक्खायं, तंजहा- अद्वादंडे अणद्वादंडे, हिंसादंडे, अकम्हादंडे, दिट्ठिविपरियासियादंडे, मोसवत्तिए, अदिण्णादाणवत्तिए, अज्झत्थवत्तिए, माणवत्तिए, मित्तदोसवत्तिए, मायावत्तिए, लोभवत्तिए, इरियावहिए ।

२ पढमे दंडसमादाणे अद्वादंडवत्तिए त्ति आहिज्जइ । से जहाणामए केइ पुरिसे आयहेउं वा णायहेउं वा अगारहेउं वा परिवारहेउं वा मित्तहेउं वा णागहेउं वा भूयहेउं वा जक्खहेउं वा तं दंडं तसथावरेहिं पाणेहिं सयमेव णिसिरइ, अण्णेण वि णिसिरावेइ, अण्णं पि णिसिरंतं समणुजाणइ, एवं खु तस्स तप्पत्तियं सावज्जे त्ति आहिज्जइ । पढमे दंडसमादाणे अद्वादंडवत्तिए त्ति आहिए ।

३ अहावरे दोच्चे दंडसमादाणे अणद्वादंडवत्तिए त्ति आहिज्जइ । से जहाणामए केइ पुरिसे जे इमे तसा पाणा भवंति ते णो अच्छाए णो अजिणाए णो मंसाए णो सोणियाए णो हिययाए णो पित्ताए णो वसाए णो पिच्छाए णो पुच्छाए णो बालाए णो सिंगाए णो विसाणाए णो दंताए णो दाढाए णो णहाए णो णहारुणिए णो अट्ठीए णो अट्ठिमिंजाए, णो हिंसिंसु मे त्ति, णो हिंसंति मे त्ति, णो हिंसिस्संति मे त्ति, णो पुत्त-पोसणयाए णो पसुपोसणयाए णो अगारपरिवूहणयाए णो समण-माहणवत्तणाहेउं, णो तस्स सरीरगस्स किंचि विपरियाइत्ता भवइ, से हंता छेत्ता भेत्ता लुंपइत्ता विलुंपइत्ता उद्वइत्ता उज्झिउं बाले वेरस्स आभागी भवइ, अणद्वादंडे ।

४ से जहाणामए केइ पुरिसे जे इमे थावरा पाणा भवंति, तं जहा- इक्कडा इ वा कडिणा इ वा जंतुगा इ वा परगा इ वा मोरका इ वा तणा इ वा कुसा इ वा कुच्छगा इ वा पव्वगा ति वा

पलालए इ वा, ते णो पुत्तपोसणयाए णो पसुपोसणयाए णो अगारपोसणयाए णो समण-
माहणपोसणयाए, णो तस्स सरीरगस्स किं चि वि परियाइत्ता भवइ, से हंता छेत्ता भेत्ता
लुंपइत्ता विलुंपइत्ता उज्झिउं बाले वेरस्स आभागी भवइ, अणद्वादंडे ।

५ से जहाणामए केइ पुरिसे कच्छंसि वा दहंसि वा उदगंसि वा दवियंसि वा वलयंसि व णूमंसि
वा गहणंसि वा गहणविदुग्गंसि वा वणंसि वा वणविदुग्गंसि वा पव्वयंसि वा पव्वयविदुग्गंसि
वा तणाइं ऊसविय ऊसविय सयमेव अगणिकायं णिसिरइ, अण्णेण वि अगणिकायं
णिसिरावेइ, अण्णं पि अगणिकायं णिसिरंतं समणुजाणइ-अणद्वादंडे । एवं खलु तस्स
तप्पत्तियं सावज्जे त्ति आहिज्जइ । दोच्चे दंडसमादाणे अणद्वादंडवत्तिए त्ति आहिए ।

६ अहावरे तच्चे दंडसमादाणे हिंसादंडवत्तिए त्ति आहिज्जइ । से जहाणामए केइ पुरिसे ममं वा
ममिं वा अण्णं वा अण्णियं वा हिंसिसु वा हिंसंति हिंसिस्संति वा तं दंडं तस-थावरेहिं पाणेहिं
सयमेव णिसिरइ, अण्णेण वि णिसिरावेइ, अण्णं पि णिसिरंतं समणुजाणइ-हिंसादंडे । एवं
खलु तस्स तप्पत्तियं सावज्जे त्ति आहिज्जइ । तच्चे दंडसमादाणे हिंसादंडवत्तिए त्ति
आहिए ।

७ अहावरे चउत्थे दंडसमादाणे अकम्हा दंडवत्तिए आहिज्जइ । से जहाणामए केइ पुरिसे
कच्छंंसि वा जाव पव्वयविदुग्गंसि वा मियवित्तिए मियसंकप्पे मियणिहाणे मियवहाए गंता
एते मिय ति काउं अण्णयरस्स मियस्स वहाए उसुं आयामेत्ता णं णिसिरेज्जा, से मियं
वहिस्सामि त्ति कट्ठु तित्तिरं वा वट्ठुं वा चडगं वा लावगं वा कवोयगं वा कविं वा कविंजलं
वा विंधित्ता भवइ; इति खलु से अण्णस्स अद्वाए अण्णं फुसए-अकम्हादंडे ।

८ से जहाणामए केइ पुरिसे सालीणि वा वीहीणि वा कोद्धवाणि वा कंगूणि वा परगाणि वा
रालाणि वा णिलिज्जमाणे अण्णयरस्स तणस्स वहाए सत्थं णिसिरेज्जा, से सामगं तणगं
कुमुदगं वीहिऊसियं कलेसुयं तणं छिंदिस्सामि त्ति कट्ठु सालिं वा वीहिं वा कोद्धवं वा कंगुं वा
परगं वा रालयं वा छिंदित्ता भवइ, इति खलु से अण्णस्स अद्वाए अण्णं फुसइ-अकम्हादंडे ।
एवं खलु तस्स तप्पत्तियं सावज्जे त्ति आहिज्जइ । चउत्थे दंडसमादाणे अकम्हादंडवत्तिए
त्ति आहिए ।

९ अहावरे पंचमे दंडसमादाणे दिट्ठीविपरियासियादंडे त्ति आहिज्जइ । से जहाणामए केइ पुरिसे
माईहिं वा पिईहिं वा भाईहिं वा भगिणीहिं वा भज्जाहिं वा पुत्तेहिं वा धूयाहिं वा सुण्हाहिं वा
सद्धिं संवसमाणे मित्तं अमित्तमिति मण्णमाणे मित्ते हयपुव्वे भवइ दिट्ठीविप्परियासियादंडे ।

१० से जहाणामए वा केइ पुरिसे गामघायंसि वा णगरघायंसि वा खेडघायंसि कब्बडघायंसि
मडंबघायंसि वा दोणमुहघायंसि वा पट्टणघायंसि वा आसमघायंसि वा सण्णिवेसघायंसि वा
णिगमघायंसि वा रायहाणिघायंसि वा अतेणं तेणमिति मण्णमाणे अतेणे हयपुव्वे भवइ,
दिट्ठीविपरियासियादंडे, एवं खलु तस्स तप्पत्तियं सावज्जे त्ति आहिज्जइ । पंचमे दंडसमादाणे
दिट्ठीविप्परियासियादंडे त्ति आहिए ।

- ११ अहावरे छठे किरियाठाणे मोसवत्तिए त्ति आहिज्जइ । से जहाणामए केइ पुरिसे आयहेउं वा पायहेउं वा अगारहेउं वा परिवारहेउं वा सयमेव मुसं वयइ, अण्णेण वि मुसं वयावेइ, मुसं वयंतं पि अण्णं समणुजाणइ, एवं खलु तस्स तप्पत्तियं सावज्जे त्ति आहिज्जइ । छठे किरियाठाणे मोसवत्तिए त्ति आहिए ।
- १२ अहावरे सत्तमे किरियाठाणे अदिण्णादाणवत्तिए त्ति आहिज्जइ । से जहाणामए केइ पुरिसे आयहेउं वा जाव परिवारहेउं वा सयमेव अदिण्णं आदियइ, अण्णेणं अदिण्णं आदियावेइ, अदिण्णं आदियंतं अण्णं समणुजाणइ, एवं खलु तस्स तप्पत्तियं सावज्जे त्ति आहिज्जइ । सत्तमे किरियाठाणे अदिण्णादाणवत्तिए त्ति आहिए ।
- १३ अहावरे अट्ठमे किरियाठाणे अज्झत्थिए त्ति आहिज्जइ । जहाणामए केइ पुरिसे, से णत्थि णं केइ किंचि विसंवादेइ, सयमेव हीणे दीणे दुट्ठे दुम्मणे ओहयमणसंकप्पे चिंतासोगसागरसंपविट्ठे करयलपल्हत्थमुहे अट्ठज्झाणोवगए भूमिगयदिट्ठीए झियाइ, तस्स णं अज्झत्थिया असंसइया चत्तारि ठाणा एवमाहिज्जंति, तं जहा- कोहे माणे माया लोभे, अज्झत्थमेव कोह- माण- माया-लोहा, एवं खलु तस्स तप्पत्तियं सावज्जे त्ति आहिज्जइ । अट्ठमे किरियाठाणे अज्झत्थिए त्ति आहिए ।
- १४ अहावरे णवमे किरियाठाणे माणवत्तिए त्ति आहिज्जइ । से जहाणामए केइ पुरिसे जाइमएण वा कुलमएण वा बलमएण वा रूवमएण वा तवमएण वा सुयमएण वा लाभमएण वा इस्सरियमएण वा पण्णमएण वा अण्णयरेण वा मयट्ठाणेणं मत्ते समाणे परं हीलेइ णिंदेइ खिंसइ गरहइ परिभवइ अवमण्णइ, इत्तरिए अयं, अहमंसि पुण विसिद्धजाइकुलबलाइगुणोववेए एवं अप्पाणं समुक्कसे, देहा चुए कम्मबिइए अवसे पयाइ, तं जहा- गब्भाओ गब्भं, जम्माओ जम्मं, माराओ मारं, णरगाओ णरगं, चंडे थद्धे चवले माणी यावि भवइ, एवं खलु तस्स तप्पत्तियं सावज्जे त्ति आहिज्जइ, णवमे किरियाठाणे माणवत्तिए त्ति आहिए ।
- १५ अहावरे दसमे किरियाठाणे मित्तदोसवत्तिए त्ति आहिज्जइ । से जहाणामए केइ पुरिसे माईहिं वा पिईहिं वा भाईहिं वा भगिणीहिं वा भज्जाहिं वा धूयाहिं वा पुत्तेहिं वा सुण्हाहिं वा सद्धिं संवसमाणे तेसिं अण्णयरंसि अहालहुगंसि अवराहंसि सयमेव गरुयं दंडं णिवत्तेइ, तं जहा- सीओदग-वियडंसि वा कायं उबोडित्ता भवइ; उसिणोदगवियडेण वा कायं ओसिंचित्ता भवइ; अगणिकाएण वा कायं उद्धित्ता भवइ; जोत्तेण वा वेत्तेण वा णेत्तेण वा तयाए वा कसेण वा छिवाए वा लयाए वा अण्णयरेण वा दवरएण पासाइं उद्धालित्ता भवइ; दंडेण वा अट्ठीण वा मुट्ठीण वा लेलुणा वा कवालेण वा कायं आउट्ठित्ता भवइ । तहप्पगारे पुरिसजाए संवसमाणे दुम्मणा भवंति, पवसमाणे सुमणा भवंति, तहप्पगारे पुरिसजाए दंडपासी, दंडगुरुए, दंडपुरक्कडे, अहिए इमंसि लोगंसि, अहिए परंसि लोगंसि, संजलणे, कोहणे, पिट्ठिमंसि यावि भवइ, एवं खलु तस्स तप्पत्तियं सावज्जं त्ति आहिज्जइ । दसमे किरियाठाणे मित्तदोसवत्तिए त्ति आहिए ।

१६

अहावरे एक्कारसमे किरियाठाणे मायावत्तिए त्ति आहिज्जइ । जे इमे भवन्ति गूढायारा तमोकसिया उलूगपत्तलहुया, पव्वयगुरुया, ते आरिया वि संता अणारियाओ भासाओ पउंजंति, अण्णहा संतं अप्पाणं अण्णहा मण्णंति, अण्णं पुट्ठा अण्णं वागरंति, अण्णं आइक्खियव्वं अण्णं आइक्खंति ।

से जहाणामए केइ पुरिसे अंतोसल्ले तं सल्लं णो सयं णिहरइ, णो अण्णेण णिहरावेइ णो पडिविद्धंसेइ एवमेव णिण्हवेइ, अविउट्टमाणे अंतो-अंतो रियाइ [झियाइ], एवमेव माई मायं कट्ठु णो आलोएइ णो पडिक्कमइ णो णिंदइ णो गरिहइ णो विउट्टइ णो विसोहेइ णो अकरणयाए अब्भुट्टेइ णो अहारिहं तवोकम्मं पायच्छित्तं पडिवज्जइ, माई अस्सिं लोए पच्चायाइ, माई परंसि लोए पुणो-पुणो पच्चायाइ, णिंदइ, गरिहइ, पसंसइ, णिच्चरइ, ण णियट्टइ, णिसिरियं दंडं छाएइ, माई असमाहडसुहलेस्से यावि भवइ, एवं खलु तस्स तप्पत्तियं सावज्जं त्ति आहिज्जइ । एक्कारसमे किरियाठाणे मायावत्तिए त्ति आहिए ।

१७

अहावरे बारसमे किरियाठाणे लोभवत्तिए त्ति आहिज्जइ, तं जहा- जे इमे भवन्ति आरणिया आवसहिया गामंतिया कण्हुईरहस्सिया, णो बहुसंजया, णो बहुपडिविरया सव्वपाण- भूय- जीव- सत्तेहिं; ते सच्चामोसाइं एवं विउंजंति- अहं ण हंतव्वो अण्णे हंतव्वा, अहं ण अज्जावेयव्वो अण्णे अज्जावेयव्वा, अहं ण परिघेत्तव्वो अण्णे परिघेत्तव्वा, अहं ण परितावेयव्वो अण्णे परितावेयव्वा, अहं ण उद्वेयव्वो अण्णे उद्वेयव्वा, एवामेव ते इत्थिकामेहिं मुच्छिया गिद्धा गढिया अज्झोववण्णा जाव वासाइं चउपंचमाइं छद्दसमाइं अप्पयरो वा भुज्जयरो वा भुंजित्तु भोगभोगाइं कालमासे काल किच्चा अण्णयरेसु आसुरिएसु किव्विसिएसु ठाणेसु उववत्तारो भवन्ति, तओ विप्पमुच्चमाणा भुज्जो-भुज्जो एलमूयत्ताए [तमूयत्ताए जाइमूयत्ताए] पच्चायंति, एवं खलु तस्स तप्पत्तियं सावज्जे त्ति आहिज्जइ । दुवालसमे किरियाठाणे लोभवत्तिए त्ति आहिए ।

इच्चेयाइं दुवालस किरियाठाणाइं दविणं समणेणं वा माहणेण वा सम्मं सुपरिजाणियव्वाइं भवइ।

१८

अहावरे तेरसमे किरियाठाणे इरियावहिए त्ति आहिज्जइ, इह खलु अत्तत्ताए संवुडस्स अणगारस्स इरियासमियस्स भासासमियस्स एसणासमियस्स आयाणभंड- मत्तणिकखेवणासमियस्स उच्चार- पासवण-खेल-सिंघाण-जल्ल-पारिद्धावणियासमियस्स मणसमियस्स वइसमियस्स कायसमियस्स मणगुत्तस्स वइगुत्तस्स कायगुत्तस्स [गुत्तस्स] गुत्तिंदियस्स गुत्तबंभयारिस्स आउत्तं गच्छमाणस्स आउत्तं चिद्धमाणस्स आउत्तं णिसीय- माणस्स आउत्तं तुयट्टमाणस्स आउत्तं भुंजमाणस्स आउत्तं भासमाणस्स आउत्तं वत्थं पडिग्गहं कंबलं पायपुंछणं णिण्हमाणस्स वा णिक्खिवमाणस्स वा जाव चक्खुपम्ह- णिवायमवि अत्थि वेमाया सुहुमा किरिया इरियावहिया णामं कज्जइ, सा पढमसमए बद्धा पुट्ठा, बिईयसमए वेइया, तइयसमए णिज्जिण्णा, सा बद्धा पुट्ठा उदीरिया वेइया णिज्जिण्णा सेयकाले अकम्मा यावि भवइ । एवं खलु तप्पत्तियं असावज्जे त्ति आहिज्जइ।तेरसमे किरियाठाणे इरियावहिए त्ति आहिए ।

से बेमि- जे य अईया जे य पडुप्पण्णा जे य आगमिस्सा अरहंता भगवंतो सव्वे ते एयाइं चेव तेरस किरियाठाणाइं भासिंसु वा भासैंति वा भासिस्संति वा पण्णविंसु वा पण्णवेंति वा पण्णविस्संति वा, एवं चेव तेरसमं किरियाठाणं सेविंसु वा सेवंति सेविस्संति वा ।

१९

अदुत्तरं च णं पुरिसविजयविभंगमाइक्खिस्सामि ।

इह खलु णाणापण्णाणं णाणाछंदाणं णाणासीलाणं णाणादिट्ठीणं णाणारुइणं णाणारंभाणं णाणाज्झवसाणसंजुत्ताणं णाणाविहं पावसुयज्झयणं एवं भवइ, तं जहा- १ भोम्मं २ उप्पायं ३ सुविणं ४ अंतलिकख ५ अंगं ६ सरं ७ लकखणं ८ वंजणं ९ इत्थिलकखणं १० पुरिसलकखणं ११ हयलकखणं १२ गयलकखणं १३ गोणलकखणं १४ मँढलकखणं १५ कुक्कुडलकखणं १६ तित्तिरलकखणं १७ वट्ठगलकखण १८ लावगलकखणं १९ चक्कलकखणं २० छत्तलकखणं २१ चम्मलकखणं २२ दंडलकखणं २३ असिलकखणं २४ मणिलकखणं २५ कागिणिलकखणं २६ सुभगाकरं २७ दुब्भगाकरं २८ गब्भकरं २९ मोहणकरं ३० आहव्वणिं ३१ पागसासणिं ३२ दव्वहोमं ३३ खत्तियविज्जं ३४ चंदचरियं ३५ सूरचरियं ३६ सुक्कचरियं ३७ बहस्सइचरियं ३८ उक्कापायं ३९ दिसादाहं ४० मियचक्कं ४१ वायसपरिमंडलं ४२ पंसुवुट्ठिं ४३ केसवुट्ठिं ४४ मंसवुट्ठिं ४५ रुहिरवुट्ठिं ४६ वेतालं ४७ अद्धवेतालं ४८ ओसोवणिं ४९ तालुग्घाडणिं ५० सोवागिं ५१ साबरिं ५२ दामिलिं ५३ कालिं ५४ गोरिं ५५ गंधारिं ५६ ओवयणिं ५७ उप्पयणिं ५८ जंभणिं ५९ थंभणिं ६० लेसणिं ६१ आमयकरणिं ६२ विसल्लकरणिं ६३ पक्कमणिं ६४ अंतद्धाणिं ६५ आयमणिं । एवमाइयाओ विज्जाओ अण्णस्स हेउं पउंजंति, पाणस्स हेउं पउंजंति, वत्थस्स हेउं पउंजंति, लेणस्स हेउं पउंजंति, सयणस्स हेउं पउंजंति, अण्णेसिं वा विरूवरूवाणं कामभोगाण हेउं पउंजंति, तेरिच्छं ते विज्जं सेवंति, ते अणारिया विप्पडिवण्णा ते कालमासे कालं किच्चा अण्णयरेसु आसुरिएसु किच्चिसिएसु ठाणेसु उववत्तारो भवंति, तओ वि विप्पमुच्चमाणा भुज्जो एलमूयत्ताए तमंधयाए पच्चायंति ।

२०

से एगइओ आयहेउं वा णायहेउं वा सयणहेउ वा अगारहेउं वा परिवारहेउं वा णायगं वा सहवासियं वा णिस्साए, अदुवा अणुगामिए, अदुवा उवचरए, अदुवा पाडिपहिए, अदुवा संधिच्छेयए, अदुवा गंठिच्छेयए, अदुवा ओरब्भिए, अदुवा सोयरिए, अदुवा वागुरिए, अदुवा साउणिए, अदुवा मच्छिए, अदुवा गोवालए, अदुवा गोघायए, अदुवा सोवणिए, अदुवा सोवणियंतिए ।

२१

से एगइओ अणुगामियभावं पंडिसंधाय तमेव अणुगामियाणुगमियं हंता छेत्ता भेत्ता लुंपइत्ता विलुंपइत्ता उद्धवइत्ता आहारं आहारेइ, इति से महया पावेहिं कम्महेहिं अत्ताणं उवक्खाइत्ता भवइ।

२२

से एगइओ उवचरगभावं पंडिसंधाय तमेव उवचरिय-उवचरिय हंता छेत्ता भेत्ता लुंपइत्ता विलुंपइत्ता उद्धवइत्ता आहारं आहारेइ, इति से महया पावेहिं कम्महेहिं अत्ताणं उवक्खाइत्ता भवइ।

- २३ से एगइओ पाडिपहियभावं पडिसंधाय तमेव पडिपहे ठिच्चा हंता छेत्ता भेत्ता लुंपइत्ता विलुंपइत्ता उद्वइत्ता आहारं आहारेइ, इति से महया पावेहिं कम्मेहिं अत्ताणं उवक्खाइत्ता भवइ ।
- २४ से एगइओ संधिच्छेदगभावं पडिसंधाय तमेव संधिं छेत्ता भेत्ता जाव इति से महया पावेहिं कम्मेहिं अत्ताणं उवक्खाइत्ता भवइ ।
- २५ से एगइओ गंठिच्छेदगभावं पडिसंधाय तमेव गंठिं छेत्ता भेत्ता जाव इति से महया पावेहिं कम्मेहिं अत्ताणं उवक्खाइत्ता भवइ ।
- २६ से एगइओ ओरब्भियभावं पडिसंधाय उरब्भं वा अण्णयरं वा तसं पाणं हंता जाव उवक्खाइत्ता भवइ । एसो अभिलावो सव्वत्थ ।
- २७ से एगइओ सोयरियभावं पडिसंधाय महिसं वा अण्णयरं वा तसं पाणं हंता जाव उवक्खाइत्ता भवइ ।
- २८ से एगइओ वागुरियभावं पडिसंधाय मियं वा अण्णयरं वा तसं पाणं हंता जाव उवक्खाइत्ता भवइ ।
- २९ से एगइओ साउणियभावं पडिसंधाय सउणिं वा अण्णयरं वा तसं पाणं हंता जाव उवक्खाइत्ता भवइ ।
- ३० से एगइओ मच्छियभावं पडिसंधाय मच्छं वा अण्णयरं वा तसं पाणं हंता जाव उवक्खाइत्ता भवइ ।
- ३१ से एगइओ गोपालगभावं पडिसंधाय तमेव गोणं वा परिजविय परिजविय हंता जाव उवक्खाइत्ता भवइ ।
- ३२ से एगइओ गोघायगभावं पडिसंधाय गोणं वा अण्णयरं वा तसं पाणं हंता जाव उवक्खाइत्ता भवइ ।
- ३३ से एगइओ सोवणियभावं पडिसंधाय सुणगं वा अण्णयरं वा तसं पाणं हंता जाव उवक्खाइत्ता भवइ ।
- ३४ से एगइओ सोवणियंतियभावं पडिसंधाय मणुस्सं वा अण्णयरं वा तसं पाणं हंता जाव आहारे आहारेइ, इति से महया पावेहिं कम्मेहिं अत्ताणं उवक्खाइत्ता भवइ ।
- ३५ से एगइओ परिसामज्झाओ उद्वित्ता अहमेयं हणामि त्ति कट्ठु तित्तिर वा वट्ठगं वा लावगं कवोयगं वा कविं वा कविंजल वा अण्णयरं वा तसं पाणं हंता जाव उवक्खाइत्ता भवइ ।
- ३६ से एगइओ केणइ आदाणेणं विरुद्धे समाणे अदुवा खलदाणेणं, अदुवा सुरा- थालएणं, गाहावईणं वा गाहावइपुत्ताण वा सयमेव अगणिकाएणं सस्साइं झामेइ, अण्णेण वि अगणिकाएणं सस्साइं झामावेइ, अगणिकाएणं सस्साइं झामेतं पि अण्णं समणुजाणइ, इति से महया पावेहिं कम्मेहिं अत्ताणं उवक्खाइत्ता भवइ ।

- ३७ से एगइओ केणइ आयाणेणं विरुद्धे समाणे अदुवा खलदाणेणं अदुवा सुरा- थालएणं, गाहावईण वा गाहावइपुत्ताण वा उट्टाणं वा गोणाणं वा घोडगाणं वा गद्धभाणं वा सयमेव घूराओ कप्पेइ, अण्णेण वि कप्पावेइ, कप्पंतं पि अण्णं समणुजाणइ, इति से महया पावेहिं कम्महिं अत्ताणं उवक्खाइत्ता भवइ ।
- ३८ से एगइओ केणइ आदाणेणं विरुद्धे समाणे, अदुवा खलदाणेणं, अदुवा सुरा- थालएणं गाहावईण वा गाहावइपुत्ताण वा उट्टसालाओ वा गोणसालाओ वा घोडग- सालाओ वा गद्धभसालाओ वा कंटगबोदियाए परिपेहिता सयमेव अगणिकाएणं झामेइ, अण्णेण वि झामावेइ, झामेतं पि अण्णं समणुजाणइ, इति से महया पावेहिं कम्महिं अत्ताणं उवक्खाइत्ता भवइ ।
- ३९ से एगइओ केणइ आयाणेणं विरुद्धे समाणे, अदुवा खलदाणेणं, अदुवा सुरा- थालएणं, गाहावईण वा गाहावइपुत्ताण वा कुडलं वा गुणं वा मणिं वा मोत्तियं वा सयमेव अवहरइ, अण्णेण वि अवहरावेइ, अवहरंतं पि अण्णं समणुजाणइ, इति से महया पावेहिं कम्महिं अत्ताणं उवक्खाइत्ता भवइ ।
- ४० से एगइओ केणइ आयाणेणं विरुद्धे समाणे, समणाण वा माहणाण वा दंडगं वा छत्तगं भंडगं वा मत्तगं लट्ठिगं वा भिसिगं वा चेलगं वा चिलिमिलिगं वा चम्मगं वा चम्मच्छेयणगं वा चम्मकोसियं वा सयमेव अवहरइ जाव समणुजाणइ इति से महया पावेहिं कम्महिं अत्ताणं उवक्खाइत्ता भवइ ।
- ४१ से एगइओ णो वितिगिंछइ, तं जहा- गाहावईण वा गाहावइपुत्ताण वा सयमेव अगणिकाएणं ओसहीओ झामेइ जाव अण्णं पि झामेतं समणुजाणइ । इति से महया पावेहिं कम्महिं अत्ताणं उवक्खाइत्ता भवइ ।
- ४२ से एगइओ णो वितिगिंछइ- गाहावईण वा गाहावइपुत्ताण वा उट्टाण वा गोणाण वा घोडगाण वा गद्धभाण वा सयमेव घूराओ कप्पेइ, अण्णेण वि कप्पावेइ, अण्णं पि कप्पंतं समणुजाणइ, इति से महया पावेहिं कम्महिं अत्ताणं उवक्खाइत्ता भवइ ।
- ४३ से एगइओ णो वितिगिंछइ- गाहावईण वा गाहावइपुत्ताण वा उट्टसालाओ वा जाव गद्धभसालाओ वा कंटकबोदियाए पडिपेहिता सयमेव अगणिकाएणं झामेइ जाव समणुजाणइ, इति से महया पावेहिं कम्महिं अत्ताणं उवक्खाइत्ता भवइ ।
- ४४ से एगतिओ णो वितिगिंछइ- गाहावईण वा गाहावइपुत्ताण वा कुंडलं वा जाव मणिं वा मोत्तियं वा सयमेव अवहरइ जाव समणुजाणइ, इति से महया पावेहिं कम्महिं अत्ताणं उवक्खाइत्ता भवइ ।
- ४५ से एगतिओ णो वितिगिंछइ-समणाण वा माहणाण वा छत्तग वा दंडगं वा जाव चम्मच्छेयणगं वा चम्मकोसियं वा सयमेव अवहरइ जाव समणुजाणइ । इति से महया पावेहिं कम्महिं अत्ताणं उवक्खाइत्ता भवइ ।

४६

से एगइओ समणं वा माहणं वा दिस्सा णाणाविहेहिं पावकम्महिं अत्ताणं उवक्खाइत्ता भवइ, अदुवा णं अच्छराए आफालित्ता भवइ, अदुवा णं फरुसं वदित्ता भवइ, कालेण वि से अणुपविट्ठस्स असणं वा पाणं खाइमं वा साइमं वा णो दवावेत्ता भवइ; जे इमे भवन्ति- वोण्णमंता भारक्कंता अलसगा वसलगा किवणगा समणगा ते इणमेव जीवितं धिज्जीवियं संपडिबूहेति, णाइं ते पारलोइयस्स अट्ठस्स किंचि वि सिलिस्संति, ते दुक्खंति ते सोयंति ते जूरंति ते तिप्पंति ते पिट्ठंति ते परितप्पंति ते दुक्खण-सोयण-जूरण-तिप्पण-पिट्ठण-परितप्पण-वह- बंधणपरिकिलेसाओ अपडि-विरया भवन्ति;

ते महया आरंभसमारंभेण विरूवरूवेहिं पावकम्मकिच्चेहिं उरालाइं माणुस्सगाइं भोगभोगाइं भुंजित्तारो भवन्ति, तं जहा- अण्णं अण्णकाले, पाणं पाणकाले, वत्थं वत्थकाले, लेणं लेणकाले, सयणं सयणकाले, सपुच्चावरं च णं ण्हाए कयवलिकम्म कयकोउयमंगलपायच्छित्ते सिरसा ण्हाए कंठेमालाकडे आविद्धमणिसुवण्णे कप्पिय-मालामउली पडिबद्धसरीरे वग्घारिय-सोणिसुत्तग- मल्ल-दामकलावे अहयवत्थपरिहिए चंदणोक्खित्तगायसरीरे महइ महलियाए कूडागारसालाए महइमहालयंसि सीहासणंसि इत्थीगुम्मसंपरिवुडे, सव्वराइएणं जोइणा झियायमाणेणं महयाहयनट्ठ-गीय-वाइय-तंती-तल-ताल-तुडिय-घण-मुइंगपडुप्पवाइय- रवेणं उरालाइं माणुस्सागाइं भोगभोगाइं भुंजमाणे विहरइ ।

तस्स णं एगमवि आणवेमाणस्स जाव चत्तारि पंच जणा अवुत्ता चेव अब्भुट्ठेति, भण देवाणुप्पिया ! किं करेमो ? किं आहारेमो ? किं उवणेमो ? किं उवद्वावेमो ! किं भे हिय इच्छियं ? किं भे आसगस्स सयइ ?

तमेव पासित्ता अणारिया एवं वयंति- देवे खलु अयं पुरिसे, देवसिणाए खलु अयं पुरिसे देवजीवणिज्जे खलु अयं पुरिसे ! अण्णे वि य णं उवजीवंति। तमेव पासित्ता आरिया वयंति- अभिक्कंतकूरकम्म खलु अयं पुरिसे अइधूएअइआयरक्खे दाहिणगामिए णेरइए कण्हपक्खिए आगमिस्साणं दुल्लहबोहिए यावि भविसइ ।

इच्चेयस्स ठाणस्स उट्ठिया वेगे अभिगिज्झंति, अणुट्ठिया वेगे अभिगिज्झंति, अभिज्झाउरा अभिगिज्झंति ।

एस ठाणे अणारिए अकेवले अप्पडिपुण्णे अणेयाउए असंसुद्धे असल्लगत्तणे असिद्धिमग्गे अमुत्तिमग्गे अणिव्वाणमग्गे अणिज्जाणमग्गे असव्वदुक्खप्पहीणमग्गे एगंतमिच्छे असाहू । एस खलु पढमस्स ठाणस्स अधम्मपक्खस्स विभंगे एवमाहिए ।

४७

अहावरे दोच्चस्स ठाणस्स धम्मपक्खस्स विभंगे एवमाहिज्जइ- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवन्ति, तं जहा- आरिया वेगे, अणारिया वेगे, उच्चागोया वेगे, णीयागोया वेगे, कायमंता वेगे, हस्समंता वेगे, सुवण्णा वेगे, दुवण्णा वेगे, सुरूवा वेगे, दुरूवा वेगे, तेसिं च णं खेत्तवत्थूणि परिग्गहियाणि भवन्ति, एसो आलावगो तहा णेयव्वो जहा पौंडरीए जाव सव्वोवसंता सव्वत्ताए परिनिव्वुडे त्ति बेमि । एस ठाणे आरिए केवले जाव सव्व- दुक्खप्पहीणमग्गे एगंतसम्म साहू । दोच्चस्स ठाणस्स धम्मपक्खस्स विभंगे एवमाहिए ।

४८

अहावरे तच्चस्स ठाणस्स मिस्सगस्स विभंगे एवमाहिज्जइ- जे इमे भवन्ति आरणिण्या आवसहिया गामणियंतिया कण्हुइरहस्सिया जाव तओ विप्पमुच्चमाणा भुज्जो एलमूयत्ताए पच्चायंति, एस ठाणे अणारिए अकेवले जाव असव्वदुक्खप्पहीणमग्गे एगंतमिच्छे असाहू । एस खलु तच्चस्स ठाणस्स मिस्सगस्स विभंगे एवमाहिए ।

४९

अहावरे पढमस्स ठाणस्स अधम्मपक्खस्स विभंगे एवमाहिज्जइ- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवन्ति महिच्छा महारंभा महापरिग्गहा अधम्मिया अधम्माणुया अधम्मिद्वा अधम्मक्खाई अधम्मजीविणो अधम्म- पलोइणो अधम्मपलज्जणा अधम्मसीलसमुदायारा अधम्मेण चेव वित्तिं कप्पेमाणा विहरन्ति ।

हण छिंद भिंद विगतत्तगा लोहियपाणी चंडा रुद्धा खुद्धा साहस्सिया उक्कंचण- वंचण-माया- णियडि-कूड-कवड- साइसंपओगबहुला दुस्सीला दुव्वया दुप्पडियाणंदा असाहू । सव्वाओ पाणाइवायाओ अप्पडिविरया जावज्जीवाए जाव सव्वाओ परिग्गहाओ अप्पडिविरया जावज्जीवाए, सव्वाओ कोहाओ जाव मिच्छादंसण-सल्लाओ अप्पडिविरया जावज्जीवाए, सव्वाओ णहाणुम्मदण-वण्णग-विलेवण-सद्ध-फरिस-रस-रूव-गंध मल्लालंकाराओ अप्पडिविरया जावज्जीवाए, सव्वाओ सगडरह-जाण-जुग्ग-गिल्लि-थिल्लि-सीया- संदमाणिया-सयणासण-जाण- वाहण-भोग-भोयण-पवित्थरविहीओ अप्पडिविरया जावज्जीवाए, सव्वाओ कय-विक्कय-मास- अद्धमास- रूवगसंववहाराओ अप्पडिविरया जावज्जीवाए, सव्वाओ हिरण्ण-सुवण्ण- धण-मणि- मोत्तियं-संख-सिल-प्पवालाओ अप्पडिविरया जावज्जीवाए सव्वाओ कूडतुलकूडमाणाओ अप्पडिविरया जावज्जीवाए, सव्वाओ आरंभसमारंभाओ अप्पडिविरया जावजीवाए, सव्वाओ करण-कारावणाओ अप्पडिविरया जावज्जीवाए, सव्वाओ पयण-पयावणाओ अप्पडिविरया जावज्जीवाए, सव्वाओ कुट्टण-पिट्टण-तज्जण-ताडणवह-बंधपरिकिलेसाओ अप्पडिविरया जावज्जीवाए, जे यावण्णे तहप्पगारा सावज्जा अबोहिया कम्मंता परपाणपरियावणकरा जे अणारिएहिं कज्जंति ततो वि अप्पडिविरया जावज्जीवाए ।

५०

से जहाणामए केइ पुरिसे कल-मसूर-तिल-मुग्ग-मास-णिप्पाव-कुलत्थ-आलिसंदग- पलिमंथगमादिएहिं अजए कूरे मिच्छादंडं पउंजइ, एवामेव तहप्पगारे पुरिसजाए तित्तिर-वट्टग- लावग-कवोय-कविंजल-मिय-महिस-वराह-गाह-गोह-कुम्म-सरीसिवमादिएहिं अजए कूरे मिच्छादंडं पउंजइ ।

जा वि य से बाहिरिया परिसा भवइ, तं जहा- दासे इ वा पेसे इ वा भयए इ वा भाइल्ले इ वा कम्मकरए इ वा भोगपुरिसे इ वा तेसिं पि य णं अण्णरंसि अहालहुसगंसि अवराहंसि सयमेव गरुयं दंडं निव्वत्तेइ, तं जहा- इमं दंडेह, इमं मुंडेह, इमं तज्जेह, इमं तालेह, इमं अंदुयबंधणं करेह, इमं णियलबंधणं करेह, इमं हडिबंधणं करेह, इमं चारगबंधणं करेह, इमं णियलजुयलसंकोडियमोडियं करेह, इमं हत्थच्छिण्णयं करेह, इमं पायच्छिण्णयं करेह, इमं कण्णच्छिण्णयं करेह, इमं णक्कच्छिण्णयं करेह, इमं ओट्टच्छिण्णयं करेह, इमं सीसच्छिण्णयं करेह, इमं मुहच्छिण्णयं करेह, इमं वेयवहियं करेह, इमं अंगवहियं करेह, इमं फोडियपयं करेह, इमं णयणुप्पाडियं करेह, इमं दसणुप्पाडियं करेह, इमं वसणुप्पाडियं करेह,

जिब्भुप्पाडियं करेह, इमं ओलंबियं करेह, इमं घंसियं करेह, इमं घोलियं करेह, इमं सूलाइयं करेह, इमं सूलाभिण्णयं करेह, इमं खारवत्तियं करेह, इमं वज्झवत्तियं करेह, इमं सीहपुच्छियं करेह, इमं वसहपुच्छियं इमं कडग्गिदड्ढयं करेह, इमं कागणिमंसखावितयं करेह, इमं भत्तपाणनिरुद्धयं करेह, इमं जावज्जीवं वहबंधणं करेह, इमं अण्णतरेणं असुभेणं कुमारेणं मारेह ।

५१ जा वि य से अब्भित्तोरिया परिसा भवइ, तं जहा- माया इ वा पिया इ वा भाया इ वा भगिणी इ वा भज्जा इ वा पुत्ता इ वा धूया इ वा सुण्हा इ वा, तेसिं पि य णं अण्णयरंसि अहालहुसगंसि अवराहंसि सयमेव गरुयं दंडं णिव्वत्तेइ, तं जहा- सीओदगवियडंसि उबोलेत्ता भवइ, एवं जहा मित्तदोसवत्तिए जाव अहिए परंसि लोगंसि । ते दुक्खंति सोयंति जूरंति तिप्पंति पिट्ठंति परितप्पंति । ते दुक्खण-सोयण-जूरण-तिप्पण-पिट्ठण-परितप्पण-वह बंधणपरिकिलेसाओ अपडिविरया भवंति ।

५२ एवामेव ते इत्थिकामेहिं मुच्छिया गिद्धा गढिया अज्झोववण्णा जाव वासाइं चउपंचमाइं छद्दसमाइं वा अप्पतरो वा भुज्जतरो वा कालं भुज्जित्तु भोगभोगाइं पसवित्तु वेरायतणाइं संचिणित्ता बहूइं कूराणि कम्माइं उस्सण्णाइं संभारकडेण कम्मुणा- से जहाणामए अयगोले इ वा सेलगोले इ वा उदगंसि पक्खित्ते समाणे उदगतलमइवइत्ता अहे धरणितलपइट्ठाणे भवइ, एवामेव तहप्पगारे पुरिसजाए वज्जबहुले धुयबहुले [धुण्णबहुले] पंकबहुले वेरबहुले अप्पत्तियबहुले दंभबहुले णियडिबहुले साइबहुले अयसबहुले उस्सण्णं तसपाणघाई कालमासे कालं किच्चा धरणितल- मइवइत्ता अहे णरगतलपइट्ठाणे भवइ ।

५३ ते णं णरया अंतो वट्ठा बाहिं चउरंसा अहे खुरप्पसंठाणसंठिया णिच्चंधयारतमसा ववगय-गह-चंद-सूर-णक्खत्त-जोइसपहा मेद-वसा-मंस-रुहिर-पूयपडल-चिक्खल्ल-लित्ताणुलेवणतला असुई वीसा परमदुब्भिगंधा काऊअगणिवण्णाभा कक्खडफासा दुरहियासा असुभा णरगा, असुभा णरएसु वेयणाओ, णो चेव णं णरएसु णेरइया णिद्धायंति वा पयलायंति वा सइं रइं वा धिइं वा मइं वा उवलभंते, ते णं तत्थ उज्जलं विउलं पगाढं कडुयं कक्कसं चंडं दुक्खं दुग्गं तिव्वं दुरहियासं णेरइय वेयणं पच्चणुभवमाणा विहरंति ।

से जहाणामए रुक्खे सिया पव्वयग्गे जाए मूले छिण्णे अग्गे गरुए जओ णिण्णं जओ विसमं जओ दुग्गं तओ पवडइ, एवामेव तहप्पगारे पुरिसजाए गब्भाओ गब्भं, जम्माओ जम्मं, माराओ मारं, णरगाओ णरगं, दुक्खाओ दुक्खं, दाहिणगामिए णेरइए कण्हपक्खिए आगमिस्साणं दुल्लभबोहिए यावि भवइ ।

एस ठाणे अणारिए अकेवले जाव असव्वदुक्खप्पहीणमग्गे एगंतमिच्छे असाहू। पढमस्स ठाणस्स अधम्मपक्खस्स विभंगे एवमाहिए ।

५४ अहावरे दोच्चस्स ठाणस्स धम्मपक्खस्स विभंगे एवमाहिज्जइ इह खलु पाईणं वा पडीणं वा उदीणं वा दाहीणं वा संतेगइया मणुस्सा भवंति, तं जहा- अणारंभा अपरिग्गहा धम्मिया धम्माणुगा धम्मिद्धा जाव धम्मणेणं चेव वित्तिं कप्पेमाणा विहरंति, सुसीला सुव्वया सुप्पडियाणंदा सुसाहू सव्वाओ पाणाइवायाओ पडिविरया जावज्जीवाए जाव जे यावण्णे

तहप्पगारा सावज्जा अबोहिया कम्मंता परपाणपरियावणकरा कज्जंति ततो वि पडिविरया जावज्जीवाए ।

५५

से जहाणामए अणगारा भगवंतो इरियासमिया भासासमिया एसणासमिया आयाणभंडमत्तणिकखेवणासमिया उच्चार-पासवण-खेल-जल्ल-सिंघाण-पारिद्वावणिया समिया मणसमिया वइसमिया कायसमिया मणगुत्ता वइगुत्ता कायगुत्ता गुत्ता गुत्तिदिया गुत्तबंभयारी अकोहा अमाणा अमाया अलोभा संता पसंता उवसंता परिणिव्वुडा अणासवा अगंथा छिण्णसोया णिरुवलेवा कंसपाई व मुक्कतोया, संखो इव णिरंगणा, जीवो इव अप्पडिहयगई, गगणतलं पि व णिरालंबणा, वायुरिव अपडिबद्धा सारदसलिलं व सुद्धहियया, पुक्खरपत्तं व णिरुवलेवा, कुम्मो इव गुत्तिंदिया, विहग इव विप्पमुक्का, खग्गविसाणं व एगजाया, भारंडपक्खीव अप्पमत्ता, कुंजरो इव सौंडीरा, वसभो इव जायत्थामा, सीहो इव दुद्धरिसा, मंदरो इव अप्पकंपा, सागरो इव गंभीरा, चंदो इव सोमलेसा, सूरु इव दित्ततेया, जच्चकणगं व जायरूवा, वसुंधरा इव सव्वफासविसहा, सुहुयहुयासणो विव तेयसा जलंता ।

५६

णत्थि णं तेसिं भगवंताणं कत्थवि पडिबंधे भवइ, से य पडिबंधे चउव्विहे पण्णत्ते, तं जहा अंडए इ वा पोयए इ वा उग्गहे इ वा पग्गहे इ वा, जण्णं जण्णं दिसं इच्छंति तण्णं तण्णं दिसं अप्पडिबद्धा सुइभूया लहुभूया अणुप्पग्गंथा संजमेणं तवसा अप्पाणं भावेमाणा विहरंति ।

५७

तेसिं णं भगवंताणं इमा एयारूवा जायामायावित्ती भवइ, तं जहा- चउत्थे भत्ते, छट्ठे भत्ते, अट्ठमे भत्ते, दसमे भत्ते, दुवालसमे भत्ते, चोद्धसमे भत्ते सोलसभत्ते, अद्धमासिए भत्ते, मासिए भत्ते, दोमासिए भत्ते, तेमासिए भत्ते, चउम्मासिए भत्ते, पंचमासिए भत्ते, छम्मासिए भत्ते । अदुत्तरं च णं उक्खित्तचरगा णिक्खित्तचरगा उक्खित्तणिक्खित्तचरगा अंतचरगा पंतचरगा लूहचरगा सामुदाणचरगा संसद्वचरगा असंसद्वचरगा तज्जायसंसद्वचरगा दिट्ठलाभिया अदिट्ठलाभिया पुट्ठलाभिया अपुट्ठलाभिया भिक्खलाभिया अभिक्खलाभिया अण्णायचरगा अण्णगिलायचरगा उवणिहिया संखादत्तिया परिमियपिंडवाइया सुद्धेसणिया अंताहारा पंताहारा अरसाहारा विरसाहारा लूहाहारा तुच्छाहारा अंतजीवी पंतजीवी पुरिमइडिया आयंबिलिया णिव्विगइया अमज्ज-मंसासिणो णो णिकामरसभोई ठाणाइया पडिमइया णेसज्जिया वीरासणिया दंडायतिया लगंडसाईणो अवाउडा अकंडुया अणिडुहा धुयकेस-मंसु-रोम-णहा सव्वगाय-पडिकम्मविप्पमुक्का चिद्धंति ।

५८

ते णं एएणं विहारेणं विहरमाणा बहूइं वासाइं सामण्णपरियागं पाउणंति, बहूइं वासाइं सामण्णपरियागं पाउणित्ता आबाहंसि उप्पण्णंसि वा अणुप्पण्णंसि वा बहूइं भत्ताइं पच्चक्खाइंति, बहूइं भत्ताइं पच्चक्खित्ता बहूइं भत्ताइं अणसणाए छेदंति, छेदित्ता जस्सट्ठाए कीरइ णग्गभावे मुंडभावे अण्हाणगे अदंतवणगे अछत्तए अणोवाहणए भूमिसेज्जा फलगसेज्जा कट्ठसेज्जा केसलोए बंभचेरवासे परघरपवेसे लद्धावलद्धं माणावमाणणाओ हीलणाओ णिंदणाओ खिंसणाओ गरहणाओ तज्जणाओ तालणाओ उच्चावया गामकंटगा बावीसं परीसहोवसग्गा अहियासिज्जंति तमट्ठं आराहंति, तमट्ठं आराहेत्ता चरमेहिं उस्सासणिस्सासेहिं अणंतं अणुत्तरं णिव्वाघायं णिरावरणं कसिणं पडिपुण्णं केवलवरणाण-दंसणं समुप्पाडंति, तओ पच्छा सिज्झंति बुज्झंति मुच्चंति परिणिव्वायंति सव्वदुक्खाणं अंतं करंति ।

५९ एगच्चाए पुण एगे भयंतारो भवंति, अवरे पुण पुव्वकम्मावसेसेणं कालमासे कालं किच्चा अण्णयरेसु देवलोएसु देवत्ताए उववत्तारो भवंति, तं जहा- महिइडिएसु महज्जुइएसु महापरक्कमेसु महाजसेसु महब्बलेसु महाणुभावेसु महासोक्खेसु, ते णं तत्थ देवा भवंति महिइडिया महज्जुइया जाव महासोक्खा हारविराइयवच्छा कडग-तुडियथंभियभुया अंगय कुंडल-मट्ठगंडयल - कण्णपीढधारी विचित्तहत्थाभरणा विचित्त - मालामउलिमउडा कल्लाणगपवरवत्थपरिहिया कल्लाणगपवरमल्लाणु-लेवणधरा भासुरबौदी पलंबवणमालधरा दिव्वेणं रूवेणं दिव्वेणं वण्णेणं दिव्वेणं गंधेणं दिव्वेणं फासेणं दिव्वेणं संघाएणं दिव्वेणं संठाणेणं दिव्वाए इड्ढीए दिव्वाए जुईए दिव्वाए पभाए दिव्वाए छायाए दिव्वाए अच्चीए दिव्वेणं तेएणं दिव्वाए लेसाए दस दिसाओ उज्जोवेमाणा पभासेमाणा; गइकल्लाणा ठिइकल्लाणा आगमेसि-भद्वया यावि भवंति, एस ठाणे आरिए जाव सव्वदुक्खप्पहीणमग्गे एगंतसम्ममे सुसाहू । दोच्चस्स ठाणस्स धम्मपक्खस्स विभंगे एवमाहिए ।

६० अहावरे तच्चस्स ठाणस्स मीसगस्स विभंगे एवमाहिज्जइ- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति, तं जहाअप्पिच्छा अप्पांरभा अप्पपरिग्गहा धम्मिया धम्माणुया जाव धम्मेणं चेव वित्तिं कप्पेमाणा विहरेंति । सुसीला सुव्वया सुप्पडियाणंदा साहू । एगच्चाओ पाणाइवायाओ पडिविरया जावज्जीवाए एगच्चाओ अप्पडिविरया जाव जेयावण्णे तहप्पगारा सावज्जा अबोहिया कम्मंता परपाण-परियावणकरा कज्जंति ततो वि एगच्चाओ पडिविरया एगच्चाओ अप्पडिविरया ।

६१ से जहाणामए समणोवासगा भवंति-अभिगयजीवाजीवा उवलद्धपुण्णपावा आसव-संवर- वेयण-णिज्जर-किरिया-अहिगरण-बंध-मोक्खकुसला असहेज्ज-देवासुर-णाग-सुवण्ण-जक्ख-रक्खस-किण्णर-किंपुरिस-गरुल-गंधव्व-महोरगाइएहिं देवगणेहिं णिग्गंथाओ पावयणाओ अणइक्कमणिज्जा इणमो णिग्गंथे पावयणे णिस्संकिया णिक्कंखिया णिव्वित्तिगिंछा लद्धा गहियद्धा पुच्छियद्धा विणिच्छियद्धा अभिगयद्धा अट्ठिमिंजपेम्माणुरागरत्ता अयमाउसो णिग्गंथे पावयणे अट्ठे, अयं परमट्ठे, सेसे अणट्ठे। ऊसियफलिहा अवंगुयदुवारा चियत्तंतैउरपरघरदारपवेसा चाउद्धसद्धमुद्धिपुण्ण-मासिणीसु पडिपुण्णं पोसहं सम्मं अणुपालेमाणा समणे णिग्गंथे फासुएसणिज्जेणं असण-पाण-खाइम-साइमेणं वत्थ-पडिग्गह-कंबल-पायपुंछणेणं ओसहभेसज्जेणं-पीढफलग-सेज्जासंथारएणं पडिलाभेमाणा बहूहिं सीलव्वय-गुण-वेरमण-पच्चक्खाण-पोसहोववासेहिं अहापरिग्गहिएहिं तवोकम्महिं अप्पाणं भावेमाणा विहरंति ।

६२ ते णं एयारूवेणं विहारेणं विहरमाणा बहूइं वासाइं समणोवासगपरियागं पाउणंति, पाउणित्ता आबाहंसि उप्पण्णंसि वा अणुप्पण्णंसि वा बहूइं भत्ताइं पच्चक्खाइंति, बहूइं भत्ताइं पच्चक्खाइत्ता बहूइं भत्ताइं अणसणाए छेदेति, बहूइं भत्ताइं अणसणाए छेदित्ता आलोइयपडिक्कंता समाहिपत्ता कालमासे कालं किच्चा अण्णयरेसु देवलोएसु देवत्ताए उववत्तारो भवंति, तं जहा- महिइडिएसु महज्जुइएसु जाव महासोक्खेसु । सेसं तहेव जाव एस ठाणे आरिए जाव एगंतसम्ममे साहू । तच्चस्स ठाणस्स मीसगस्स विभंगे एवमाहिए ।

६३ अविरइं पडुच्च बाले आहिज्जइ विरइं पडुच्च पंडिए आहिज्जइ, विरयाविरइं पडुच्च बालपंडिए आहिज्जइ, तत्थ णं जा सा सव्वओ अविरइं एस ठाणे आरंभट्ठाणे-अणारिए जाव असव्वदुक्खप्पहीणमग्गे एगंतमिच्छे असाहू, तत्थ णं जा सा सव्वओ विरइं एस ठाणे अणारंभट्ठाणे, एस ठाणे आरिए जाव सव्वदुक्ख-प्पहीणमग्गे एगंतसम्मं साहू । तत्थ णं जा सा सव्वओ विरया-विरइं एस ठाणे आरंभाणारंभट्ठाणे, एस ठाणे आरिए जाव सव्वदुक्खप्पहीणमग्गे एगंतसम्मं साहू ।

६४ एवामेव समणुगम्ममाणा इमेहिं चेव दोहिं ठाणेहिं समयरंति, तं जहा- धम्मं चेव अधम्मं चेव, उवसंते चेव अणुवसंते चेव । तत्थ णं णं जे से पढमस्स ठाणस्स अधम्मपक्खस्स विभंगे एवमाहिए, तस्स णं इमाइं तिण्णि तेवट्ठाइं पावाउयसयाइं भवंतीति मक्खायाइं, तं जहा- किरियावाईणं अकिरियावाईणं अण्णाणियवाईणं वेणइयवाईणं, ते वि णिव्वाणमाहंसु, ते वि मोक्खमाहंसु, ते वि लवंति सावगे, ते वि लवंति सावइत्तारो ।

६५ ते सव्वे पावाउया आइगरा धम्माणं णाणापण्णा णाणाछंदा णाणासीला णाणादिट्ठी णाणारुई णाणारंभा णाणाज्झवसाणसंजुत्ता एगं महं मंडलिबंधं किच्चा सव्वे एगओ चिद्धंति, पुरिसे य सागणियाणं इंगालाणं पाइं बहुपडिपुण्णं अयोमएणं संडासएणं गहाय ते सव्वे पावाउए आइगरे धम्माणं णाणापण्णे जाव णाणाज्झवसाण-संजुत्ते एवं वयासी- हं भो पावाउया आइगरा धम्माणं णाणापण्णा जाव णाणाज्झवसाण-संजुत्ता ! इमं ताव तुब्भे सागणियाणं इंगालाणं पाइं बहुपडिपुण्णं गहाय मुहुत्तगं मुहुत्तगं पाणिणा धरेह, णो य हु संडासगं संसारियं कुज्जा, णो य हु अग्गिथंभणियं कुज्जा, णो य हु साहम्मियवेयावडियं कुज्जा, णो य हु परधम्मियवेयावडियं कुज्जा, उज्जुया णियागपडिवण्णा अमायं कुव्वमाणा पाणिं पसारह, इति वुच्चा से पुरिसे तेसिं पावादुयाणं तं सागणियाणं इंगालाणं पाइं बहुपडिपुण्णं अओमएणं संडासएणं गहाय पाणिंसु णिसिरइ,

तए णं ते पावाउया आइगरा धम्माणं णाणापण्णा जाव णाणाज्झवसाण- संजुत्ता पाणिं पडिसाहरेतिं, तए णं से पुरिसे ते सव्वे पावाउए आइगरे धम्माणं जाव णाणाज्झवसाणसंजुत्ते एवं वयासी- हं भो पावाउया आइगरा धम्माणं जाव णाणा- अज्झवसाणसंजुत्ता ! कम्हा णं तुब्भे पाणिं पडिसाहरह ? पाणी णो डज्जेज्जा ? दइढे किं भविस्सइ ? दुक्खं । दुक्खं ति मण्णमाणा पडिसाहरह ? एस तुला, एस पमाणे, एस समोसरणे, पत्तेयं तुला, पत्तेयं पमाणे, पत्तेयं समोसरणे ।

६६ तत्थ णं समणा माहणा एवमाइक्खंति जाव एवं परूवेंति- सव्वे पाणा, सव्वे भूया, सव्वे जीवा, सव्वे सत्ता हंतव्वा अज्जावेयव्वा परिघेत्तव्वा परितावेयव्वा किलामेयव्वा उद्वेयव्वा, ते आगंतु छेयाए ते आगंतु भेयाए, ते आगंतुं जाइ-जरा-मरण-जोणि-जम्मणसंसार-पुणब्भव- गब्भवास-भवपवंच-कलंकलीभावभागिणो भविस्संति, ते बहूणं दंडणाणं बहूणं मुंडणाणं बहूणं तज्जणाणं बहूणं तालणाणं बहूणं अंदुबंधणाणं घोलणाणं माइमरणाणं पिइमरणाणं भाइमरणाणं भगिणीमरणाणं भज्जामरणाणं पुत्तमरणाणं धूयमरणाणं सुण्हामरणाणं दारिद्धानं दोहग्गाणं अप्पिय-संवासाणं पियविप्पओगाणं बहूणं दुक्खदोमणस्साणं आभागिणो भविस्संति, अणाइयं

च णं अणवदग्गं दीहमद्धं चाउरंतसंसारकंतरं भुज्जो-भुज्जो अणुपरियट्ठिस्संति ते णो सिज्झिस्संति णो बुज्झिस्संति जाव णो सव्वदुक्खाणं अंतं करिस्संति । [एस तुला, एस पमाणे, एस समोसरणे, पत्तेयं तुला, पत्तेयं पमाणे, पत्तेयं समोसरणे ।]

६७

तत्थ णं जे ते समण-माहणा एवं आइक्खंति जाव परूवेति- सव्वे पाणा सव्वे भूया सव्वे जीवा सव्वे सत्ता ण हंतव्वा ण अज्जावेयव्वा ण परिघेत्तव्वा ण परितावेयव्वा ण उद्वेयव्वा, ते णो आगंतु छेयाए, ते णो आगंतु भेयाए, ते णो आगंतु जाइ-जरा-मरण-जोणिजम्मण-संसार-पुणब्भव-गब्भवास-भवपवंचकलंकली-भावभागिणो भविस्संति, ते णो बहूणं दंडणाणं जाव णो बहूणं दुक्खदोमणसाणं आभागिणो भविस्संति, अणाइयं च णं अणवदग्गं दीहमद्धं चाउरंतं संसारकंतरं भुज्जो-भुज्जो णो अणुपरियट्ठिस्संति, ते सिज्झिस्संति जाव सव्वदुक्खाणं अंतं करिस्संति ।

६८

इच्चेएहिं बारसहिं किरियाठाणेहिं वट्ठमाणा जीवा णो सिज्झिंसु णो बुज्झिंसु जाव णो सव्वदुक्खाणं अंतं करेसु वा करेति वा करिस्संति वा । एयंसि चेव तेरसमे किरियाठाणे वट्ठमाणा जीवा सिज्झिंसु बुज्झिंसु मुच्चिंसु परिणिव्वाइंसु सव्वदुक्खाणं अंतं करिंसु वा करेति वा करिस्संति वा । एवं से भिक्खू आयट्ठी आयहिए आयगुत्ते आयजोगी आयपरक्कमे आयरक्खिए आयाणुकंपए आयणिप्फेडए आयाणमेव पडिसाहरेज्जासि । त्ति बेमि ।

॥ बीअं अज्झयणं समत्तं ॥

तइअं अज्झयणं

आहार परिण्णा

१

सुयं मे आउसं तेणं भगवया एवमक्खायं- इह खलु आहारपरिण्णा णाम अज्झयणे, तस्स णं अयमट्ठे- इह खलु पाईणं वा पडीणं वा उदीणं वा दाहिणं वा सव्वओ सव्वावंति लोगंसि चत्तारि बीयकाया एवमाहिज्जंति, तं जहा- अग्गबीया मूलबीया पोरबीया खंधबीया ।

२

तेसिं च णं अहाबीएणं अहावगासेणं इह एगइया सत्ता पुढविजोणिया पुढवि- संभवा पुढविवक्कमा ।

तज्जोणिया तस्संभवा तव्वक्कमा कम्मोवगा कम्मणियाणेणं तत्थवक्कम्मा णाणाविहजोणियासु पुढवीसु रुक्खत्ताए विउट्ठंति ।

ते जीवा तेसिं णाणाविहजोणियाणं पुढवीणं सिणेहमाहारंति-ते जीवा आहारंति पुढविसरीरं आउसरीरं तेउसरीरं वाउसरीरं वणस्सइसरीरं णाणाविहाणं तस-थावराणं पाणाणं सरीरं अचित्तं कुव्वंति, परिविद्धत्थं तं सरीरगं पुव्वाहारियं तयाहारियं विपरिणयं(विपरिणामियं) सारुवियकडं संतं सव्वप्पणत्ताए आहारंति।

अवरे वि य णं तेसिं पुढविजोणियाणं रुक्खाणं सरीरा णाणावण्णा णाणागंधा णाणारसा णाणाफासा णाणासंठाणसंठिया णाणाविह-सरीरपोग्गल-विउव्विया; ते जीवा कम्मोववण्णगा भवंतीति मक्खायं ।

३ अहावरं पुरक्खायं- इहेगइया सत्ता रुक्खजोणिया रुक्खसंभवा रुक्खवक्कमा तज्जोणिया तस्संभवा तव्वक्कमा कम्मोवगा कम्मणियाणेणं तत्थवक्कमा पुढवि- जोणिएहिं रुक्खेहिं रुक्खत्ताए विउव्वंति ।

ते जीवा तेसिं पुढविजोणियाणं रुक्खाणं सिणेहमाहारेंति, ते जीवा आहारेंति पुढविसरीरं आउसरीरं तेउसरीरं वाउसरीरं वणस्सइसरीरं, णाणाविहाणं तस-थावराणं पाणाणं सरीरं अचित्तं कुव्वंति, परिविद्धत्थं तं सरीरगं पुव्वाहारियं तयाहारियं विपरिणयं सारुवियकडं संतं सव्वप्पणत्ताए आहारं आहारेंति ।

अवरे वि य णं तेसिं रुक्खजोणियाणं रुक्खाणं सरीरा णाणावण्णा णाणागंधा णाणारसा णाणाफासा णाणासंठाणसंठिया णाणाविहसरीरपोग्गलविउव्विया; ते जीवा कम्मोववण्णगा भवंतीति मक्खायं ।

४ अहावरं पुरक्खायं-इहेगइया सत्ता रुक्खजोणिया रुक्खसंभवा रुक्खवक्कमा तज्जोणिया तस्संभवा तव्वक्कमा कम्मोवगा कम्मणियाणेणं तत्थवक्कमा रुक्ख- जोणिएसु रुक्खेसु रुक्खत्ताए विउव्वंति । ते जीवा तेसिं रुक्खजोणियाणं रुक्खाणं सिणेहमाहारेंति, ते जीवा आहारेंति पुढविसरीरं आउसरीरं तेउसरीरं वाउसरीरं वणस्सइसरीरं, णाणाविहाणं तस-थावराणं पाणाणं सरीरं अचित्तं कुव्वंति परिविद्धत्थं तं सरीरगं पुव्वाहारियं तयाहारियं विपरिणयं सारुवियकडं संतं सव्वप्पणत्ताए आहारं आहारेंति। अवरे वि य णं तेसिं रुक्खजोणियाणं रुक्खाणं सरीरा णाणावण्णा जाव ते जीवा कम्मोववण्णगा भवंतीति मक्खायं ।

५ अहावरं पुरक्खायं-इहेगइया सत्ता रुक्खजोणिया रुक्खसंभवा रुक्खवक्कमा तज्जोणिया तस्संभवा तव्वक्कमा कम्मोवगा कम्मणियाणेणं तत्थवक्कम्मा रुक्ख-जोणिएसु रुक्खेसु मूलत्ताए कंदत्ताए खंधत्ताए तयत्ताए सालत्ताए पवालत्ताए पत्तत्ताए पुप्फत्ताए फलत्ताए बीयत्ताए विउव्वंति, ते जीवा तेसिं रुक्खजोणियाणं रुक्खाणं सिणेह- माहारेंति, ते जीवा आहारेंति पुढविसरीरं आउसरीरं तेउसरीरं वाउसरीरं वणस्सइसरीरं, णाणाविहाणं तस-थावराणं पाणाणं सरीरं अचित्तं कुव्वंति, परिविद्धत्थं तं सरीरगं जाव सारुवियकडं संतं सव्वप्पणत्ताए आहारं आहारेंति। अवरे वि य णं तेसिं रुक्खजोणियाणं मूलाणं कंदाणं खंधाणं तयाणं सालाणं पवालाणं जाव बीयाणं सरीरा णाणावण्णा णाणागंधा जाव णाणाविहसरीरपोग्गलविउव्विया, ते जीवा कम्मोववण्णगा भवंतीति मक्खायं ।

६ अहावरं पुरक्खायं-इहेगइया सत्ता रुक्खजोणिया रुक्खसंभवा रुक्खवक्कमा तज्जोणिया तस्संभवा तव्वक्कमा कम्मोवगा कम्मणियाणेणं तत्थवक्कमा रुक्ख- जोणिएहिं रुक्खेहिं अज्झारुहत्ताए विउव्वंति । ते जीवा रुक्खजोणियाणं रुक्खाणं सिणेहमाहारेंति, ते जीवा आहारेंति पुढविसरीरं जाव सारुवियकडं संतं सव्वप्पणाए आहारं आहारेंति, अवरे वि य णं तेसिं रुक्खजोणियाणं अज्झारुहाणं सरीरा णाणावण्णा जाव मक्खायं ।

- ७ अहावरं पुरक्खायं- इहेगइया सत्ता अज्झारुहजोणिया अज्झारुहसंभवा जाव कम्मणियाणेणं तत्थवक्कमा रुक्खजोणिएसु अज्झारुहेसु अज्झारुहत्ताए विउट्ठंति, ते जीवा तेसिं रुक्खजोणियाणं अज्झारुहाणं सिणेहमाहारंति, ते जीवा आहारंति पुढविसरीरं जाव सारुवियकडं संतं सव्वप्पणाए आहारं आहारंति, अवरे वि य णं तेसिं अज्झारुहजोणियाणं सरीरा णाणावण्णा जाव मक्खायं ।
- ८ अहावरं पुरक्खायं-इहेगइया सत्ता अज्झारुहजोणिया अज्झारुहसंभवा जाव कम्मणियाणेणं तत्थवक्कमा अज्झारुहजोणिएसु अज्झारुहेसु अज्झारुहत्ताए विउट्ठंति, ते जीवा तेसिं अज्झारुहजोणियाणं अज्झारुहाणं सिणेहमाहारंति, ते जीवा आहारंति पुढविसरीरं जाव सारुवियकडं संतं आहारे सव्वप्पणाए आहारंति, अवरे वि य णं तेसिं अज्झारुहजोणियाणं अज्झारुहाणं सरीरा णाणावण्णा जाव मक्खायं ।
- ९ अहावरं पुरक्खायं-इहेगइया सत्ता अज्झारुहजोणिया अज्झारुहसंभवा जाव कम्म- णियाणेणं तत्थवक्कमा अज्झारुहजोणिएसु अज्झारुहेसु मूलत्ताए जाव बीयत्ताए विउट्ठंति, ते जीवा तेसिं अज्झारुहजोणियाणं अज्झारुहाणं सिणेहमाहारंति जाव अवरे वि य णं तेसिं अज्झारुहजोणियाणं मूलाणं जाव बीयाणं सरीरा णाणावण्णा जाव मक्खायं ।
- १० अहावरं पुरक्खायं-इहेगइया सत्ता पुढविजोणिया पुढविसंभवा जाव णाणाविह जोणियासु पुढवीसु तणत्ताए विउट्ठंति । ते जीवा तेसिं णाणाविहजोणियाणं पुढवीणं सिणेहमाहारंति जाव ते जीवा कम्मोववण्णगा भवंतीति मक्खायं ।
- एवं पुढविजोणिएसु तणेसु तणत्ताए विउट्ठंति जाव मक्खायं । एवं तणजोणिएसु तणेसु तणत्ताए विउट्ठंति जाव मक्खायं । एवं तणजोणिएसु तणेसु मूलत्ताए जाव बीयत्ताए विउट्ठंति, ते जीवा जाव एवमक्खायं ।
- एवं ओसहीण वि चत्तारि आलावगा । एवं हरियाण वि चत्तारि आलावगा ।
- ११ अहावरं पुरक्खायं-इहेगइया सत्ता पुढविजोणिया पुढविसंभवा जाव कम्म-णियाणेणं तत्थवक्कमा णाणाविहजोणियासु पुढवीसु आयत्ताए वायत्ताए कायत्ताए कुहणत्ताए कंदुकत्ताए उव्वेहणियत्ताए णिव्वेहणियत्ताए सच्छत्ताए छत्तगत्ताए वासाणियत्ताए कूरत्ताए विउट्ठंति । ते जीवा तेसिं णाणाविहजोणियाणं पुढवीणं सिणेहमाहारंति, ते जीवा आहारंति पुढविसरीरं जाव संतं, अवरे वि य णं तेसिं पुढवि- जोणियाणं आयाणं जाव कूराणं सरीरा णाणावण्णा जाव मक्खायं । एक्को चेव आलावगो, सेसा तिण्णि णत्थि ।
- १२ अहावरं पुरक्खायं- इहेगइया सत्ता उदगजोणिया उदगसंभवा जाव कम्म-णियाणेणं तत्थवक्कमा णाणाविहजोणिएसु उदएसु रुक्खत्ताए विउट्ठंति, ते जीवा तेसिं णाणाविहजोणियाणं उदगाणं सिणेहमाहारंति, ते जीवा आहारंति पुढविसरीरं जाव संतं, अवरे वि य णं तेसिं उदगजोणियाणं रुक्खाणं सरीरा णाणावण्णा जाव मक्खायं, जहा पुढविजोणियाणं रुक्खाणं चत्तारि गमा । अज्झारुहाण वि तहेव, तणाणं, ओसहीणं, हरियाणं चत्तारि आलावगा भाणियच्चा एक्केक्के ।

१३

अहावरं पुरक्खायं-इहेगइया सत्ता उदगजोणिया जाव कम्मणियाणेणं तत्थवक्कमा पाणाविहजोणिएसु उदगत्ताए अवगत्ताए पणगत्ताए सेवालत्ताए कलंबुगत्ताए हढत्ताए कसेरुयत्ताए कच्छभाणियत्ताए उप्पलत्ताए पउमत्ताए कुमुदत्ताए णलिणत्ताए सुभगत्ताए सोगंधियत्ताए पौंडरियत्ताए महापौंडरियत्ताए सयपत्तत्ताए सहस्सपत्तत्ताए एवं कल्हारत्ताए कोकणयत्ताए अरविंदत्ताए तामरसत्ताए भिसत्ताए भिसमुणालत्ताए पुक्खलत्ताए पुक्खलच्छिभगत्ताए विउट्ठंति, ते जीवा तेसिं पाणाविहजोणियाणं उदगाणं सिणेहमाहारंति, ते जीवा आहारंति पुढविसरीरं जाव संतं, अवरे वि य णं तेसिं उदगाणं जाव पुक्खलच्छिभगाणं सरीरा पाणावण्णा जाव मक्खायं, एक्को चेव आलावगो।

१४

अहावरं पुरक्खायं- इहेगइया सत्ता तहिं चेव पुढविजोणिएहिं रुक्खेहिं रुक्ख- जोणिएहिं रुक्खेहिं, रुक्खजोणिएहिं मूलेहिं जाव बीएहिं । रुक्खजोणिएहिं अज्झारुहेहिं, अज्झारुहजोणिएहिं अज्झारुहेहिं, अज्झारुहजोणिएहिं मूलेहिं जाव बीएहिं, पुढवि-जोणिएहिं तणेहिं, तणजोणिएहिं तेणेहिं तणजोणिएहिं मूलेहिं जाव बीएहिं। एवं ओसहीहिं तिण्णि आलावगा, एवं हरिएहिं वि तिण्णि आलावगा, पुढविजोणिएहिं आएहिं काएहिं जाव कूरेहिं, उदगजोणिएहिं रुक्खेहिं, रुक्खजोणिएहिं रुक्खेहिं, रुक्खजोणिएहिं मूलेहिं जाव बीएहिं, एवं अज्झारुहेहिं वि तिण्णि, तणेहिं वि तिण्णि आलावगा, ओसहीहिं वि तिण्णि, हरिएहिं वि तिण्णि, उदगजोणिएहिं उदएहिं अवएहिं जाव पुक्खलच्छिभगेहिं तसपाणत्ताए विउट्ठंति ।

ते जीवा तेसिं पुढविजोणियाणं उदगजोणियाणं रुक्खजोणियाणं अज्झारुह-जोणियाणं तणजोणियाणं ओसहिजोणियाणं हरियजोणियाणं रुक्खाणं अज्झारुहाणं तणाणं ओसहीणं हरियाणं मूलाणं जाव बीयाणं आयाणं कायाणं जाव पुक्खलच्छिभगाणं सिणेहमारंति । ते जीवा आहारंति पुढविसरीरं जाव संतं, अवरे वि य णं तेसिं रुक्ख-जोणियाणं अज्झारुहजोणियाणं तणजोणियाणं ओसहिजोणियाणं हरियजोणियाणं मूलजोणियाणं कंदजोणियाणं जाव बीयजोणियाणं आयजोणियाणं कायजोणियाणं जाव कूरजोणियाणं उदगजोणियाणं अवगजोणियाणं जाव पुक्खलच्छिभगजोणियाणं तसपाणाणं सरीरा पाणाविण्णा जाव मक्खायं ।

१५

अहावरं पुरक्खायं- पाणाविहाणं मणुस्साणं, तं जहा- कम्मभूमगाणं अकम्म-भूमगाणं अंतरदीवगाणं आरियाणं मिलक्खूणं, तेसिं च णं अहाबीएणं अहावगासेणं इत्थीए पुरिसस्स य कम्मकडाए जोणीए एत्थ णं मेहुणवत्तिए णामं संजोगे समुप्पज्जइ, ते दुहओ वि सिणेहं संचिणंति, तत्थ णं जीवा इत्थित्ताए पुरिसत्ताए णपुंसगत्ताए विउट्ठंति, ते जीवा माउओयं पिउसुक्कं तदुभय संसट्ठं कलुसं किब्बिसं तप्पढमयाए आहारमाहारंति, तओ पच्छा जं से माया पाणाविहाओ रसवईओ आहारमाहारेइ, ततो एगदेसेणं ओयमाहारंति । अणुपुव्वेणं वुड्ढा पलिपागमणुपवण्णा तओ कायाओ अभिणिव्वट्ठमाणा इत्थि वेगया जणयंति, पुरिसं वेगया जणयंति, णपुंसगं वेगया जणयंति । ते जीवा डहरा समाणा माउक्खीरं सप्पिं आहारंति, आणुपुव्वेणं वुड्ढा ओयणं कुम्मासं तस-थावरे य पाणे, ते जीवा आहारंति पुढविसरीरं जाव

सारुवियकडं संतं, अवरे वि य णं तेसिं णाणाविहाणं मणुस्साणं कम्मभूमगाणं अकम्मभूमगाणं अंतरदीवगाणं आरियाणं मिलक्खूणं सरीरा णाणावण्णा जाव मक्खायं ।

१६ अहावरं पुरक्खायं- णाणाविहाणं जलचरपंचिंदियतिरिक्खजोणियाणं, तं जहा- मच्छाणं जाव सुंसुमाराणं, तेसिं च णं अहाबीएणं अहावगासेणं इत्थीए पुरिसस्स य कम्मकडाए जोणिए तहेव जाव ततो एगदेसेणं ओयमाहारैति अणुपुव्वेणं वुड्ढा पलिपाग- मणुपवण्णा तओ कायाओ अभिणिव्वट्टमाणा अंडं वेगया जणयंति, पोयं वेगया जणयंति, से अंडे उब्भिज्जमाणे इत्थिं वेगया जणयंति पुरिसं वेगया जणयंति णपुसगं वेगया जणयंति, ते जीवा डहरा समाणा माउसिणेहमाहारैति, अणुपुव्वेणं वुड्ढा वणस्सइकायं तस थावरे य पाणे, ते जीवा आहारैति पुढविसरीरं जाव आहारैति, अवरे वि य णं तेसिं णाणाविहाणं जलचरपंचिंदियतिरिक्खजोणियाणं मच्छाणं जाव सुंसुमाराणं सरीरा णाणावण्णा जाव मक्खायं ।

१७ अहावरं पुरक्खायं- णाणाविहाणं चउप्पयथलचरपंचिंदियतिरिक्खजोणियाणं, तं जहा- एगखुराणं दुखुराणं गंडीपयाणं सणप्फयाणं, तेसिं च णं अहाबीएणं अहावगासेणं इत्थीए पुरिसस्स य कम्मकडाए जोणिए जाव मेहुणवत्तिए णामं संजोगे समुप्पज्जइ, ते दुहओ सिणेहं संचिणंति, संचिणित्ता तत्थ णं जीवा इत्थित्ताए पुरिसत्ताए णपुंसगत्ताए विउट्ठंति, ते जीवा माउओयं पिउसुक्कं एवं जहा मणुस्साणं जाव इत्थिं वेगया जणयंति, पुरिसं वेगया जणयंति, णपुंसगं वेगया जणयंति । ते जीवा डहरा समाणा माउक्खीरं सप्पिं आहारैति, अणुपुव्वेण वुड्ढा वणस्सइकायं तसथावरे य पाणे, ते जीवा आहारैति पुढविसरीरं जाव आहारैति । अवरे वि य णं तेसिं णाणाविहाणं चउप्पयथलचरपंचिंदिय तिक्खजोणियाणं एगखुराणं जाव सणप्फयाणं सरीरा णाणावण्णा जाव मक्खायं ।

१८ अहावरं पुरक्खायं-णाणाविहाणं उरपरिसप्पथलयरपंचिंदियतिरिक्ख-जोणियाणं, तं जहा- अहीणं अयगराणं आसालियाणं, महोरगाणं । तेसिं च णं अहाबीएणं, अहावगासेणं इत्थीए पुरिसस्स जाव एत्थ णं मेहुणे एवं तं चेव, णाणत्तं- अंडं वेगया जणयंति, पोयं वेगया जणयंति, से अंडे उब्भिज्जमाणे इत्थिं वेगया जणयंति, पुरिसं पि णपुंसगं पि वेगया जणयंति, ते जीवा डहरा समाणा वाउकायमाहारैति अणुपुव्वेणं वुड्ढा वणस्सइकायं तस-थावरे य पाणे, ते जीवा आहारैति पुढविसरीरं जाव संतं, अवरे वि य णं तेसिं णाणाविहाणं उरपरिसप्प-थलयरपंचिंदिय तिक्खजोणियाणं अहीणं जाव महोरगाणं सरीरा णाणावण्णा जाव मक्खायं ।

१९ अहावरं पुरक्खायं- णाणाविहाणं भुयपरिसप्पथलयरपंचिंदियतिरिक्खजोणियाणं, तं जहा- गोहाणं णउलाणं सेहाणं सरडाणं सल्लाणं सरवाणं खाराणं घरकोइलियाणं विस्संभराणं मूसगाणं मंगुसाणं पयलाइयाणं बिरालियाणं जोहाणं चाउप्पाइयाणं, तेसिं च णं अहाबीएणं अहावगासेणं इत्थीए पुरिसस्स य जहा उरपरिसप्पाणं तहा भाणियव्वं जाव सारुवियकडं संतं, अवरे वि य णं तेसिं णाणाविहाणं भुयपरिसप्प- पंचिंदियथलयरतिरिक्खाणं तं चेव जाव गोहाणं जाव जोहाणं चाउप्पाइयाणं सरीरा णाणावण्णा जाव मक्खायं ।

२० अहावरं पुरक्खायं-णाणाविहाणं खहयरपंचिंदियतिरिक्खजोणियाणं, तं जहा- चम्मपक्खीणं लोमपक्खीणं समुग्गपक्खीणं विततपक्खीणं । तेसिं च णं अहाबीएणं अहावगासेणं इत्थीए

जहा उरपरिसप्पाणं, णाणत्तं ते जीवा इहरा समाणा माउगायसिणेहं आहारैति; अणुपुव्वेणं वुड्ढा वणस्सइकायं तस-थावरे य पाणे, ते जीवा आहारैति पुढविसरीरं जाव संतं, अवरे वि य णं तेसिं णाणाविहाणं खहयर- पंचिंदियतिरिक्खजोणियाणं चम्मपक्खीणं जाव विततपक्खीणं सरीरा णाणावण्णा जाव मक्खायं ।

२१ अहावरं पुरक्खायं- इहेगइया सत्ता णाणाविहजोणिया णाणविहसंभवा णाणा- विहवक्कमा तज्जोणिया तस्संभवा तव्वक्कमा कम्मोवगा कम्मणियाणेणं तत्थवक्कमा णाणाविहाणं तसथावराणं पोग्गलाणं सरीरेसु सचित्तेसु वा अचित्तेसु वा अणुसूयत्ताए विउट्ठंति, ते जीवा तेसिं णाणाविहाणं तसथावराणं पाणाणं सिणेहमाहारैति, ते जीवा आहारैति पुढविसरीरं जाव संतं, अवरे वि य णं तेसिं तस-थावरजोणियाणं अणुसूयाणं सरीरा णाणावण्णा जाव मक्खायं । एवं दुरूवसंभवत्ताए । एवं खुरदुगत्ताए । [अहावरं पुरक्खायं- इहेगइया सत्ता णाणाविहजोणिया जाव कम्मणिदाणेणं खुरदुगत्ताए वक्कमंति ।]

२२ अहावरं पुरक्खायं- इहेगइया सत्ता णाणाविहजोणिया जाव कम्मणियाणेणं तत्थवक्कमा णाणाविहाणं तस-थावराणं पाणाणं सरीरेसु सचित्तेसु वा अचित्तेसु वा उदगत्ताए विउट्ठंति । तं सरीरगं वायसंसिद्धं वा वायसंगहियं वा वायपरिगयं उड्ढं वाएसु उड्ढंभागी भवइ, अहे वाएसु अहेभागी भवइ, तिरियं वाएसु तिरियभागी भवइ, तं जहा- ओसा हिमए महिया करए हरतणुए सुद्धोदए । ते जीवा तेसिं णाणा-विहाणं तस-थावराणं पाणाणं सिणेहमाहारैति । ते जीवा आहारैति पुढविसरीरं जाव आहारैति । अवरे वि य णं तेसिं तस-थावर जोणियाणं उस्साणं जाव सुद्धोदगाणं सरीरा णाणावण्णा जाव मक्खायं ।

२३ अहावरं पुरक्खायं- इहेगइया सत्ता उदगजोणिया जाव कम्मणियाणेणं तत्थ- वक्कमा तस-थावरजोणिएसु उदएसु उदगत्ताए विउट्ठंति, ते जीवा तेसिं तस-थावर- जोणियाणं उदगाणं सिणेहमाहारैति, ते जीवा आहारैति पुढविसरीरं जाव संतं, अवरे वि य णं तेसिं तस-थावरजोणियाणं उदगाणं सरीरा णाणावण्णा जाव मक्खायं ।

२४ अहावरं पुरक्खायं- इहेगइया सत्ता उदगजोणियाणं जाव कम्मणियाणेणं तत्थ- वक्कमा उदगजोणिएसु उदएसु उदगत्ताए विउट्ठंति, ते जीवा उदगजोणियाणं उदगाणं सिणेहमाहारैति, ते जीवा आहारैति पुढविसरीरं जाव संतं, अवरे वि य णं तेसिं उदगजोणियाणं उदगाणं सरीरा णाणावण्णा जाव मक्खायं ।

२५ अहावरं पुरक्खायं- इहेगइया सत्ता उदगजोणिया जाव कम्मणियाणेणं तत्थ- वक्कमा उदगजोणिएसु उदगेसु तसपाणत्ताए विउट्ठंति । ते जीवा तेसिं उदगजोणियाणं उदगाणं सिणेहमाहारैति, ते जीवा आहारैति पुढविसरीरं जाव संतं । अवरे वि य णं तेसिं उदगजोणियाणं तसपाणाणं सरीरा णाणावण्णा जाव मक्खायं ।

२६ अहावरं पुरक्खायं- इहेगइया सत्ता णाणाविहजोणिया जाव कम्मणियाणेणं तत्थवक्कमा णाणाविहाणं तस-थावराणं पाणाणं सरीरेसु सचित्तेसु वा अचित्तेसु वा अगणिकायत्ताए विउट्ठंति, ते जीवा तेसिं णाणाविहाणं तस-थावराणं पाणाणं सिणेहमाहारैति, ते जीवा आहारैति

पुढविसरीरं जाव संतं, अवरे वि य णं तेसिं तस-थावरजोणियाणं अगणीणं सरीरा णाणावण्णा जाव मक्खायं । सेसा तिण्णि आलावगा जहा उदगाणं ।

२७ अहावरं पुरक्खायं- इहेगइया सत्ता णाणाविहजोणिया जाव कम्मणियाणेणं तत्थवक्कमा णाणाविहाणं तस-थावराणं पाणाणं सरीरेसु सचित्तेसु वा अचित्तेसु वा वाउक्कायत्ताए विउट्ठंति, जहा अगणीणं तहा भाणियच्चा चत्तारि गमा ।

२८ अहावरं पुरक्खायं- इहेगइया सत्ता णाणाविहजोणिया जाव कम्मणियाणेणं तत्थवक्कमा णाणाविहाणं तस-थावराणं पाणाणं सरीरेसु सचित्तेसु वा अचित्तेसु वा पुढवित्ताए सक्करत्ताए वालुयत्ताए, इमाओ गाहाओ अणुगंतच्चाओ-

पुढवी य सक्करा वालुया य, उवले सिला य लोणूसे ।

अय तउय तंब सीसग, रूप्प सुवण्णे य वइरे य ॥१॥

हरियाले हिंगुलए, मणोसिला सासगंजण पवाले ।

अब्भपडलब्भवालुय, बायरकाए मणिविहाणा ॥२॥

गोमेज्जए य रुयगे, अंके फलिहे य लोहियक्खे य ।

मरगय मसारगल्ले, भुयमोयग इंदणीले य ॥३॥

चंदण गेरुय हंसगब्भे, पुलए सोगंधिए य बोधच्चे ।

चंदप्पह वेरुलिए, जलकंते सूरकंते य ॥४॥

एयाओ एसु भाणियच्चाओ जाव सूरकंतत्ताए विउट्ठंति, ते जीवा तेसिं णाणाविहाणं तस-थावराणं पाणाणं सिणेहमाहारंति, ते जीवा आहारंति पुढविसरीरं जाव आहारंति, अवरे वि य णं तेसिं तस-थावरजोणियाणं पुढवीणं जाव सूरकंताणं सरीरा णाणावण्णा जाव मक्खाया, सेसा तिण्णि आलावगा जहा उदगाणं ।

२९ अहावरं पुरक्खायं- सच्चे पाणा, सच्चे भूया, सच्चे जीवा, सच्चे सत्ता णाणाविह- जोणिया णाणाविहसंभवा णाणाविहवक्कमा, सरीरजोणिया सरीरसंभवा सरीरवक्कमा, सरीराहारा कम्मोवगा कम्मणियाणा कम्मगइया कम्मठिइया कम्मुणा चेव विप्परिया- सुवेति । से एवमायाणह, से एवमायाणित्ता आहारगुत्ते समिए सहिए सया जए । त्ति बेमि।

॥ तइयं अज्झयणं समत्तं ॥

चउत्थ अज्झयणं

पच्चक्खाणकिरिया

- १ सुयं मे आउसं तेणं भगवया एवमक्खायं-इह खलु पच्चक्खाणकिरिया णामज्झयणे, तस्स णं अयमद्दे- आया अपच्चक्खाणी यावि भवइ, आया अकिरिया- कुसले यावि भवइ, आया मिच्छासंठिए यावि भवइ, आया एगंतदंडे यावि भवइ, आया एगंतबाले यावि भवइ, आया एगंतसुत्ते यावि भवइ, आया अवियारमण-वयण-काय-वक्के यावि भवइ, आया अप्पडिहय-अपच्चक्खायपावकम्मे यावि भवइ, एस खलु भगवया अक्खाए असंजए-अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते । से बाले अवियारमण-वयण-काय-वक्के सुविणमवि ण पस्सइ, पावे य से कम्मे कज्जइ ।
- २ तत्थ चोयए पण्णवगं एवं वयासी-असंतएणं मणेणं पावएणं असंतियाए वईए पावियाए असंतएणं काएणं पावएणं अहणंतस्स अमणक्खस्स अवियार मण-वयण-काय-वक्कस्स सुविणमवि अपस्सओ पावे कम्मे णो कज्जइ ।
कस्स णं तं हेउं ? चोयए एवं वयासी- अण्णयरेणं मणेणं पावएणं मणवत्तिए पावे कम्मे कज्जइ, अण्णयरीए वईए पावियाए वइवत्तिए पावे कम्मे कज्जइ, अण्णयरेणं काएणं पावएणं कायवत्तिए पावे कम्मे कज्जइ । हणंतस्स समणक्खस्स सवियार मण-वयण-काय-वक्कस्स सुविणमवि पासओ एवं गुणजाईयस्स पावे कम्मे कज्जइ।
पुणरवि चोयए एवं वयासी-तत्थं णं जे ते एवमाहंसु-असंतएणं मणेणं पावएणं, असंतियाए वईए पावियाए, असंतएणं काएणं पावएणं, अहणंतस्स अमणक्खस्स अवियारमण-वयण-काय-वक्कस्स सुविणमवि अपस्सओ पावे कम्मे कज्जइ, जे ते एवमाहंसु मिच्छा ते एवमाहंसु।
- ३ तत्थ पण्णवए चोयगं एवं वयासी- जं मए पुत्वं वुत्तं असंतएणं मणेणं पावएणं असंतियाए वईए पावियाए, असंतएणं काएणं पावएणं, अहणंतस्स, अमणक्खस्स, अवियारमण-वयण-काय- वक्कस्स, सुविणमवि अपस्सओ पावे कम्मे कज्जइ, तं सम्मं । कस्स णं तं हेउं ? आयरिए आह-तत्थ खलु भगवया छज्जीवणिकायहेऊ पण्णत्ता, तं जहा- पुढविकाइया जाव तसकाइया। इच्चेएहिं छहिं जीवणिकाएहिं आया अप्पडिहयपच्चक्खायपावकम्मे णिच्चं पसढविओवायचित्तदंडे, तं जहा- पाणाइवाए जाव परिग्गहे, कोहे जाव मिच्छादंसणसल्ले ।
- ४ आयरिए आह- तत्थ खलु भगवया वहए दिढ्ठंते पण्णत्ते- से जहाणामए वहए सिया गाहावइस्स वा गाहावइपुत्तस्स वा रण्णो वा रायपुरिसस्स वा खणं णिदाए पविसिस्सामि खणं लद्धूण वहिस्सामि त्ति मणं संपहारेमाणे, से किं णु हु णाम से वहए तस्स वा गाहावइस्स, तस्स वा गाहावइपुत्तस्स, तस्स वा रण्णो, तस्स वा रायपुरिसस्स, खणं णिदाए पविसिस्सामि खणं लद्धूण वहिस्सामि त्ति मणं संपहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं पसढविओवायचित्तदंडे भवइ ? एवं वियागरेमाणे समियाए वियागरे ? चोयए- हंता भवइ ।
- ५ आयरिए आह- जहा से वहए तस्स वा गाहावइस्स, तस्स वा गाहावइपुत्तस्स, तस्स वा रण्णो, तस्स वा रायपुरिसस्स, खणं णिदाए पविसिस्सामि, खणं लद्धूण वहिस्सामि त्ति मणं संपहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं

पसढविओवायचित्तदंडे एवामेव बाले वि सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं पसढ-विओवाय-चित्तदंडे, तं जहा- पाणाइवाए जाव मिच्छादंसणसल्ले, एवं खलु भगवया अक्खाए अस्संजए अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते यावि भवइ, से बाले अवियार- मण-वयण-काय-वक्के सुविणमवि ण पस्सइ, पावे य से कम्मे कज्जइ ।

६ जहा से वहए तस्स वा गाहावइस्स वा जाव रायपुरिसस्स पत्तेयं-पत्तेय चित्त सामादाय दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं पसढविओवायचित्तदंडे भवइ, एवामेव बाले सव्वेसिं पाणाणं जाव सव्वेसिं सत्ताणं पत्तेयं चित्त समादाय दिया वा राओ सुत्ते वा जागरमाणे वा अमित्तभूए मिच्छासंठिए णिच्चं पसढविओवायचित्तदंडे भवइ ।

७ चोयए- णो इण्ठे सम्भे । इह खलु बहवे पाणा जे इमेणं सरीरसमुस्सएणं णो दिट्ठा वा सुया वा णाभिमया वा विण्णाया वा जेसिं णो पत्तेयं-पत्तेयं चित्त समादाय दिया वा राओ वा सुत्ते वा जागरमाणे वा अमित्तभूए मिच्छासंठिए णिच्चं पसढ- विओवायचित्तदंडे, तं जहा- पाणाइवाए जाव मिच्छादंसणसल्ले ।

८ आयरिए आह- तत्थ खलु भगवया दुवे दिट्ठंता पण्णत्ता, तं जहा- सण्णिदिट्ठंते य असण्णिदिट्ठंते य ।

से किं तं सण्णिदिट्ठंते ? सण्णिदिट्ठंते- जे इमे सण्णिपंचिंदिया पज्जत्तगा । एसिं णं छज्जीवणिकाए पडुच्च तं जहा- पुढविकायं जाव तसकायं, से एगइओ करेमि वि कारवेमि वि। णो चेव णं से पुढविकाएण किच्चं करेमि वि कारवेमि वि, तस्स णं से एवं भवइ- एवं खलु अहं पुढविकाएणं किच्च करेमि वि कारवेमि वि, णो चेव णं से एवं भवइ इमेण वा, इमेण वा से य तेणं पुढविकाएणं किच्चं करेइ वा कारवेइ वा, से य तओ पुढविकायाओ असंजयविरय-अपडिहयपच्चक्खायपावकम्मे यावि भवइ ।

एवं जाव तसकाएत्ति भाणियव्वं, से एगइओ छहिं जीवणिकाएहिं किच्चं करेइ वि कारवेइ वि। तस्स णं एवं भवइ- एवं खलु छहिं जीवणिकाएहिं किच्चं करेमि वि कारवेमि वि । णो चेव णं से एवं भवइ- इमेहिं वा इमेहिं वा । से य तेहिं छहिं जीवणिकाएहिं किच्चं करेइ वि कारवेइ वि। से य तेहिं छहिं जीवणिकाएहिं असंजय अविरयअपडिहयपच्चक्खायपावकम्मे, तं जहा- पाणाइवाए जाव मिच्छादंसणसल्ले, एस खलु भगवया अक्खाए असंजए अविरए अपडिहयपच्चक्खायपावकम्मे सुविणमवि अपस्सओ पावे य कम्मे कज्जइ । से तं सण्णिदिट्ठंते।

९ से किं तं असण्णिदिट्ठंते ? असण्णिदिट्ठंते- जे इमे असण्णिणो पाणा, तं जहा- पुढविकाइया जाव वणस्सइकाइया छट्ठा वेगइया तसा पाणा, जेसिं णो तक्का इ वा सण्णा इ वा पण्णा इ वा मणे इ वा वई इ वा सयं वा करणाए, अण्णेहिं वा कारवेत्तए करंतं वा समणुजाणित्तए ते वि णं बाला सव्वेसिं पाणाणं जाव सत्ताणं दिया वा राओ वा सुत्ते वा जागरमाणे वा अमित्तभूया मिच्छासंठिया णिच्चं पसढविओवायचित्तदंडा, तं जहा- पाणाइवाए जाव मिच्छादंसणसल्ले । इच्चेवं जाणे, णो चेव मण्णे णो चेव वई पाणाणं जाव सत्ताणं

दुक्खणयाए सोयणयाए जूरणयाए तिप्पणयाए पिट्टणयाए परितप्पणयाए ते दुक्खण-सोयण जाव परितप्पण-वहबंधण परिकिलेसाओ अप्पडिविरया भवंति । इति खलु ते असण्णिणो वि संता अहोणिसं पाणाइवाए उवक्खाइज्जंति जाव मिच्छादंसणसल्ले उवक्खाइज्जंति ।

१०

सव्वजोणिया वि खलु सत्ता सण्णिणो हुच्चा असण्णिणो होंति, असण्णिणो हुच्चा सण्णिणो होंति, होच्चा सण्णी अदुवा असण्णी । तत्थ से अविविचित्ता अविधूणिया असमुच्छिया अणणुताविया असण्णिकायाओ सण्णिकायं संकमंति, सण्णिकायाओ वा असण्णिकायं संकमंति, सण्णिकायाओ वा सण्णिकायं संकमंति, असण्णिकायाओ वा असण्णिकायं संकमंति ।

जे एए सण्णी वा असण्णी वा सव्वे ते मिच्छायारा णिच्चं पसढविओवायचित्त- दंडा, तं जहा-पाणाइवाए जाव मिच्छादंसणसल्ले । एवं खलु भगवया अक्खाए-असंजए अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते । से बाले अवियार-मण-वयण-काय-वक्के, सुविणमवि ण पासइ, पावे य से कम्मे कज्जइ ।

११

चोयए पण्णवगं एवं वयासी-से किं कुव्वं ? किं कारवं ? कहं संजयविरयपडिहय-पच्चक्खायपावकम्मे भवइ ?

आयरिय आह- तत्थ खलु भगवया छज्जीवणिकाया हेऊ पण्णत्ता, तं जहा- पुढविकाइया जाव तसकाइया । से जहाणामए मम अस्सायं, दंडेण वा अट्ठीण वा मुट्ठीण वा लेलुणा वा कवालेण वा आतोडिज्जमाणस्स वा हम्ममाणस्स वा तज्जिज्ज- माणस्स वा ताडिज्जमाणस्स वा परिताविज्जमाणस्स वा किलामिज्जमाणस्स वा उद्विज्जमाणस्स वा जाव लोमुक्खणणमायमवि हिंसाकारगं दुक्खं भयं पडिसंवेदेमि, इच्चेवं जाण- सव्वे पाणा जाव सव्वे सत्ता दंडेण वा जाव कवालेण वा आतोडिज्जमाणा वा जाव उद्विज्जमाणा वा जाव लोमुक्खणणमायमवि हिंसाकारगं दुक्खं भयं पडिसंवेदेति ।

एवं णच्चा सव्वे पाणा जाव सव्वे सत्ता ण हंतव्वा जाव ण उद्वेयव्वा, एस धम्मे धुवे णिइए सासए समिच्च लोगं खेयण्णेहिं पवेइए । एवं से भिक्खु विरए पाणाइवायाओ जाव मिच्छादंसणसल्लाओ । से भिक्खू णो दंतपक्खालणेणं दंते पक्खालेज्जा, णो अंजणं, णो वमणं, णो धूवणेत्तं पि आइए । से भिक्खू अकिरिए अलूसए अकोहे अमाणे अमाए अलोभे उवसंते परिणिव्वुडे ।

एस खलु भगवया अक्खाए संजयविरयपडिहयपच्चक्खायपावकम्मे अकिरिए संवुडे एगंतपंडिए यावि भवइ त्ति बेमि ।

॥ चउत्थं अज्झयणं समत्तं ॥

पंचमं अज्झयणं

आयारसुयं

- १ आदाय बंभचेरं च, आसुपण्णे इमं वइं ।
अस्सिं धम्मं अणायारं, णायरेज्ज कयाइ वि ॥
- २ अणाइयं परिण्णाय, अणवदग्गे ति वा पुणो ।
सासयमसासए वा, इइ दिट्ठिं ण धारए ॥
- ३ एएहिं दोहिं ठाणेहिं, ववहारो ण विज्जइ ।
एएहिं दोहिं ठाणेहिं, अणायारं तु जाणए ॥
- ४ समुच्छिज्जिहंति सत्थारो, सव्वे पाणा अणेलिसा ।
गंठिगा वा भविस्संति, सासयं ति य णो वए ॥
- ५ एएहिं दोहिं ठाणेहिं, ववहारो ण विज्जइ ।
एएहिं दोहिं ठाणेहिं, अणायारं तु जाणए ॥
- ६ जे केइ खुइडगा पाणा, अदुवा संति महालया ।
सरिसं तेहिं वेरं ति, असरिसं ति य णो वए ॥
- ७ एएहिं दोहिं ठाणेहिं, ववहारो ण विज्जइ ।
एएहिं दोहिं ठाणेहिं, अणायारं तु जाणए ॥
- ८ अहाकडाइं भुजंति, अण्णमण्णे सकम्मणा ।
उवलित्ते ति जाणिज्जा, अणुवलित्ते त्ति वा पुणो ॥
- ९ एएहिं दोहिं ठाणेहिं, ववहारो ण विज्जइ ।
एएहिं दोहिं ठाणेहिं, अणायारं तु जाणए ॥
- १० जमिदं ओरालमाहारं, कम्मगं च तहेव य ।
सव्वत्थ वीरियं अत्थि, णत्थि सव्वत्थ वीरियं ॥
- ११ एएहिं दोहिं ठाणेहिं, ववहारो ण विज्जइ ।
एएहिं दोहिं ठाणेहिं, अणायारं तु जाणए ॥
- १२ णत्थि लोए अलोए वा, णेवं सण्णं णिवेसए ।
अत्थि लोए अलोए वा, एवं सण्णं णिवेसए ॥
- १३ णत्थि जीवा अजीवा वा, णेवं सण्णं णिवेसए ।
अत्थि जीवा अजीवा वा, एवं सण्णं णिवेसए ॥
- १४ णत्थि धम्मं अधम्मं वा, णेवं सण्णं णिवेसए ।
अत्थि धम्मं अधम्मं वा, एवं सण्णं निवेसए ॥
- १५ णत्थि बंधे व मोक्खे वा, णेवं सण्णं णिवेसए ।
अत्थि बंधे व मोक्खे वा, एवं सण्णं णिवेसए ॥

- १६ णत्थि पुण्णे व पावे वा, णेवं सण्णं णिवेसए ।
अत्थि पुण्णे व पावे वा, एस सण्णं णिवेसए ॥
- १७ णत्थि आसवे संवरे वा, णेवं सण्णं णिवेसए ।
अत्थि आसवे संवरे वा, एवं सण्णं णिवेसए ॥
- १८ णत्थि वेयणा णिज्जरा वा, णेवं सण्णं णिवेसए ।
अत्थि वेयणा णिज्जरा वा, एवं सण्णं णिवेसए ॥
- १९ णत्थि किरिया अकिरिया वा, णेवं सण्णं णिवेसए ।
अत्थि किरिया अकिरिया वा, एवं सण्णं णिवेसए ॥
- २० णत्थि कोहे व माणे वा, णेवं सण्णं णिवेसए ।
अत्थि कोहे व माणे वा, एवं सण्णं णिवेसए ॥
- २१ णत्थि माया व लोभे वा, णेवं सण्णं णिवेसए ।
अत्थि माया व लोभे वा, एवं सण्णं णिवेसए ॥
- २२ णत्थि पेज्जे व दोसे वा, णेवं सण्णं णिवेसए ।
अत्थि पेज्जे व दोसे वा, एवं सण्णं णिवेसए ॥
- २३ णत्थि चाउरंते संसारे, णेवं सण्णं णिवेसए ।
अत्थि चाउरंते संसारे, एवं सण्णं णिवेसए ॥
- २४ णत्थि देवो व देवी वा, णेवं सण्णं णिवेसए ।
अत्थि देवो व देवी वा, एवं सण्णं णिवेसए ॥
- २५ णत्थि सिद्धी असिद्धी वा, णेवं सण्णं णिवेसए ।
अत्थि सिद्धी असिद्धी वा, एवं सण्णं णिवेसए ॥
- २६ णत्थि सिद्धी णियं ठाणं, णेवं सण्णं णिवेसए ।
अत्थि सिद्धी णियं ठाणं, एवं सण्णं णिवेसए ॥
- २७ णत्थि साहू असाहू वा, णेवं सण्णं णिवेसए ।
अत्थि साहू असाहू वा, एवं सण्णं णिवेसए ॥
- २८ णत्थि कल्लाणे पावे वा, णेवं सण्णं णिवेसए ।
अत्थि कल्लाणे पावे वा, एवं सण्णं णिवेसए ॥
- २९ कल्लाणे पावए वा वि, ववहारो ण विज्जइ ।
जं वेरं तं ण जाणंति, समणा बालपंडिया ॥
- ३० असेसं अक्खयं वा वि, सव्वदुक्खे त्ति वा पुणो ।
वज्झा पाणा अवज्झ त्ति, इति वायं ण णीसिरे ॥
- ३१ दीसंति समियायारा, भिक्खुणो साहुजीविणो ।

एए मिच्छोवजीवि त्ति, इइ दिट्ठिं ण धारए ॥

३२ दक्खिणाए पडिलंभो, अत्थि णत्थि त्ति वा पुणो ।
ण वियागरेज्ज मेहावी, संतिमग्गं च बूहए ॥

३३ इच्चेएहिं ठाणेहिं, जिणदिट्ठेहिं संजए ।
धारयंते उ अप्पाणं, आमोक्खाए परिव्वएज्जासि ॥ -त्ति बेमि ॥
॥ पंचमं अज्झयणं समत्तं ॥

छट्ठं अज्झयणं

अद्वइज्जं

१ पुराकडं अद्व ! इमं सुणेह, एगंतयारी समणे पुरासी ।
से भिक्खुणो उवणेत्ता अणेगे, आइक्ख इण्हिं पुढो वित्थरेणं ॥

२ आजीविया पडुवियाथिरेणं, समागओ गणओ भिक्खु मज्झे ।
आइक्खमाणो बहुजणमत्थं, ण संधयाइ अवरेण पुव्वं ॥२॥

३ एगंतमेव अदुवा वि इण्हिं, दो वण्णमण्णं ण समेति जम्हा ।
पुव्विं च इण्हिं च अणागयं च, एगंतमेव पडिसंधयाइ ॥३॥

४ समेच्च लोगं तस-थावराणं, खेमंकरे समणे माहणे वा ।
आइक्खमाणो वि सहस्समज्झे, एगंतयं सारयइ तहच्चे ॥

५ धम्मं कहंतस्स उ णत्थि दोसो, खंतस्स दंतस्स जिइंदियस्स ।
भासा य दोसे य विवज्जगस्स, गुणे य भासा य णिसेवगस्स ॥

६ महव्वए पंच अणुव्वए य, तहेव पंचासव संवरे य ।
विरइं इह सामणियम्मि पुण्णे, लवावसक्की समणे त्ति बेमि ॥

७ सीओदगं सेवउ बीयकायं, आहायकम्मं तह इत्थियाओ ।
एगंतचारिस्सिह अम्ह धम्मे, तवस्सिणो णाभिसमेइ पावं ॥

८ सीओदगं वा तह बीयकायं, आहायकम्मं तह इत्थियाओ ।
एयाइं जाणं पडिसेवमाणा, अगारिणो अस्समणा भवंति ॥

९ सिया य बीओदग इत्थियाओ, पडिसेवमाणा समणा भवंतु ।
अगारिणो वि समणा भवंतु, सेवंति उ ते वि तहप्पगारं ॥

१० जे यावि बीओदगभोई भिक्खू, भिक्खं विहं जायइ जीवियट्ठी ।
ते णाइसंजोगमविप्पहाय, काओवगाणंतकरा भवंति ॥

- ११ इमं वयं तु तुम पाउकुव्वं, पावाइणो गरिहसि सव्व एव ।
पावाइणो उ पुढो किट्ठयंता, सयं सयं दिट्ठिं करेति पाउं ॥
- १२ ते अण्णमण्णस्स वि गरहमाणा, अक्खंति उ समणा माहणा य ।
सतो य अत्थि असतो य णत्थि, गरहामो दिट्ठिं ण गरहामो किंचि ॥
- १३ ण किंचि रूवेणभिधारयामो, स दिट्ठिमग्गं तु करेमो पाउं ।
मग्गे इमे किट्ठिए आरिएहिं, अणुत्तरे सप्पुरिसेहिं अंजू ॥
- १४ उड्ढं अहे य तिरियं दिसासु, तसा य जे थावर जे य पाणा ।
भूयाभिसंकाए दुगुंछमाणे, णो गरहइ वुसिमं किंचि लोए ॥
- १५ आगंतगारे आरामगारे, समणे उ भीए ण उवेइ वासं ।
दक्खा हु संती बहवे मणुस्सा, ऊणातिरित्ता य लवालवा य ॥
- १६ मेहाविणो सिक्खिय बुद्धिमंता, सुत्तेहि अत्थेहि य णिच्छियण्णा ।
पुच्छिंसु मा णे अणगार अण्णे, इति संकमाणो ण उवेइ तत्थ ॥
- १७ णाकामकिच्चा ण य बालकिच्चा, रायाभिओगेण कुओ भएणं ।
वियागरेज्जा पसिणं ण वावि, सकामकिच्चेणिह आरियाणं ॥
- १८ गंता व तत्था अदुवा अगंता, वियागरेज्जा समियासुपण्णे ।
अणारिया दंसणओ परित्ता, इइ संकमाणो ण उवेइ तत्थ ॥
- १९ पण्णं जहा वणिए उदय अट्ठी, आयस्स हेउं पगरेइ संगं ।
तओवमे समणे णायपुत्ते, इच्चेव मे होइ मई वियक्का ॥
- २० णवं ण कुज्जा विहुणे पुराणं, चिच्चामइं ताई य साह एवं ।
एतावता बंभवइ त्ति वुत्ते, तस्सोदयट्ठी समणे त्ति बेमि ॥
- २१ समारभंते वणिया भूयगामं, परिग्गहं चेव ममायमाणा ।
ते णाइसंजोगमविप्पहाय, आयस्स हेउं पकरेति संगं ॥
- २२ वित्तेसिणो मेहुणसंपगाढा, ते भोयणट्ठा वणिया वयंति ।
वयं तु कामेसु अज्झोववण्णा, अणारिया पेमरसेसु गिद्धा ॥
- २३ आरंभगं चेव परिग्गहं च, अविउस्सिया णिस्सिय आयदंडा ।
तेसिं च से उदए जं वयासी, चउरंतणंताय दुहाय णेह ॥
- २४ णेगंत णच्चंतिय तओदए से, वयंति ते दो वि गुणोदयंमि ।
से उदए साइमणंतपत्ते, तमुद्धयं साहयइ ताई णाई ॥
- २५ अहिंसयं सव्वपयाणुकंपी, धम्मं ठियं कम्मविवेगहेउं ।
तमायदंडेहिं समायरंता, आबोहिए ते पडिरूवमेयं ॥२५॥
- २६ पिण्णागपिंडिमवि विद्धसूले, केई पएज्जा पुरिसे इमे त्ति ।

अलाउयं वावि कुमारग त्ति, स लिप्पइ पाणिवहेण अम्हं ॥

३७ अहवा वि विद्धूण मिलकखू सूले, पिण्णागबुद्धीए णरं परज्जा ।
कुमारगं वा वि अलाउए त्ति, ण लिप्पइ पाणिवहेण अम्हं ॥

३८ पुरिसं च विद्धूण कुमारगं वा, सूलम्मि केई पए जायतेए ।
पिण्णागपिंडिं सतिमारुहेत्ता, बुद्धाण तं कप्पइ पारणाए ॥

३९ सिणायगाणं तु दुवे सहस्से, जे भोयए णिइए भिक्खुयाणं ।
ते पुण्णखंधं सुमहज्जिणित्ता, भवंति आरोप्प महंतसत्ता ॥

३० अजोगरूवं इह संजयाणं, पावं तु पाणाण पसज्झ काउं ।
अबोहिए दोण्ह वि तं असाहु, वयंति जे यावि पडिस्सुणंति ॥

३१ उड्ढं अहे य तिरियं दिसासु, विण्णाय लिंगं तस-थावराणं ।
भूयाभिसंकाए दुगुंछमाणे, वए करेज्जा व कुओ विहत्थी ॥

३२ पुरिसे त्ति विण्णत्ति ण एवमत्थि, अणारिए से पुरिसे तहा हु ।
को संभवो पिण्णगपिंडियाए, वाया वि एसा बुइया असच्चा ॥

३३ वायाभिओगेण जमावहेज्जा, णो तारिसं वायमुदाहरेज्जा ।
अट्ठाणमेयं वयणं गुणाणं, णो दिक्खिए बूयमुरालमेयं ॥

३४ लद्धे अट्ठे अहो एव तुब्भे, जीवाणुभागे सुविचिंतिए य ।
पुव्वं समुद्धं अवरं च पुट्ठे, उलोइए पाणितले द्विए वा ॥

३५ जीवाणुभागं सुविचिंतयंता, आहारिया अण्णविहीअ सोहिं ।
ण वियागरे छण्णपओपजीवी, एसोणुधम्मो इह संजयाणं ॥

३६ सिणायगाणं तु दुवे सहस्से, जे भोयए णितिए भिक्खुयाणं ।
असंजए लोहियपाणि से ऊ, णियच्छइ गरहमिहेव लोए ॥

३७ थूलं उरब्भं इह मारियाणं, उद्धिद्धभत्तं च पगप्पइत्ता ।
तं लोणतेल्लेण उवक्खडेत्ता, सपिप्पलीयं पकरेंति मंसं ॥

३८ तं भुंजमाणा पिसियं पभूयं, ण लिप्पयामो वयं रएणं ।
इच्चेवमाहंसु अणज्जधम्मा, अणारिया बाल रसेसु गिद्धा ॥

३९ जे यावि भुंजंति तहप्पगारं, सेवंति पावमजाणमाणा ।
मणं ण एयं कुसला करेंति, वाया वि एसा बुइया उ मिच्छा ॥

४० सव्वेसिं जीवाण दयइयाए, सावज्जदोसं परिवज्जयंता ।
तस्संकिणो इसिणो णायपुत्ता, उद्धिद्धभत्तं परिवज्जयंति ॥

४१ भूयाभिसंकाए दुगुंछमाणा, सव्वेसिं पाणाणणिहाय दंडं ।
तम्हा ण भुंजंति तहप्पगारं, एसोणुधम्मो इह संजयाणं ॥

- ४२ णिग्गंथधम्मम्मि इमं समाहिं, अस्सिं सुठिच्चा अणिहे चरेज्जा।
बुद्धे मुणी सीलगुणोववेए इच्चत्थयं पाउणइ सिलोगं ॥
- ४३ सिणायगाणं तु दुवे सहस्से, जे भोयए णितिए माहणाणं ।
ते पुण्णखंधं सुमहज्जणित्ता, भवंति देवा इइ वेयवाओ ॥
- ४४ सिणायगाणं तु दुवे सहस्से, जे भोयए णितिए कुलालयाणं ।
से गच्छइ लोलुवसंपगाढे, तिच्चाभितावी णरगाभिसेवी ॥
- ४५ दयावरं धम्म दुगुंछमाणो, वहावहं धम्मं पसंसमाणो ।
एगं पि जे भोययइ असीलं, णिहो णिसं जाइ कओ सुरेहिं ॥
- ४६ दुहओ वि धम्मम्मि समुट्ठियामो, अस्सिं सुठिच्चा तह एसकाले ।
आयारसीले बुइएह णाणे, ण संपरायम्मि विसेसमत्थि ॥
- ४७ अव्वत्तरूवं पुरिसं महंतं, सणातणं अक्खयमव्वयं च ।
सव्वेसु भूएसु वि सव्वओ से, चंदोव्व ताराहिं समत्तरूवे ॥
- ४८ एवं ण मिज्जंति ण संसरंति, ण माहणा खत्तिय वेस पेसा ।
कीडा य पक्खी य सरीसिवा य, णरा य सव्वे तह देवलोगा ॥
- ४९ लोयं अयाणित्तिह केवलेणं, कहंति जे धम्ममजाणमाणा ।
णासंति अप्पाण परं च णट्ठा, संसार घोरम्मि अणोरपारे ॥
- ५० लोयं विजाणंतिह केवलेणं, पुण्णेण णाणेण समाहिजुत्ता ।
धम्मं समत्तं च कहंति जे उ, तारंति अप्पाण परं च तिण्णा ॥
- ५१ जे गरहियं ठाणमिहावसंति, जे यावि लोए चरणोववेया ।
उदाहडं तं तु समं मईए, अहाउसो ! विप्परियासमेव ॥
- ५२ संवच्छरेणावि य एगमेगं, बाणेण मारेउ महागयं तु ।
सेसाण जीवाण दयइयाए, वासं वयं वित्तिं पक्कपयामो ॥
- ५३ संवच्छरेणावि य एगमेगं, पाणं हणंता अणियत्तदोसा ।
सेसाण जीवाण वहेण लग्गा, सिया य थोवं गिहिणो वि तम्हा ॥
- ५४ संवच्छरेणावि य एगमेगं, पाणं हणंते समणव्वएसु ।
आयाहिए से पुरिसे अणज्जे, ण तारिसा केवलिणो भवंति ॥
- ५५ बुद्धस्स आणाए इमं समाहिं, अस्सिं सुठिच्चा तिविहेण ताई ।
तरिउं समुद्धं व महाभवोघं आयाणवं धम्ममुदाहरेज्जासि ॥त्ति बेमि॥
॥ छट्ठं अज्झयणं समत्तं ॥

सत्तमं अज्झयणं

णालंदइज्जं

- १ तेणं कालेणं तेणं समएणं रायगिहे णामं णयरे होत्था, रिद्धित्थिमियसमिद्धे वण्णओ जाव पडिरूवे। तस्स णं रायगिहस्स णयरस्स बहिया उत्तरपुरत्थिमे दिसिभाए, एत्थ णं णालंदा णामं बाहिरिया होत्था अणेगभवणसयसण्णिविद्धा जाव पडिरूवा ।
- २ तत्थ णं णालंदाए बाहिरियाए लेवे णामं गाहावई होत्था, अड्ढे दित्ते वित्ते विच्छिण्ण-विउल-भवण-सयणासण-जाण-वाहणाइण्णे बहुधण-बहुजायरूवरयए आओगपओग-संपउत्ते विच्छइडियपउरभत्तपाणे बहुदासी-दास-गो-महिस-गवेलगप्पभूए बहुजणस्स अपरिभूए यावि होत्था । से णं लेवे गाहावई समणोवासए यावि होत्था-अभिगय- जीवाजीवे जाव विहरइ ।
- ३ तस्स णं लेवस्स गाहावइस्स णालंदाए बाहिरियाए बहिया उत्तरपुरत्थिमे दिसिभाए एत्थ णं सेसदविया णामं उदगसाला होत्था- अणेगखंभसयसण्णिविद्धा पासाईया जाव पडिरूवा । तीसे णं सेसदवियाए उदगसालाए उत्तरपुरत्थिमे दिसिभाए, एत्थ णं हत्थिजामे णामं वणसंडे होत्था- किण्हे किण्होभासे, वण्णओ वणसंडस्स ।
- ४ तस्सिं च णं गिहपदेसंसि भगवं गोयमे विहरइ, भगवं च णं अहे आरामंसि। अहे णं उदए पेढालपुत्ते पासावच्चिज्जे णियंठे मेयज्जे गोत्तेणं जेणेव भगवं गोयमे तेणेव उवागच्छइ, उवागच्छित्ता भगवं गोयमं एवं वयासी- आउसंतो गोयमा ! अत्थि खलु मे केइ पएसे पुच्छियव्वे, तं च मे आउसो ! अहासुयं अहादरिसियमेयं वियागरेहिं सवायं । भगवं गोयमे उदयं पेढालपुत्तं एवं वयासी- अवियाइं आउसो ! सोच्चा णिसम्म जाणिस्सामो ।
- ५ णिग्गंथा तुम्हाणं पवयणं पवयमाणा गाहावइं समणोवासगं उवसंपण्णं एवं पच्चक्खावैत्ति- णण्णत्थ अभिओगेणं गाहावइचोरग्गहण- विमोक्खणयाए तसेहिं पाणेहिं णिहाय दंडं । एवं ण्हं पच्चक्खंताणं दुपच्चक्खायं भवइ, एवण्हं पच्चक्खावेमाणाणं दुपच्चक्खावियं भवइ । एवं ते परं पच्चक्खावेमाणा अइयरंति सयं पइण्णं । कस्स णं तं हेउं ? संसारिया खलु पाणा, थावरा वि पाणा तसत्ताए पच्चायंति, तसा वि पाणा थावरत्ताए पच्चायंति, थावरकायाओ विप्पमुच्चमाणा तसकायंसि उववज्जंति, तसकायाओ विप्पमुच्चमाणा थावरकायंसि उववज्जंति, तेसिं च णं थावरकायंसि उववण्णाणं ठाणमेयं घत्तं ।
- ६ एवं ण्हं पच्चक्खंताणं सुपच्चक्खायं भवइ, एवं ण्हं पच्चक्खावेमाणाणं सुपच्चक्खावियं भवइ । एवं ते परं पच्चक्खावेमाणा णाइयरंति सयं पइण्णं- णण्णत्थ अभिओगेणं गाहावइचोरग्गहण- विमोक्खणयाए तसभूएहिं पाणेहिं णिहाय दंडं । एवमेयं सइ भासापरक्कमे विज्जमाणे जे ते कोहा वा जाव लोहा वा परं पच्चक्खावैत्ति, अयं पि से उवएसे णो णेयाउए भवइ, आउसो गोयमा ! तुब्भं पि एयं एवं रोयइ?
- ७ सवायं भगवं गोयमे उदयं पेढालपुत्तं एवं वयासी- णो खलु आउसो उदगा! णो खलु अम्हं एयं एवं रोयइ, जे ते समणा वा माहणा वा एवमाइक्खंति जाव परूवैत्ति । णो खलु ते समणा वा

णिग्गंथा वा समियाए भासं भासंति, अब्भाइक्खंति खलु ते समणे समणोवासए वा । जेहिं वि अण्णेहिं पाणेहिं भूएहिं जीवेहिं सत्तेहिं संजमयंति ताणि वि ते अब्भाइक्खंति, कस्स णं तं हेउं ? संसारिया खलु पाणा, तसा वि पाणा थावरत्ताए पच्चायंति, थावरा वि पाणा तसत्ताए पच्चायंति तसकायाओ विप्पमुच्चमाणा थावरकायंसि उववज्जंति, थावरकायाओ विप्पमुच्चमाणा तसकायंसि उववज्जंति, तेसिं च णं तसकायंसि उववण्णाणं ठाणमेयं अघत्तं ।

८

सवायं उदय पेढालपुत्ते भगवं गोयमं एवं वयासी- कयरे खलु आउसंतो गोयमा ! तुब्भे वयह तसापाणा तसा आउमण्णहा ?

सवायं भगवं गोयमे उदयं पेढालपुत्तं एवं वयासी- आउसंतो उदगा ! जे तुब्भे वयह तसभूया पाणा तसा, ते वयं वयामो तसा पाणा तसा, जे वयं वयामो तसा पाणा तसा, ते तुब्भे वयह तसभूया पाणा तसा, एते संति दुवे ठाणा तुल्ला एगद्धा । किमाउसो ! इमे भे सुप्पणीयतराए भवइ- तसभूया पाणा तसा ? इमे भे दुप्पणीयतराए भवइ-तसा पाणा तसा? तओ एगमाउसो! पलिकोसह, एक्कं अभिणंदह, अयं पि भे उवएसे णो णेयाउए भवइ ।

९

भगवं च णं उदाहु- संतेगइया मणुस्सा भवंति, तेसिं च णं एवं वुत्तपुव्वं भवइ- णो खलु वयं संचाएमो मुंडा भवित्ता अगाराओ अणगारियं पव्वइत्तए । वयं णं अणुपुव्वेणं गुत्तस्स लिसिस्सामो । ते एवं संखं सावेंति, ते एवं संखं ठवयंति, ते एवं संखं सोवद्धवयंति । णण्णत्थ अभिजोगेणं गाहावइचोरग्गहणविमोक्खणयाए तसेहिं पाणेहिं णिहाय दंडं, ते पि तेसिं कुसल मेव भवइ ।

१०

तसा वि वुच्चंति तसा तससंभारकडेण कम्मणा, णामं च णं अब्भुवगयं भवइ, तसाउयं च णं पलिकखीणं भवइ, तसकायट्ठिइया ते तओ आउयं विप्पजहंति, ते तओ आउयं विप्पजहित्ता थावरत्ताए पच्चायंति । थावरा वि वुच्चंति थावरा थावरसंभारकडेणं कम्मणा, णामं च णं अब्भुवगयं भवइ, थावराउं च णं पलिकखीणं भवइ, थावरकायट्ठिइया ते तओ आउयं विप्पजहंति, ते तओ आउयं विप्पजहित्ता भुज्जो परलोइयत्ताए पच्चायंति, ते पाणा वि वुच्चंति, ते तसा वि वुच्चंति, ते महाकाया, ते चिरट्ठिइया ।

११

सवायं उदए पेढालपुत्ते भगवं गोयमं एवं वयासी- आउसंतो गोयमा ! णत्थि णं से केइ परियाए जण्णं समणोवासगस्स एगपाणाइवायविरए वि दंडे णिक्खित्ते, कस्स णं तं हेउं ? संसारिया खलु पाणा, थावरा वि पाणा तसत्ताए पच्चायंति, तसा वि पाणा थावरत्ताणं पच्चायंति, थावरकायाओ विप्पमुच्चमाणा सव्वे तसकायंसि उववज्जंति, तेसिं च णं थावरकायंसि उववण्णाणं ठाणमेयं घत्तं ।

१२

सवायं भगवं गोयमे उदगं पेढालपुत्तं एवं वयासी- णो खलु आउसो ! [एवं] अम्हाणं वत्तव्वएणं, तुब्भं चेव अणुप्पवाएणं अत्थि णं से परियाए जं णं समणोवासगस्स सव्वपाणेहिं सव्वभूएहिं सव्वजीवेहिं सव्वसत्तेहिं दंडे णिक्खित्ते भवइ । कस्स णं तं हेउं ? संसारिया खलु पाणा, तसा वि पाणा थावरत्ताए पच्चायंति, थावरा वि पाणा तसत्ताए पच्चायंति, तसकायाओ विप्पमुच्चमाणा सव्वे थावरकायंसि उववज्जंति, थावरकायाओ विप्पमुच्चमाणा सव्वे तसकायंसि उवज्जंति, तेसिं च णं तसकायंसि उववण्णाणं ठाणमेयं अघत्तं । ते पाणा

वि वुच्चंति, ते तसा वि वुच्चंति, ते महाकाया, ते चिरद्विइया, ते बहुयरगा पाणा जेहिं समणोवासगस्स सुपच्चक्खायं भवइ, ते अप्पयरगा पाणा जेहिं समणोवासगस्स अपच्चक्खायं भवइ, से महया तसकायाओ उवसंतस्स उवद्वियस्स पडिविरयस्स जण्णं तुब्भे वा अण्णो वा एवं वयह- णत्थि णं से केइ परियाए जम्मि समणोवासगस्स एगपाणाए वि दंडे णिक्खित्ते । अयं पि भे उवएसे णो णेयाउए भवइ ।

१३

भगवं च णं उदाहु- णियंठा खलु पुच्छियव्वा । आउसंतो णियंठा ! इह खलु संतेगइया मणुस्सा भवंति, तेसिं च णं एवं वुत्तपुव्वं भवइ-जे इमे मुंडे भवित्ता अगाराओ अणगारियं पव्वइया, एएसिं च णं आमरणंताए दंडे णिक्खित्ते; जे इमे अगारमावसंति एसिं णं आमरणंताए दंडे णो णिक्खित्ते । केइ च णं समणा जाव वासाइं चउपंचमाइं छद्दसमाइं अप्पयरो वा भुज्जयरो वा देसं दूइज्जित्ता अगारं वएज्जा ? हंता वएज्जा । तस्स णं तं गारत्थं वहमाणस्स से पच्चक्खाणे भग्गे भवइ ? णेति । एवमेव समणोवासगस्स वि तसेहिं पाणेहिं दंडे णिक्खित्ते, थावरेहिं पाणेहिं दंडे णो णिक्खित्ते, तस्सं णं तं थावरकायं वहमाणस्स से पच्चक्खाणे णो भग्गे भवइ, से एवं आयाणह णियंठा ! सेवमायाणियव्वं ।

१४

भगवं च णं उदाहु- णियंठा खलु पुच्छियव्वा- आउसंतो णियंठा ! इह खलु गाहावइणो वा गाहावइपुत्ता वा तहप्पगारेहिं कुलेहिं आगम्म धम्मसवणवत्तियं उवसंकमेज्जा ? हंता उवसंकमेज्जा । तेसिं च णं तहप्पगाराणं धम्मे आइक्खियव्वे ? हंता आइक्खियव्वे, किं ते तहप्पगारं धम्मं सोच्चा णिसम्म एवं वएज्जा- इणमेव णिग्गंथं पावयणं सच्चं अणुत्तरं केवलियं पडिपुण्णं णेयाउयं संसुद्धं सल्लकत्तणं सिद्धिमग्गं मुत्तिमग्गं णिज्जाणमग्गं णिव्वाणमग्गं अवितहं असंदिद्धं सव्वदुक्खप्प- हीणमग्गं, इत्थं ठिया जीवा सिज्झंति बुज्झंति मुच्चंति परिणिव्वायंति सव्वदुक्खाणं अंतं करंति, तमाणाए तहा गच्छामो तहा चिद्धामो तहा णिसीयामो तहा तुयद्धामो तहा भुंजामो तहा भासामो तहाब्भुद्धेमो तहा उद्धाए उद्धेत्ता पाणाणं भूयाणं जीवाणं सत्ताणं संजमेणं संजममाणो त्ति वएज्जा ? हंता वएज्जा । किं ते तहप्पगारा कप्पंति पव्वावेत्तए ? हंता कप्पंति । किं ते तहप्पगारा कप्पंति मुंडावेत्तए ? हंता कप्पंति । किं ते तहप्पगारा कप्पंति सिक्खावेत्तए ? हंता कप्पंति । किं ते तहप्पगारा कप्पंति उवद्धावेत्तए ? हंता कप्पंति । तेसिं च णं तहप्पगाराणं सव्वपाणेहिं जाव सव्वसत्तेहिं दंडे णिक्खित्ते ? हंता णिक्खित्ते । से णं एयारूवेणं विहारेणं विहरमाणा जाव वासाइं चउपंचमाइं छद्दसमाइं वा अप्पयरो वा भुज्जयरो वा देसं दूइज्जित्ता अगारं वएज्जा ? हंता वएज्जा । तस्स णं सव्वपाणेहिं जाव सव्वसत्तेहिं दंडे णिक्खित्ते ? णेति । से जे से जीवे जस्स परेणं सव्वपाणेहिं जाव सव्वसत्तेहिं दंडे णो णिक्खित्ते, से जे से जीवे जस्स परेणं सव्वपाणेहिं जाव सव्वसत्तेहिं दंडे णो णिक्खित्ते, से जे से जीवे इदाणिं जस्स सव्वपाणेहिं जाव सव्वसत्तेहिं दंडे णो णिक्खित्ते भवइ, परेणं अस्संजए आरेणं संजए, इयाणिं अस्संजए, अस्संजयस्स णं सव्वपाणेहिं जाव सव्व सत्तेहिं दंडे णो णिक्खित्ते भवइ, से एवमायाणह णियंठा! सेवमायाणियव्वं ।

१५

भगवं च णं उदाहु णियंठा खलु पुच्छियव्वा- आउसंतो णियंठा ! इह खलु परिव्वायया वा परिव्वाइयाओ वा अण्णयरेहितो तित्थाययणेहितो आगम्म धम्म- सवणवत्तियं उवसंकमेज्जा? हंता उवसंकमेज्जा । किं तेसिं तहप्पगाराणं धम्मो आइक्खियव्वे ? हंता आइक्खियव्वे । ते चेव जाव उवद्वावेत्तए । किं ते तहप्पगारा कप्पंति संभुज्जित्तए ? हंता कप्पंति । ते णं एयारूवेणं विहारेणं विहरमाणा तहेव जाव अगारं वएज्जा । हंता वएज्जा । ते णं तहप्पगारा कप्पंति संभुज्जित्तए ? णो इण्ठे सम्भे, से जे से जीवे जे परेणं णो कप्पंति संभुज्जित्तए । से जे से जीवे जे आरेणं कप्पंति संभुज्जित्तए । से जे से जीवे जे इयाणिं णो कप्पंति संभुज्जित्तए, परेणं अस्समणे, आरेणं समणे, इयाणिं अस्समणे, अस्समणेणं सद्धिं णो कप्पंति समणाणं णिग्गंथाणं संभुज्जित्तए, सेवमायाणह णियंठा । से एवं आयाणियव्वं ।

१६

भगवं च णं उदाहु- संतेगइया समणोवासगा भवंति, तेसिं च णं एवं वुत्तपुव्वं भवइ- णो खलु वयं संचाएमो मुंडा भवित्ता अगाराओ अणगारियं पव्वइत्तए, वयं णं चाउद्दसइमुद्धिपुण्णमासिणीसु पडिपुण्णं पोसहं सम्मं अणुपालेमाणा विहरिस्सामो, थूलगं पाणाइवायं पच्चकखाइस्सामो, एवं थूलगं मुसावायं थूलगं अदिण्णादाणं, थूलगं मेहुणं, थूलगं परिग्गहं पच्चकखाइस्सामो, इच्छापरिमाणं करिस्सामो दुविहं तिविहेणं । मा खलु मम अद्वाए किंचि वि करेह वा कारावेह वा, तत्थ वि पच्चाइक्खिस्सामो, ते णं अभोच्चा अपिच्चा असिणाइत्ता आसंदीपेढियाओ पच्चोरुहित्ता, ते तह कालगया किं वत्तव्वं सिया ? सम्मं कालगय त्ति वत्तव्वं सिया । ते पाणा वि वुच्चंति, ते तसा वि वुच्चंति, ते महाकाया, ते चिरद्धिइया, ते बहुतरगा पाणा जेहिं समणोवासगस्स सुपच्चकखायं भवइ, ते अप्पयरगा पाणा जेहिं समणोवासगस्स अपच्चकखायं भवइ, से महया तसकायाओ उवसंतस्स उवट्टियस्स पडिविरयस्स जं णं तुब्भे वा अण्णो वा एवं वयह- णत्थि णं से केइ परियाए जंसि समणोवासगस्स एगपाणाए वि दंडे णिक्खित्ते । अयं पि भे उवएसे णो णेयाउए भवइ ।

१७

भगवं च णं उदाहु- संतेगइया समणोवासगा भवंति, तेसिं च णं एवं वुत्तपुव्वं भवइ- णो खलु वयं संचाएमो मुंडे भवित्ता आगाराओ जाव पव्वइत्तए, णो खलु वयं संचाएमो चाउद्दसइमुद्धिपुण्णमासिणीसु जाव अणुपालेमाणा विहरित्तए । वयं णं अपच्छिममारणंतियसंलेहणाझूसणाझूसिया भत्तपाणपडियाइक्खिया कालं अणवकंखमाणा विहरिस्सामो, सव्वं पाणाइवायं पच्चकखाइस्सामो जाव सव्वं परिग्गहं पच्चकखाइस्सामो तिविहं तिविहेणं, मा खलु मम अद्वाए किंचि वि जाव आसंदी- पेढियाओ पच्चोरुहित्ता ते तह कालगया किं वत्तव्वं सिया? सम्मं कालगया त्ति वत्तव्वं सिया । ते पाणा वि वुच्चंति जाव अयं पि भे उवएसे णो णेयाउए भवइ ।

१८

भगवं च णं उदाहु-संतेगइया मणुस्सा भवंति, तं जहा- महिच्छा महारंभा महापरिग्गहा अहम्मिया जाव दुप्पडियाणंदा जाव सव्वाओ परिग्गहाओ अप्पडिविरया जावज्जीवाए, जेहिं समणोवासगस्स आयाणसो आमरणंताए दंडे णिक्खित्ते भवइ; ते तओ आउगं विप्पजहंति, विप्पजहित्ता भुज्जो सकम्ममादाय दोग्गइगामिणो भवंति । ते पाणा वि वुच्चंति, ते तसा वि वुच्चंति, ते महाकाया, ते चिरद्धिइया, ते बहुतरगा पाणा जेहिं समणोवासगस्स सुपच्चकखायं

भवइ, ते अप्पयरगा पाणा जेहिं समणोवासगस्स अपच्चक्खायं भवइ । से महया तसकायाओ उवसंतस्स उवट्ठियस्स पडिविरयस्स जं णं तुब्भे वा अण्णो वा एवं वयह- णत्थि णं केइ परियाए जंसि समणोवासगस्स एगपाणाए वि दंडे णिक्खित्ते । अयं पि भे उवएसे णो णेयाउए भवइ ।

१९ भगवं च णं उदाहु- संतेगइया मणुस्सा भवंति तं जहा- अणारंभा अपरिग्गहा धम्मिया धम्माणुया जाव सव्वाओ परिग्गहाओ पडिविरया जावज्जीवाए जेहिं समणोवासगस्स आयाणसो आमरणंताए दंडे णिक्खित्ते, ते तओ आउगं विप्पजहंति, विप्पजहित्ता ते तओ भुज्जो सकम्ममादाय सोग्गइगामिणो भवंति, ते पाणा वि वुच्चंति जाव अयं पि भे उवएसे णो णेयाउए भवइ ।

२० भगवं च णं उदाहु- संतेगइया मणुस्सा भवंति, तं जहा- अप्पिच्छा अप्पारंभा अप्प- परिग्गहा धम्मिया धम्माणुया जाव एगच्चाओ परिग्गहाओ अप्पडिविरया जेहिं समणो- वासगस्स आयाणसो आमरणंताए दंडे णिक्खित्ते, ते तओ आउयं विप्पजहंति, विप्पजहित्ता भुज्जो सकम्ममादाए सोग्गइगामिणो भवंति, ते पाणा वि वुच्चंति जाव अयं पि भे उवएसे णो णेयाउए भवइ ।

२१ भगवं च णं उदाहु- संतेगइया मणुस्सा भवंति, तं जहा- आरणिण्या आवसहिया गामणियंतिया कण्हुईरहस्सया जेहिं समणोवासगस्स आयाणसो आमरणंताए दंडे णिक्खित्ते भवइ, ते णो बहुसंजया णो बहुपडिविरया सव्व पाण-भूय-जीव-सत्तेहिं, ते अप्पणा सच्चामोसाइं एवं विप्पडिवेदेति- अहं ण हंतव्वो अण्णे हंतव्वा जाव कालमासे कालं किच्चा अण्णयराइं आसुरियाइं किव्विसियाइं जाव उववत्तारो भवंति, तओ विप्पमुच्चमाणा भुज्जो एलमूयत्ताए तमोरूवत्ताए पच्चायंति, ते पाणा वि वुच्चंति जाव अयं पि भे उवएसे णो णेयाउए भवइ ।

२२ भगवं च णं उदाहु- संतेगइया पाणा दीहाउया जेहिं समणोवासगस्स आयाणसो आमरणंताए दंडे णिक्खित्ते भवइ । ते पुव्वामेव कालं करेत्ति, करेत्ता पारलोइयत्ताए पच्चायंति, ते पाणा वि वुच्चंति, ते तसा वि वुच्चंति, ते महाकाया, ते चिरट्ठिईया, ते दीहाउया, ते बहुयरगा पाणा जेहिं समणोवासगस्स जाव अयं पि भे उवएसे णो णेयाउए भवइ ।

२३ भगवं च णं उदाहु- संतेगतिया पाणा समाउया जेहिं समणोवासगस्स आयाणसो आमरणंताए दंडे णिक्खित्ते भवइ, ते सममेव कालं करेत्ति, करेत्ता पारलोइयत्ताए पच्चायंति, ते पाणा वि वुच्चंति, ते तसा वि वुच्चंति ते, समाउया, ते बहुयरगा जाव अयं पि भे उवएसे णो णेयाउए भवइ ।

२४ भगवं च णं उदाहु- संतेगइया पाणा अप्पाउया जेहिं समणोवासगस्स आयाणसो आमरणंताए दंडे णिक्खित्ते भवइ, ते पुव्वामेव कालं करेत्ति, करेत्ता, पारलोइयत्ताए पच्चायंति । ते पाणा वि वुच्चंति, ते तसा वि वुच्चंति, ते महाकाया, ते अप्पाउया, ते बहुयरगा पाणा जेहिं समणोवासगस्स सुपच्चक्खायं भवइ जाव अयं पि भे उवएसे णो णेयाउए भवइ ।

- २५ भगवं च णं उदाहु- संतेगइया समणोवासगा भवन्ति, तेसिं च णं वुत्तपुव्वं भवइ- णो खलुं वयं संचाएमो मुंडा भवित्ता अगाराओ अणगारियं पव्वइत्तए, णो खलु वयं संचाइमो चाउद्दसद्धमुद्धिदुपुण्णमासिणीसु पडिपुण्णं पोसहं अणुपालित्तए । णो खलु वयं संचाएमो अपच्छिम जाव विहरित्तए, वयं णं सामाइयं देसावगासियं पुरत्था पाईणं पडीणं दाहिणं उदीणं एत्तावताव सव्वपाणेहिं जाव सव्वसत्तेहिं दंडे णिक्खित्ते सव्वपाण-भूय-जीव-सत्तेहिं खेमंकरे अहमंसि ।
- २६ तत्थ आरेण जे तसा पाणा जेहिं समणोवासगस्स आयाणसो आमरणंताए दंडे णिक्खित्ते; ते ततो आउं विप्पजहन्ति, विप्पजहित्ता तत्थ आरेणं चेव जे तसा पाणा, जेहिं समणोवासगस्स आयाणसो आमरणंताए दंडे णिक्खित्ते, तेसु पच्चायन्ति, तेहिं समणोवासगस्स सुपच्चक्खायं भवइ, ते पाणा वि वुच्चन्ति, जाव अयं पि भे उवएसे णो णेयाउए भवइ ।
- २७ तत्थ आरेणं जे तसा पाणा जेहिं समणोवासगस्स आयाणसो आमरणंताए दंडे णिक्खित्ते, ते तओ आउं विप्पजहन्ति, विप्पजहित्ता तत्थ आरेणं चेव जे थावरा पाणा जेहिं समणोवासगस्स अट्ठाए दंडे अणिक्खित्ते अणट्ठाए दंडे णिक्खित्ते, तेसु पच्चायन्ति । तेहिं समणोवासगस्स अट्ठाए दंडे अणिक्खित्ते अणट्ठाए दंडे णिक्खित्ते, ते पाणा वि वुच्चन्ति, जाव अयं पि भे उवएसे णो णेयाउए भवइ ।
- २८ तत्थ जे ते आरेणं तसा पाणा जेहिं समणोवासगस्स आयाणसो आमरणंताए दंडे णिक्खित्ते, ते तओ आउं विप्पजहन्ति, विप्पजहित्ता तत्थ परेणं चेव जे तसा- थावरपाणा जेहिं समणोवासगस्स आयाणसो आमरणंताए दंडे णिक्खित्ते तेसु पच्चायन्ति, तेहिं समणोवासगस्स सुपच्चक्खायं भवइ। ते पाणा वि वुच्चन्ति जाव अयं पि भे उवएसे णो णेयाउए भवइ ।
- २९ तत्थ जे ते आरेणं थावरा पाणा जेहिं समणोवासगस्स अट्ठाए दंडे अणिक्खित्ते अणट्ठाए दंडे णिक्खित्ते, ते ततो आउं विप्पजहन्ति, विप्पजहित्ता तत्थ आरेणं चेव जे तसा पाणा, जेहिं समणोवासगस्स आयाणसो आमरणंताए दंडे णिक्खित्ते, तेसु पच्चायन्ति, तेहिं समणोवासगस्स सुपच्चक्खायं भवइ, ते पाणा वि वुच्चन्ति जाव अयं पि भे उवएसे णो णेयाउए भवइ ।
- ३० तत्थ जे ते आरेणं थावरा पाणा जेहिं समणोवासगस्स अट्ठाए दंडे अणिक्खित्ते अणट्ठाए णिक्खित्ते, ते तओ आउं विप्पजहन्ति, विप्पजहित्ता ते तत्थ आरेणं चेव जे थावरा पाणा, जेहिं समणोवासगस्स अट्ठाए दंडे अणिक्खित्ते अणट्ठाए दंडे णिक्खित्ते तेसु पच्चायन्ति । तेहिं समणोवासगस्स सुपच्चक्खायं भवन्ति । ते पाणा वि जाव अयं पि भे उवएसे णो णेयाउए भवइ।
- ३१ तत्थ जे ते आरेणं थावरा पाणा जेहिं समणोवासगस्स अट्ठाए दंडे अणिक्खित्ते अणट्ठाए णिक्खित्ते, ते तओ आउं विप्पजहन्ति, विप्पजहित्ता तत्थ परेणं चेव जे तस-थावरा-पाणा जेहिं समणोवासगस्स आयाणसो आमरणंताए दंडे णिक्खित्ते, तेसु पच्चायन्ति । तेसु समणोवासगस्स सुपच्चक्खायं भवइ, ते पाणा वि जाव अयं पि भे उवएसे णो णेयाउए भवइ ।

- ३२ तत्थ जे ते परेणं तस-थावरा पाणा, जेहिं समणोवासगस्स आयाणसो आमरणंताए दंडे णिक्खित्ते, ते तओ आउं विप्पजहंति, विप्पजहित्ता तत्थ आरेणं जे तसा पाणा, जेहिं समणोवासगस्स आयाणसो आमरणंताए दंडे णिक्खित्ते, तेसु पच्चायंति, तेहिं समणोवासगस्स सुपच्चकखायं भवइ, ते पाणा वि जाव अयं पि भे उवएसे णो णेयाउए भवइ ।
- ३३ तत्थ जे ते परेणं तस-थावरा पाणा, जेहिं समणोवासगस्स आयाणसो आमरणंताए दंडे णिक्खित्ते; ते तओ आउं विप्पजहंति, विप्पजहित्ता तत्थ आरेणं जे थावरा पाणा, जेहिं समणोवासगस्स अट्ठाए दंडे अणिक्खित्ते, अणट्ठाए दंडे णिक्खित्ते तेसु पच्चायंति । तेहिं समणोवासगस्स सुपच्चकखायं भवइ, ते पाणा वि जाव अयं पि भे उवएसे णो णेयाउए भवइ ।
- ३४ तत्थ जे ते परेणं तसथावरा पाणा जेहिं समणोवासगस्स आयाणसो आमरणंताए दंडे णिक्खित्ते, ते तओ आउं विप्पजहंति, विप्पजहित्ता ते तत्थं परेणं चेव जे तस- थावरा पाणा जेहिं समणोवासगस्स आयाणसो आमरणंताए दंडे णिक्खित्ते तेसु पच्चायंति, तेहिं समणोवासगस्स सुपच्चकखायं भवइ, ते पाणा वि जाव अयं पि भे उवएसे णो णेयाउए भवइ ।
- ३५ भगवं च णं उदाहु- ण एयं भूयं ण एयं भव्वं ण एयं भविस्सं, जण्णं- तसा पाणा वोच्छिज्जिहंति थावरा पाणा भविस्सइ, थावरा पाणा वोच्छिज्जिहंति तसा पाणा भविस्संति, अव्वोच्छिण्णेहिं तस-थावरेहिं पाणेहिं जण्णं तुब्भे वा अण्णो वा एवं वयह- णत्थि णं से केइ परियाए जाव अयं पि भे उवएसे णो णेयाउए भवइ ।
- ३६ भगवं च णं उदाहु- आउसंतो उदगा ! जे खलु- समणं वा माहणं वा परिभासइ, इति मण्णइ; आगमित्ता णाणं आगमित्ता दंसणं आगमित्ता चरित्तं पावाणं कम्ममाणं अकरणयाए से खलु परलोगपलिमंथत्ताए चिद्धइ । जे खलु- समणं वा माहणं वा णो परिभासइ, इति मण्णइ; से आगमित्ता णाणं आगमित्ता दंसणं आगमित्ता चरित्तं पावाणं कम्ममाणं अकरणयाए से खलु परलोगविसुद्धीए चिद्धइ ।
- ३७ तए णं से उदगे पेढालपुत्ते भगवं गोयमं अणाढायमाणे जामेव दिसं पाउब्भूए तामेव दिसं संपहारेत्थ गमणाए ।
- भगवं च णं उदाहु- आउसंतो उदगा ! जे खलु तहारूवस्स समणस्स वा माहणस्स वा अंतिए एगमवि आरियं धम्मयं सुवयणं सोच्चा णिसम्म अप्पणो चेव सुहमाए पडिलेहाए अणुत्तरं जोगखेमपयं । लंभिए समाणे सो वि ताव तं आढाइ परिजाणइ वंदइ णमंसइ सक्कारेइ सम्माणेइ कल्लाणं मंगलं देवयं चेइयं पज्जुवासइ ।
- ३८ तए णं से उदए पेढालपुत्ते भगवं गोयमं एवं वयासी- एसि णं भंते ! पयाणं पुत्विं अण्णाणयाए असवणयाए अबोहीए अणभिगमेणं अदिट्ठाणं असुयाणं अमुयाणं अविण्णायाणं अणिज्जूढाणं अव्वोगडाणं अव्वोच्छिण्णाणं अणिसट्ठाणं अणिवूढाणं अणुवहारियाणं एयमट्ठं णो सद्वहियं णो पत्तियं णो रोइयं, एसि णं भंते ! पदाणं एण्णिं जाणयाए सवणयाए बोहीए जाव अवधारियाणं एयमट्ठं सद्वहामि पत्तियामि रोएमि एवमेयं जहा णं तुब्भे वदह ।

३९ तए णं भगवं गोयमे उदगं पेढालपुत्तं एवं वयासी- सदहाहि णं अज्जो ! पत्तियाहि णं अज्जो ! रोएहि णं अज्जो ! एवमेयं जहा णं अम्हे वदामो ।

४० तए णं से उदए पेढालपुत्ते भगवं गोयमं एवं वयासी- इच्छामि णं भंते ! तुब्भं अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ताणं विहरित्तए ।

४१ तए णं भगवं गोयमे उदगं पेढालपुत्तं गहाय जेणेव समणे भगवं महावीरे तेणेव उवागच्छइ । तए णं से उदए पेढालपुत्ते समणं भगवं महावीरं तिक्खुत्तो आयाहिणं पयाहिणं करेइ, तिक्खुत्तो आयाहिणं पयाहिणं करेत्ता वंदइ णमंसइ, वंदित्ता णमंसित्ता एवं वयासी- इच्छामि णं भंते ! तुब्भं अंतियं चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ताणं विहरित्तए ।

अहासुहं देवाणुप्पिया ! मा पडिबंधं करेह ।

तए णं से उदए पेढालपुत्ते समणस्स भगवओ महावीरस्स अंतिए चाउज्जामाओ धम्मओ पंचमहव्वइयं सपडिक्कमणं धम्मं उवसंपज्जित्ताणं विहरइ ॥ त्ति बेमि ॥

॥ सत्तमं अज्झयणं समत्तं ॥

॥ बीओ सुयखंधो समत्तो ॥

॥ सुयगडं सुत्तं समत्तं ॥

Published By:

GLOBAL JAIN AAGAM MISSION

Pawandham, Mahavir Nagar,
Kandivali (W), Mumbai - 400 067